


Uc 9924

4.



From the
Sunderland Library, Blenheim Palace.
Purchased, March, 1883,
By BERNARD QUARITCH, 15 Piccadilly, London.



stdr0008375

Uc 9924

LEGATIO
POLONO-LITHUANICA
in
MOSCOVIAM
POTENTISSIMI
POLONIÆ REGIS

ac
REIPUBLICÆ

Mandato & Consensu

Anno 1678. feliciter suscepta,

Nunc

*Breviter sed accuratè quoad singula notabilia
descripta*

à

Teste oculato

BERNHARDO LEOPOLDO FRANCISCO TANNERO,
Boemo Pragenſe, Dn. Legati Principis
Camerario Germanico.

NORIMBERGÆ,
Sumptibus JOHANNIS ZIEGERI.
Anno 1689

AUGUSTISSIMÆ COELI IMPERATRICI,
GLORIOSISSIMÆ MATRI VIRGINI,
SANCTISSIMÆ DEI GENITRICI

MARIÆ,

In sua Czaſtachoviensi Imagine
Thaumaturgæ,

DÆMONUM CONCULCATRICI,
INFERNALIS DRACONIS VICTRICI,
ENERGUMENORUM LIBERATRICI,
MISERORUM HOMINUM CONSOLATRICI,

Sub cujus beatissimis Auspiciis iter hoc peractum est

HONORI & GLORIÆ

D. D. C.

SUÆ SACRATISSIMÆ MAJESTATI



*Profundissime inclinatus Servorum
minimus*

BERNHARDUS TANNER.

BENE-



BENEVOLO ET CURIOSO LECTORI
SALUTEM.

SUpervacaneum ducō, Lector Benevole, rem multis retrō se-
culis usitatam commendare, id est: Peregrinationi Encomium
scribere. Paucis accipe, præclarum illud Isocratis de pere-
grinatione præceptum; Non pigeat quantumvis magnum
iter suscipere, etiam ad Barbaros, si possint te aliquid docere. Turpe
profecto foret tanta maria transnavigare paucilli lucri gratiā, nec ter-
restre iter velle ingredi, ut mentem ornatiorē, politiorēq; reddat.

Ego equidem semper in eā fui sententiā, veram eruditionis & pru-
dentiae laudem non ex libris tantum, sed ex usu etiam & experientiā, tan-
quam rerum omnium optima Magistra querendam esse. Non igitur ii
tantum sapientes sunt, qui literis instituti, scientiae titulum sibi vendi-
cant, sed multo magis etiam illi, qui omnibus aliis posthabitis variam re-
rum sortem experti, diuq; multumq; extra patriam versati diversarum
Regionum, statuum, hominumq; mores edocti, varia vitæ exempla, aliq;
miranda, quæ peregrinantibus sese offerunt, inspexerunt.

Hoc considerato Isocratis consilio, peragrata primū Germaniā,
Italiāq; onerosam sanē ac periculosam in minus cultam septentriona-
lem plagam, Russiam ac Moscoviam suscepi excursionem, cujus Epito-
men luci publicæ dare tandem decrevi, ab amicis ita volentibus, ex-
tortam.

De Argumento Barbaro, nec novo, nec ad elegantiam styli elabora-
to, mecum, Benevole Lector, ne contendas, rogitō; sat bonum enim est
etiam linguā calamoq; Barbarum scriptorem suscipere, dummodo possit
te aliquid docere, nam ut vestis nec à pretio, nec à concinnitate semper
æstimanda est, sed potius utilitate, sic scriptum hoc, tuo solum bono, pu-
blicatum tuis ut inserviat usibus, volo, fruiere eo Benigne Lector, & Au-
thori favere.

INDEX

INDEX CAPITUM.

- C**aput 1. Iter Pragâ usq; Warsaviam.
 Caput 2. Iter Vilnam, ac inde ad comitia.
 Caput 3. Impeditum iter in Turciam.
 Caput 4. Accessus ad Aulam Legati in Moscoviam.
 Caput 5. Legationis apparatus.
 Caput 6. Iter Legatorum usq; ad confinia Moscoviæ.
 Caput 7. Ingressus in Moscoviam per Smolensko.
 Caput 8. Iter ex Smolensko in interiora Moscoviæ.
 Caput 9. Iter ex urbe Wiasmo versus Moscuam.
 Caput 10. Ingressus magnificus Moscuam.
 Caput 11. Palatium Legatorum & primus aditus ad Czarum.
 Caput 12. Epulæ Moscovitiæ.
 Caput 13. Moscuæ descriptio.
 §. 1. Krimgorod.
 §. 2. Kitaigorod.
 §. 3. Bialgorod.
 §. 4. Zemlenigorod.
 §. 5. Strelecka Sloboda.
 Caput 14. Germanorum urbs Kukui.
 Caput 15. Legatorum in Senatu Czari acta.
 Caput 16. Pacta inter Moscos & Polonos jurata.
 Caput 17. Inconstantia Moscorum, & Czehrinum à Turcis occupatum: Benedictio fluminis.
 Caput 18. Juramentum Czari, & finis Legationis.
 Caput 19. Mores Moscorum & terræ constitutio.
 Caput 20. Reditus ex Moscovia usq; Smolensko.
 Caput 21. Reditus ex Smolensko per Lithuaniam.
 Caput 22. Reditus per Poloniam in Bohemiam.
 Caput 23. De nupero tumultu Moscuæ.

LEGA-

LEGATIO POLONO-LITHWANICA IN MOSCOVIAM.

*Potentissimi Regis Poloniæ & totius Reipublicæ
 mandato*

ANNO MDC LXXVIII.

Feliciter suscepta.

CAPUT I.

De Itinere Pragâ Warsaviam.

Qui semel animo meo infederat peregrè proficiscendi ardor, irremissâ stimulorum vehementiâ fecit, ut post visitatam prius Anno Jubilæo Italiam, iterum Anno MDC LXXVI. Pragâ, & Boëmiâ Patria meâ excedere, & ad procul remotos terrarum secessus proficisci decreverim. Die igitur sextâ Junii, dicto amico vale cognatis, & necessariis meis, cujusdam Canonici Warsaviensis lateri adhæsi comes, eoq; duce per Regiæ-hradecium, Glacium, ac tum in Silesia per Wratislaviam Brigam, Oppolium, Tarnovicium, aliâsq; civitates, ad arenosa Poloniæ confinia, ac demum Cracoviam Poloniæ Metropolim deveni. Urbs hæc Pragâ septuaginta duobus miliaribus distita, Arcis Regiæ Majestate, aliorumq; ædificiorum, ac templorum magnifico eminens aspectu superbit, intus verò immodicâ luti, sordiumq; per compita, grandi copiâ nimium est deturpata, pervetustis

A

munita

munita muris, amplis præcincta suburbiis, vastam in sublimi Arcem illam Regiam, flumine Vistulâ præcinctam, manibusq; ac reliquo apparatu bellico, in Urbis totius etiam præsidium, egregiè instructam suspicit.

Ecclesias habet mole, fabricâ, apparatu sacro pretiosissimo, spectabiles, quas inter Cathedralis in Castro regio S. Stanislai Episcopi, & Martyris Titulo, sacrisq; ejus exuviis, atq; ad easdem voti causâ copiosis pretiosisq; anathematis magnificè eminet, sit etiam si structuræ perantiquæ & obscura satis.

Secunda ab hac, Mariana Ædes Parochialis fori frontem fronte suâ, turriq; , & horologio exornat; intus verò tum in aris, tum in reliqua templi supellectile pretiosus nitor, omnium ad se oculos, & animos piâ quâdam violentiâ itâ attrahit, ut populo quàm creberrimè sit refertissima. Illud admirationem majorem meretur, quòd quisquis à malo genio obsessus (patrio dicitur sermone *opentanii*) Ædem hanc ingreditur, mox signo aliquo (licet antehac patuerit nulli) dignoscatur.

Visitur verò in Gente hac insolita Energumenorum copia, quorum etiam humi collabentium, (quandoq; etiam eleemosynæ comparandæ causâ fictè Energumenum amictum induentium) inconditis clamoribus, & fora personant, & templa. Quo fit, ut dum Mystra ad aram Domini nostri Corpus populo videndum præbet, horridonis stridoribus, hinnitibus, ejulatibus, atq; omni-genis belluas imitantibus clamoribus, perstrepat omnia ad horrorem.

Quæ quidem miserorum copia, eò minùs admiranda videtur, quòd notum sit, nihil Genti huic esse usitatus, quàm etiam suo familiari, si seu facto, seu verbo se læsum existimet, morbos pessimos ipsumq; malorum omnium maximum dæmonem, in corpus hospitem imprecari. Bug dai, Zebiz sto dziablumo szad. Deus det, centum Diabolos devores.

Medio Cracoviensis fori loco, spectandam sese exhibet, & magnitudine, & extimo, intimoq; decore conspicua urbis Curia. Hanc copiosi circumfident varii generis opulenti Mercatores, in æoni medio tabernas suas decenti ordine locantes.

Forum

Forum hoc, Cracoviam advenæ vix subivimus, in Principis Radzivil ædibus hospitium quæsituri, en, repenta rixa inter militum turbam exoritur. Triste fuit spectaculum, infelix ille, qui ad necem petebatur, è turba miles; dum enim quod manu gestabat, ad tuendum sese adversum multorum impetus, Berdisz (securis per quam acris aciei genus est) à prævalente adversario incautus extorqueri sibi patitur, ab ejusdem barbara dextra accepto suâ ipsius securi in caput ictu valido, corrui miser, ferosq; inter crudelis turbæ plausus, ultimum ingemuit. Raptatur hic exanimis sanguine suo cruentus, inq; pallio suo involutus ex urbe effertur, terræq; infoditur. Attonitus adstiti ob crudelem hanc libertatem, cum homicidam impium, nec carceri mancipatum, medio urbis foro libere consistentem conspicerem & cum quæstiones quasdam ob hanc audaciam proposuissem, responsum tuli, hanc esse libertatem Polonam.

Hic jam duorum omnino mensium moras mihi iniecit ille viæ comes, antè venerandus, sed ob mores in scelera commutatos, (quibus tandem ad apostasiam adductus, cum aliena Uxore ad hæreticos profugit,) impofterum detestabilis, fecit ut abrupto ejus consortio ab Illustrissimo Casimiro Menczinski receptus, ab eoq; Juniori Bielinski Regni Ensiferi filio commendatus in ejusdem obsequiis Warsaviam abiverim.

Undecimâ mensis Augusti Czastahovium ordinis S. Pauli primi Eremitæ, Cœnobium Thaumaturga Beatissimæ Virginis imagine celeberrimum locum, quem Saxi natura probè munivit inq; altum elevavit milliaribus undecim Cracoviâ dissitum, intravimus. Est castrum illud etiam arte, & perpetuis numerosi militis excubiis belle munitum; sed præcipuè Sanctissimæ Virginis Dei-paræ præsidio securum, cujus Basilicam stupendâ mole, turriq; spectabilem in umbilico habet. Nemo, credo, est, quem verax fama lateat de copiosis maximisq; prodigiis, quæ Deus ad Marianam ibi iconem patrare dignatur; Hujus Apellem, tabella quædam eodem loco appensa, refert, Divum Lucam fuisse, idque in illa ipsa, in qua etiamnum hodie visitur, Cupressina mensula, quæ sacerrimæ Virgini Matri, post consummatum à Redemptore Filio passionis tempus, in usibus fuerat.

A 2

Actum

Actum igitur agerem, si decantatam vulgo, & miraculorum ibi patratorum multitudinem, & thesaurorum pleno piorum, sinu effusorum gazas enumerarem. Unum ibidem prima inter-cimelia numeratur pondo 14. puri auri librarum pro SS. Eucharistia ferculum (Monstrantiam usus nominat) quod tum ob singularem artificis manum, tum ob orientalium lapidum pretiosam copiam, tanti aestimatur pretii, ut centenis omnino millibus Thalerorum æquipollere affirmetur.

Una ibi nos in obsequiis Marianis tenuit dies, tum cursum itineris prosequentes ad præfixum nobis scopum Warsaviam properavimus, & confecto 42. milliarium spatio, spectandas se nobis exhibuere, benèq; sperare iussere sublimiores Urbis turres, Quæ Magnificam innuebant domuum, totiusq; Urbis dignitatem. Quid, quid tamen Urbis est, sex majoribus plateis unoq; foro, mœnibus pervetustis cinctum constat. Hujus Warsaviæ Urbis dignitatem haud parum auget præurbii non vulgaris, nec indecora amplitudo (Cracoviense audit ab indigenis) ibiq; ad elegantiam erecta visuntur Magnatum Palatia, hortorum rara amœnitas, & in his multum celebratæ Hydrotechnices machinæ. Vix Urbem mecum ingressus, meus ille viæ Dux juvenis Dominus Bielinski, primos ad Illustrissimum Genitorem suum Regni Ensisferum gressus contulit, meq; servitiis suis recens addictum esse nunciavit; mox me in obsequiis retinere penitus detrectavit genitor, ita ut à filio, ejusq; animo in me alias quam propensissimo avelli sim coactus. Hic jam derelictum ab omnibus, benigna Numinis Providentia ad Illustrissimum Kotovicz Castellanam Vilnensem deduxit, qui pro sua in peregrinos hospitalitate, & animi excelsi Nobilitate, me non ignobilibus obsequiis suis adhibitum, non egenum servavit, & quod eum privata evocabant Comitia, Vilnam viæ assecram feligere non dubitavit. Qui quidem Magnus Heros, quia Magnam Germaniæ partem, atq; etiam Boëmiam peragraverat, ex ea rerum notitia etiam Patriæ meæ conceperat æstimationem.

CAPUT II.

Iter Vilnam, ac inde ad Comitia.

Iter ingressis nullæ occurrere Urbes splendidæ, Una in reliquarum comparatione memoranda venit Praga Civitas (si Loretanam sacram ædem, consuetâ normâ erectam, excipias) penè dixerim lignea, quales & omnes reliquæ, quas per id itineris pervadere contigit, Urbeculæ & oppida fuerunt. Verum, primo statim Vistula fluvius, qui Warsaviam ipsam allambens Dantisci in mare se præcipitat, trajiciendus nobis obveniat.

Viginti sex milliarium iter emensis, obtulit sese Tikoczin Urbs pariter domibus ligneis, ac perfida imprimis Judæorum turbâ refertissima, Narew flumine Lithuanix, & vetusto quodam propugnaculo ad marginem vicini lacus erecto, nonnihil munita.

Quindecim ab hoc milliariis, postquam Niemen rapacem fluvium, non sine præsentis vitæ periculo superâssemus; Grodnam Urbem nos advenisse gavisi sumus. Est verò Niemen fluvius ejus loci incolis longè infamissimus; multorum enim retro annorum experientiâ deprehensum est, denos ad minimum quotannis, quin etiam à veteri memoria, quinquies denos homines mergi solere. Neq; nobis in medio ejus positis tutos omnino esse licuit, quando enim more Polonico ephippiis equorum in navim sepositis ponè se, navi insidentes, aquis innatantes traducebamus equos, unus eorum petulciens, inq; navim insiliens, inquieto suo pondere illud aggravavit, agitavitq; ut in profundum jam vergeret navis, fecitq; sic, ut omnes aquis præfocati fuissimus, nisi opportuno consilio, equum illum fræno liberum, ad ripam fluminis remeare permisissimus.

Urbs Grodna, quam memoravi, non ignobilis quondam, verum à Marte Moscovitico in eas dejecta est ruinas, ut non Urbs sed Urbis rudera hodiernum superesse videantur. Atq; hinc Illustrissimus Patronus meus, quo loco filium suum haberet, palam fecit, quando prænobili dignitate Starostæ (nos Capitaneatum diceremus) sese ipsum exuens, eâ Magnificam Sobolem suam insigni-

vit. Hic verò videre licuit epularum lauditas, quæ prima Octobris trium omninò dierum otio, tanto peractæ sunt splendore, ut quaslibet cupedias Polono palato faventiores, non ad voluptatem solum proposuerit liberalitati animi correspondens magnifica penus, verum etiam ad superfluam profudisse visa sit abundantiam. Neque profusæ huic hospitalitati, cui affluxere omnia, hospitum deerat copia, utpote, quibus non triclinia solum, sed & atria Domus etiam non suffectura videbantur. Hanc hospitum Nobilium turbam, à magnificis cæteroquin separatam Capitibus, jam somno vinoq; sepultam, eò prostravit tumultuosus sopor, ut humine an sublimè quiescerent, tunc nihil pensi habens non scamnis modò, verum & angulis sub scamnis thori loco uterentur.

Grodna, ad ea quorum causâ iter susceptum est, Comitiam, Vilnam movimus decimâ Octava Octobris, confectoq; viginti quatuor milliariis spatio, Vilnam subivimus. Itineri intentis nobis non nihil morarum iniecit, ferale spectaculum, Locus milliariis quatuordecim Grodna semotus. Horrenda enim ibi pinetorum facies gloriosam quondam Urbis magnificentiam inspectantibus in memoriam nobis reduxit, nam vallis non modicè profunda, ac in ipsa valle pineta & densa arbuscula sub quibus quandoq; adhuc lebetes, ferramenta, pecunia, aliâq; scruta effodiuntur, præteritam Urbis amplitudinem hoc ipso in loco circumscribunt. Hac de re ita antiquitatis Lythuanicæ loquuntur fasti. Hic Urbs fuit, nec superest Urbis aliquid, nisi locus. Erat Respublica scelestorum civium; nunc est sylva Pinorum: in profundum absorpta est amplitudo Urbis. Ut portarentur à Civitate, digni non erant Cives, ut à terra portaretur, digna non erat Civitas; utrumq; missum est sub terram, ne amplius appareret indigna fœditas.

Vilna Lythuanicæ Metropolis, ab hostili Moscoviæ ferro, non nihil accisa; verumtamen ob multorum ejus soli Urbium invidendum splendorem à præditi Magni Ducatus Ministrorum, superbiorum Domuum reliquorumq; Architectonicorum operum magnificentiam, satis decora est. Non postremò hic memoranda venit Cathedralis Basilica à Thesaurorum pretio æstimanda, & quam maxime à Sacris totius Corporis Sancti Casimiri Polonia-

rum

rum Regis filii reliquiis veneranda, cujus Beatissimi Principis venerabilis Icon, quæ prima inter ejusdem Basilicæ cimelia numeratur, duas dexteras manus lilia præferentes prodigiosè ostendit, quia unam dexteram informiter à Socio suo depictam dum corrigere & abolere, ejusq; loco aliam aptè & concinnè substituere voluit Pictor eruditus, nullo pacto efficere potuit, quin die insequente utraq; manus, & in utraq; liliis appareret. Sunt & aliæ Catholicorum Sacris dicatæ Basilicæ, cæteroquin nobiles illæ quidem; at Lutheranorum, Calvinistarum, Schismaticorum templis, Judæorumq; Synagogis commixtæ.

Totum hujus Urbis Territorium, Palatino Vilnensi, (qui & Magni Ducatus Lythuanicæ Generalissimus est) gubernandum subditur. Dignitatem hanc eo tempore obtinebat Excellentissimus Dominus Pacz, familiæ orbi notæ insigne decus: duos adhuc numerabat fratres, quorum unus demortuâ Uxore suâ, Episcopus dein Vilnensis creatus est; alter Cancellarii in eodem magno Ducatu dignitate gaudebat.

Accidit, ut eo planè tempore (quem hodie Beatissimum veneramus) ad Ecclesiæ clavum delectum esse, fama tulerit Innocentium XI. Multa hic Urbis Antistitem cura tenuit, Romano-Catholico Capiti applaudendi. Fecit itaq; in propatulo Urbis loco obeliscum Romanis quàm simillimum, in sublime porrigi, ac desuper Neo-Papæ beatissimum nomen succensis Pyrobolis illustrari, festivum sonantibus tubarum tympanorumq; applausibus, succensis quoq; vice ternâ buccinis, seu grandioribus fistulis æreis.

Exspirantibus, quorum gratiâ Vilnam adiimus, Comitibus privatis, ad universalia totiûs Regno communia, reliquos inter Senatores Illustrissimum meum venire jussit Respublica, atq; ita Warszawiam rursum sumus regressi. Alta jam aderat hyems, quæ, qui trajiciendi fuerant constrinxit fluvios, ut absq; offendiculo tutis nobis datum sit capturn iter remetiri. Seipsam admirari visa est Waravia, quando adventus nostri insignem comitatum & Magnificum Senatorum chorum, inq; equis subsultantem innumeram propè Polonæ Nobilitatis Catervam, & spectavit, & honoravit. Suum hic habuere theatrum Gloriæ, Palatini, tam singulari in se suisq;

fuisq; vestium splendore, quam in Ministrorum copia ad invidiam æmulantes, quo feriis singulis, ordine ad regias ædes progrediebantur, ut partim subsequa, partim currum ambiens ministrorum, armatorumque aut Dragonerorum, aut Patrio more Haidonum turba, eam prætulerit faciem, quam ne zoilus quidem carpere attentârit. Deducebatur in locum Comitiorum à Regni Primatibus quam honorificentissimè curru auro, argentoq; ac arte supra æstimationem magnificentissimo, sua Majestas Rex Poloniae, qui ubi solum Regium implevit, laique pro sua singulari dignitate confederunt, tunc demum negotia publica excutiebantur eo successu, ut nunquam sine clamoris altercationibus discederetur. Hinc quæ decimâ quartâ Januarii capere comitia, ad solennes usq; Paschæ ferias, sunt protelata. Neq; ea temporis protracti mora scisis incontraria studia confessibus imposuisset finem, nisi Regis Providentia, Diebus noctibusq; binis, eodem atrio inclusos Regni Arbitros, ad conficienda, quæ supererant omnia, insolito eo perurgendi modo cœgisset.

Ad quoq; obtinet in Polonia, Comitiorum usus, ut dum Regni Senatores, & Proceres, verbis digladiantur in Regia curia, famulorum interim amatorum cohortes, in subjecta area inconditos inter tumultus, & clamores, arma exerant, præsertim vino cremato succensi, ut raro sine cædibus, rarius à vulneribus genarum (ad dissectionem enim genarum potissimum collinat framearum dexteritas) & à sanguinis profusione finiantur.

CAPUT III.

Impeditum iter in Turciam.


TAndem ergo post per tractata negotia finitaq; Comitiorum dissidia, eam, quæ in subjectas Regno ditiones ferenda est, sententiam, quantocyus ad easdem deferri, tum etiam opatum congressuum finem circumscitis nuntiari Monarchis iussit Respublica. Denominatus itaq; est, ad eam, quæ primo honoranda erat, sedem Apostolicam, Ablegatus, simul, & ad Augustis-

simum

sum Romanorum Imperatorem, Celsissimus Princeps Radzivil. Ad Potentem Turcarum Tyrannum Excellentissimus Palatinus Chelmenfis. Ad Magnum Czar in Moscovia, Celsissimus Princeps Michaël Czartorysky, Palatinus Wolhiniæ. Ego cum tot tantasq; Legationes à Republica Polona, ad exterarum nationes expediendas percepissem, mea quoq; hinc proficiscendi cupido, ulterius iter amplecti, terrasq; remotiores invisere accensa est. Qua propter Aulae Excellentissimi Palatini Chelmenfis Legati in Turciam, innotescere attentavi, cum quo Turcicas, sanè animo meo exoptabiles perlustrâssem Provincias, nisi mihi mox enarranda infortunii quædam adversitas paucis ante Legati abitum diebus, evenisset. Etenim Illustrissimi Sappiæ Thesaurarii Magni Ducatus Lythuanicæ, aula tunc temporis in præurbio Cracoviensi habitantis, Ministri, nescio quo fato absq; omni eis data iræ causa, obvium me frameis invasere, quibus equidem sat tremulum gladium in defensionem meam opposui, ast videns majorem contra me framearum numerum vibrari, ad salvandam vitam in cujusdam Sartoris Poloni domum insilivi. Attamen insequentes me irati & hanc domum invadere, fenestrasq; disjicere cœperunt. Ferrea quidem infenestris cratis insultum furentium prohibens, exoptato munimento mihi fuit; ast nec tamen hinc securus fui: per ipsas enim crates adeo me lapidibus obruerunt, ut cumulus lapidum ad medium usq; corpus meum accreverit; ubi toto corpore concussus, interspem & metum positus, nec sensi ex ictibus dolorem. Interea ubi jam de vita mea desperavi, uno lapide grandiori tactus sum, crescente calamitate, & tumultu illo unam ultra & dimidiam horam durante, etiam obviis in rixas semiscen-
tibus, missa est ad sedandum horum furorem Regia Guardia, & ecce utrinq; magna strages & plurium cædes ex eo oborta est. Nihilominus quodam muro, quo aliud ostium ad illud, in quo eram cubiculum, obstruebatur, perfracto, novo lapidum imbreme invaluerunt. Tactus in fronte, (cujus cicatricem ad mortem retinebo) corruui exanimis, Tum verò irruentes per illum, quo Cinctus fueram, cumulum lapideum me per capillos extraxerunt foras, ubi ad sensum redii, vidi me ab uno raptari capillis per

B

totam




totam ibi aream, qui tamen (mirum!) altera manu evaginata framea, me semiexanimem misertus, defendebat ab aliorum frameis, quamvis non potuerit, quin duo vulnera in capite, & unum in manu acceperim. Ipse tamen occasionem præbuit, ut in Ecclesiam Sancti Spiritus mœnibus adsitam, insilire potuerim, ubi etiam gratiarum actorias preces Deo ter optimo Maximo, Angeloq; Custodi persolvi, tumultu per plateas adhuc usq; ad decem circiter personarum occisionem perseverante. Ob hanc ergo concussionem tum lapidum, tum framearum, sex septimanarum spatio coactus sum, uno eodemq; in loco, ad recuperandam sanitatem requiescere. Quievit corpus, verum adhuc animus stimulabatur, & acceptis licet hisce Polonorum bellariis, plura experiri statuit optima occasione ulterius invitante; ita, ut jam cum Legato in Turciam, meum proficiscendi ardorem, in Moschovia refrigerandum decreverim. Quapropter prostratus adhuc, curavi eâ, quâ par erat, humanitate, & animi grati contestatione discedenti jam Excellentissimo Chelmenfi valedici, ac Anno Millesimo Sexcentesimo Septuagesimo septimo, die decimâ nonâ Maji Magnificæ Celsissimi Principis Czartoryski, Aulæ accessi, Camerarii munus ibidem obiturus.

C A P. IV.

Accessus ad Aulam Legati in Moschoviam.

Cum hoc Legato Principe Schedleum, quæ sedes ejus est, discessi: inde iterum cum eodem Principe ad quasdam Nuptias invitato, Warsaviam profectus, cum eodem etiam Schedleum redii per Lukow nonâ Julij.

Lukow civitas milliaribus à Warsavia quatuor sita, ligneis potissimum constat domibus. Hic & forum est & compita, & totam denique viciniam Lukovienfes Nobiles quia obsident, idcirco Polono Idiomate: Drobna Słachta Lukowska fœvit compellari. Hic festivis nos excipere ignibus videri poterant Judæi, (quorum inutile pondus, multam fori faciem gravat) quando casas suas, casu nescio quo igni succensas nobis incolisq; reliquis specta-



spectabiles fecere. Risum moverem, si vociferationum inconditos sonitus, illatâq; ibidem ab indignantibus Christianis verbera, quibus mulctati sunt, narrationi accenserem. Unum de perfidæ gentis in Provinciis hisce conditione memorandum, nimirum eos, pleraq; diversoria obtinere, ita ut, quâquâ pergendum erat, Caupones ubiq; invenerimus solos & meros Judæos.

Tredecim Milliarium exantlatis incommodis, in Levartow Civitatem Principis Wisznioveczky arci adsitam opatè appulimus. Hinc tribus duntaxat milliaribus Niemczepagum transundo, tandem Jacobovicium Villam Principis mei nacti sumus, unde Dominum nostrum devotionis causâ Lublinum comitati, mox rursus Jacobovicium, repetivimus.

Primis Provinciæ hujus Urbibus accenseri potest Lublinum, Urbs, mœnibus cincta, quæ etsi parva sit, muratis tamen suburbiorum à solis ferè merisq; Judæis habitatorum circulis coronata est undique; quorum alterum Cracoviensis alterum Warsaviensis nomen obtinuit, à via, ut opinor, ad præfatas Urbes ducente, derivatum. Ob decorem duplicem Urbs hæc commendanda est, magnificentiam nimirum ædium, & sumptuositatem Basilicarum quas inter primas obtinet præcella ornatissimaq; PP. Prædicatorum Basilica, cui splendorem præcipuum addit, non modica porrio de salutifera cruce Redemptoris nostri, quam è Schismaticorum Provinciis uspiam clam ablatam dum Cœnobita quispiam itidem Schismaticus, aliò asportaturus Lublinum transibat, sensit ita loco huic affixam, ut nullâ amplius humanâ vi amoveri potuerit; ita, ut hodiernum ingentem hunc salvifici ligni thesaurum ibidem possideant. Continuus deinde sacri hujus cimelii cultus, non indecorum erigi fecit sacellum, quod etiamnum hodie nunquam interruptæ deservit devotioni.

Lustratis itaq; iis, quæ lustranda id loci fama commendaverat, die Augusti mensis nonâ, iter Danischovium (prædium est Principis mei eo tempore heri) vertere jubemur. Eo intransitu Pietrovin, quæ ad Vistulam flumen sita est Civitas, contento cursu obtinuimus; ubi tempellum perelegans, Divo Stanislaò Sacrum, memoriam conservat ingentis illius miraculi, quo Sanctus

ille Episcopus, postquam à Boleslao Rege accusatus fuisset injustæ Villæ cujusdam possessionis, in suæ testimonium innocentiae, ibi hominem nobilem, triennio ante humatum Petrum Petrovin dictum, ad vitam revocavit, Regis Senatusq; conspectui stitit; qui dato publicè testimonio, possessionem illam quondam suam, esse legitimè S. Stanislao à se venditam, rursus ad sepulchrum rediit, secundò defunctus. Prodigium hoc, ne labili hominum evanesceret memoriâ, æterno marmori ibidem incisum legitur sequentibus.

Hic

triennis cadaveris ossa
Magni ad vocem sacerdotis
Naturâ orbéq; admirantibus
vivifica resurgunt.

Christiquæ Patrimonium mortuorum testimonio
vindicaretur.

Heus quis-quis es,
Qui facultates altarium Sacrilegè
rapis, detines, usurpas,
spectâ, redde, cave,

Per solito, ut par erat, religionis cultu in loco hoc sacro, trahendum flumen Vistulam suscepimus, tandemque Danischovio potiti, profectio huic terminum imposuimus.

Verum, quod exfortunato in propria adventu celebravere gaudium uterq; Princeps Coniunx, tristi de pestifera Warsaviæ contagione nuntio, minutum est, ut Celsissima coniunx amarum lacrimis visa sit testari metum, ne ea peste periret pretiosa soboles, domus Celsissimæ spes unica, Filius in ea Urbe educandus, amicorum curæ relictus. Induxit ergo in animum, rursus Warsaviam regredi, pauculis comitata, quos inter, & ego, penum dispensare iussus.

Die Augusti duodecimâ, navalem reditum orsi, primum Casimiriam (Urbs est muro lapideo circumdata ripæ Vistulæ adfluit, ubi ab appulsis mercibus telonium tribuere mos est) attigimus, nulli tamen exscendere permissum, ob eundem contagionis metum.

Prospeximus hinc à dextra fluminis parte Pulavii Castrum splendidum, & à circumjacentium horrore amœnitate delicio-

sum.

sum, quod unum ex primariis Celsissimi Principis Lubomirzski supremi Regni Marechalli possessionibus numeratur; tum verò hinc Tanzieza Civitas è lignis compacta; inde Gura itidem civitas, eaq; muralis, quæ ex eo, qui ripæ sublimis adstat, monte, latè patentem terræ, fluminisq; viciniam despicit, videndas sese præbuere. Atq; hinc tandem accepto tertio de loci salubritate testimonio calcare humum concessum, festâ luce Assumptionis Beatissimæ Virginis, ad eundem debitum hyperdulæ cultum persolvendum in Reformatorum Patrum Franciscanorum Basilica, ubi & Sancti Valeriani corpus, pretioso monumento reconditum, venerati sumus.

Mox resumpto navali itinere, post 24. miliaria, Warsaviam videre licuit, non adire; dum opportunè unus è servis ejus, quem ablaturi aderamus junioris Principis ex Urbe advolat: cum procul à periculo duobus inde miliaribus securum cum Nutricibus degere nunciat, simulq; ingentem à peste stragem intra Urbem enarrat, ut lacrymas commiseratæ Principi excusserit.

Mox sine ulla mora, statim Filii vestigia secuta est, relicto nobis severissimo, ne ullus navi egrederetur mandato: die sequenti cum Filio Casimiro redux, navim iussit trahi adverso flumine, donec die abhinc duodecimâ, quæ erat Sancto Bartholomæo sacra, Danischovium, ad Principem redivimus.

Hinc profundo jam Octobri, rursus Schedleciū per Lewartow, ac tum per flumen Wieprz moventes in Urbe Czemerniki à Kosacis vastata, ab opulento loci Toparcha, hospites gratissimi per humaniter recepti, lautè diem noctemq; transsegimus.

Castrum ibi relictum, quod ad hostium reprimendos furores exstructum & à late circumflua aqua, & à multiplici murorum corona, & à bellicis machinis copiosis, supra communem splendorem & morem instructissimum & munitissimum visa mihi est interior castri, eorumq; quibus recepti sumus cubilium facies, tantus enim aulæorum, picturarum, reliquorumque ornatum viscebatur apparatus, ut quantos reliquis in arcibus aulicos videre contigit splendores, in unam hanc collati esse omnes viderentur.

Cum die iter resumpimus, cremato prius pro more, refecti,

B 3

per

per rudera Civitatis, & Arcis Radezin, itidem à Kosacis relicta, profecti; in prægrandi Illustrissimi Domini Castellani Podlachiz villa, planè hospitaliter toto triduo habiti, tandem Schedleciurn nostrum pervenimus.

Aderat dies Memoriz defunctorum sacer, quo Princeps omnibus totius Civitatis pauperibus congregatis, præter elemosynam, etiam dedit epulum, cui ipsemet cum Celsissima Coniuge, ac Filio Casimiro, & Filia Sophia, humiliter inservivit.

Supervenit Regis Poloniz epistola, causam explicans tam diu dilata Legationis, nempe metum, ne Turca missum ad se Legatum Palatinum Chelmensem, captivum duceret, offensus hac ad Moschos Legatione: sed tamen alia postea in Festis Natalis Domini, Epistola Regia, iussit Legationem statim approperari.

CAPUT V.

Legationis Apparatus.

INterea, quæ ad procuranda in splendorem Legationis necessaria cum viginti circiter millibus florenorum Polonicorum, Wratislaviam Silesiorum ablegatus fuerat Dominus Obertinski Principis Thesaurarius, diebus hisce in columnis reversus est, cum plaustris vario panni genere, bene onustis, & cum altero splendidissime inaurato, altero itineri deservituro, curribus, & 8. ex Frisia coemptis caballis. Advocati Lublinò, imò undeq; & undeq; Sarcophores plurimi, vix sufficiebant omnibus etiam infimis Aulae assellis, præter 60. desultorios equites, vestiendis.

Post peractas à piissimo Principe, devotè cum tota Aula ferias Domini Natalitias, ad impetrandum à Deo felix iter, datum est 24. pauperibus prandium cum larga stipe: ac tum trahis, ob copiosas nives, omnia, etiam ipsi currus imposita, cum ecce tanto conatu se mihi, ne à Principe ad comitatum, ut pote alienigena, præ Polonis itineris illius avidissimis admitterer, opposuerunt plurimi, ut desperatum fuerit, nisi mihi benignissima, & ob nota sibi fidelia mea obsequia, faventissima Princeps, vehementibus meis precibus inclinata, potentissime intervenisset. Præpositus igitur

igitur sum curandæ per totum iter supellectili linear totius aulae dispensandæ: & sic post vale moestissimæ, ac lacrymis diffuenti Principi dictum, itineri se nobiscum dedit Celsissimus Legatus Princeps Michael Czartorysky, qui Majestatem Reipublicæ Polonæ, pro eo, ac par erat, tuturus, congruum tantæ Legationi assumpsit comitatum, quibus omnibus, etiam Ministrorum suorum servis, singulis Sabbatis stipendium ad victum, & ad pabulum pro equis comparandum persolvebat toto tempore. Omnium nomina, & munera, ut & ordinem, quantum memoriæ in hæsit adhuc, recenserebo.

Celsissimus Princeps Michael Czartorysky, Dux in Klewan, & cum illo Palatinus Wolinæ, eidem curru insidebat, Dominus Ferendini Doctor, Medicus Urbis Lublini, patriâ Florentinus, & corpori Principis curando, & animo interviz tædia relaxando adhuc locum assumptus. Reverendus Pater Thomas Schvan, Ordinis Prædicatorum, Aula Capellanus, curru & equis, vehabatur seorsim, famulumq; suum habuit.

Hunc sequebatur Dominus Kaznowski, Equitum Husarorum Capitaneus, leviori curru vectus, equis duobus, alios duos ad equitandum ponè ducentibus, famulis duobus.

Subsequa tunc progrediebatur Nobilitas Polona, (Towaristwo vocant) familiariter, & lautè à Principe haberi solita, etiam in eadem secum mensa.


Ex his Volones honorarii fuerunt.

Perillustris Dominus Oborski.	} Sex equis, tribusque famulis unius cuiusvis constabat comitatus.
Perillustris Dominus Olenski.	
Perillustris Dominus Tinicki.	
Nobilis Dominus Sokolovski.	
Nobilis Dominus Kobilinski.	

Husarorum Præfecti.

Nobilis Dominus Chrinicki.	} Cum equis & famulis quisq; pro statu suo.
Nobilis Dominus Menschinski.	
Nobilis Dominus Holub.	
Nobilis Dominus Savicz.	
Nobilis Dominus Portanti.	

Aulae



Aulæ Primarii Ministri.

*Perillustis D. Buinowuski, Vice-Palatinus aulæ Præfectus,
& Marschalcus, venerabilis à canitie, prudentiâ, & gravitate.*

Nobilis D. Gumowski, aulæ Secretarius.

Nob. D. Josephus Jaschilkowski, Stabuli
Præfectus.

Nob. D. Joannes Obertinski, Thesaurarius,
& Polonicorum Cubiculariorum Præ-
fectus.

Nob. Dominus Joannes Radzimin, Præte-
ctus Equis Honorariis.

Nob. D. Golinski, Culinæ Præfectus.

Omnes
cum equis
& famu-
lis pro
statu.

Ministri, Principis Ordinarii.

Nobilis D. Zbrozek

Nob. D. Olshevski.

Nob. D. Dombrovski.

Nob. D. Lupa.

Nob. D. Chachulski.

Nob. D. Sadovski.

Nob. D. Luskina.

Singuli cum
equis tribus
& famulo
uno.

Sequebar ego: Bernhardus Leopoldus Franciscus Tanner, Came-
rarius Principis Germanicus, mihiq; liberum datum, seu cur-
ru, seu parippo Principis vehi.

Cubicularii Poloni.

Nob. D. Alexander Koscinski, Scriba.

Nob. D. Czudenovicz, Taxator expensarum.

Nob. D. Schimanovski.

Nob. D. Zielinski.


Nob. D. Kaminski.

Nob. D. Nedzviecki.

Nob. D. Gnoinski.

Singuli
cum equis
duobus, &
famulo.

Reli-



Reliqui Ministri.

Karski

Drevinski.

Olenski Ephebus.

Simon Vielkovolski aulæ
obsonator.

Singuli uno
equo, conten-
ti absque fa-
mulo.

Mechanici.

Joannes Chirurgus.

Clemens Præfectus abaci.

Joannes Sartor.

Stanislaus Carpentarius.

Casimirus Pistor.

Unica præterea foemina Lotrix Uxor Aurigæ primarii.

His annexi Tubicines tres cum famulo.

Item Capitaneus cum Sexaginta Dragoneris.

Subsequi fuere currus quàm plurimi quibus suppellectilia & im-
pedimenta tanti comitatus aliaq; necessaria devehebantur.

Inter hos præbant currus duo novi (vulgo Carroza) sex
equis singuli tracti; quatuor deinceps currus (Polonicè Karavan,
Tevtonicè *Kistwagen* dicti:) sex itidem equis provecti; totidem
alii juncti fuere prægrandi currui vasa culinaria, cocòsq; defe-
renti; ejusdem fortis alteri minori equi duo.

Ac denique octo equi generosisimi ad manum ducti: octo
etiam alii, qui ex Frisia adducti fuere introitui in urbem servituri
absq; onere liberi omnes processere. Horum ductores simplicio-
ribus infidebant equis.

Curribus supra nominatis, præfuere custodiendis Haidones
duodecim, viribus validi; qui diu, noctuq; tum in itineris peri-
culis, tum in Moschoviâ ipsâ, nostri, nostrorumq; omnium curâ ex
officio susceptâ per paria mutuo alternantes egere vigiles, Primas
vigilias subiverunt Janusz cum Janczi, robustus ac procerus uter-
que; hinc currum, quo Princeps vehebatur custodiendum habe-
bant. Secundas Casimirs, & Holodevicz, hi meo adjuncti erant

C

muni

muner. Tertias Budzilo, & Olschanski potionis fratres dicti, quod potandi artem callerent optimè. Par Quartum Striga, & Procurat, quorum primus à nequitiarum, alter à jaculationis Dexteritate laudatus. Par Quintum, Janusz parvus, & Hubiczki, quorum probitas, quia perspecta erat in plurimis, ad abacum Principis admittebantur ad serviendum. Par Sextum Jakubek, & Janushek, quorum postremus, quia potando semper, serviendo parùm deditus, legatione redeunte ad confinia Lithwanix ab aula depulsus est. Reliqui constanti animo, fidei, ministerio Principem prosequiebantur omnes. Universum in ea Legatione, una cum illis, qui postea cum Excellentissimo D. Legato Lithwanix accessere, numerum mille quingentorum facile excessere.

CAPUT VI.

Iter Legationis usq; ad confinia Moschovix.

Composito ita ad proficiscendum ordine, post lautam in prandio refectioem, & mutuos valedictionis affectus, die Februarii undecimâ, Anno supra millesimum sexcentesium septuagesimò octavò, horâ post meridiem tertiâ, faventibus Superis, incepta est profectio Schedlerio, & quidem primo diè sine Principe proficiscentes Mordî Civitatem attigimus: Tempus vespertinæ refectiois aderat, excitatus fuit à coquo pro cœna, exiguus ignis, qui nobis tamen satis negotii facessivit, siquidem scintilla camini fuliginem aggressa, incendium minabatur. Nos alacriter currus, equos, nostrâq; omnia periculo subduximus. Interim Haido Casimirs intrepidæ mentis, Caminum ascendens, serpentem ignem in orificio suffocavit, & ita tabernam è periculo incinerationis liberavit. Nos refectiois immemores, quieti nos dedimus.

Die alterâ transivimus Lossice, civitatem exiguam, ubi jam schismatici Catholicis permixti. Duobus ab hinc milliaribus sub noctem tandem affectus nos est Princeps. Nives, quas copiosas eo tempore hyems sparferat, nòsq; ad conscendendas trahas induxerat, veniente hac nocte insperatâ temperiè, in aquas resolu-

ta sunt;

ta sunt; ut ob impenetrabiles viæ difficultates ad Kornica pagum rotas curribus ad pergendum aptius, applicare nos coegerint. Devenimus in Janovv Civitatem commodam, vallis sat amplis circummunitam, quamvis domibus, quæ meliores videbantur, plerumq; Judæi potiantur. Hinc adhuc lutosissimâ viâ transeuntes Malova hora, tandem sub vespere appulimus Brzisc Litovski, emensis jam sedecim milliaribus.

Hæc Civitas à luto maximè memoranda, & ab immunda Judæorum fæce, ut ob eorundem copiam Stolica Zidowfca, quasi Colonia Judaica fuerit appellari, Perfidis his accedunt Schismatici, quorum complura hæc templa, domusq; mediocres. Hospitium Principe dignum ad invenire non potuimus, nisi Societatis Jesu Collegium, ubi nos 14. & 15. Februarii, summâ humanitate tractarunt. Iter resumitur Princeps, cum aurigas, Haidones, aliòsq; è turba militum mulso, & cremato per popinas confectos, cerneret, ut vix equis, & curribus essent regendis, graviter stomachatus, jussit aliquos eorum non leviter vapulare.

Hospitium eâ nocte præbuit Bratilow pagus. Inde jam ferè apud Judæos hospites divertendum erat, quia Domini Cauponas Polonis nolunt concedere, propter mulsi crematiq; cum tali Caupone Sympathiam, ac inde procedentem cum computo Domini faciendo antipathiam, cum Judæos possint ad rationes reddendas severè cogere. Inter hujus ergo gentis domesticos fætores, sordèsq; Judæis innatas, & prandendum & cum exigua quiete dormiendum erat.

Prusiana Civitas sub meridiem nos accepit, & postea quia in villa ad multam commoditatem instructa recepti fuimus, quæ totâ illa 18. Februarii die tenuit, ubi copiosior jam erat numerus Schismaticorum, qui multorum opinione Curatorum negligentia multiplicantur.

Februarii decimâ nonâ Selce civitatem attigimus, amplam, sed ligneam Judæis incolis refertissimam, ubi & unum Lutheranorum fanum. Ubiq; grati hospites eramus; quamcunq; enim Civitatem transivimus, omnes, præsertim Judæi, necessaria, & comoda viæ, alii cervisiam, alii mulsum, crematum, carnesve

C 1

alii,

alii, etiam pro jumentis necessaria suppeditarunt. Hic verò (in Selce) urnam duplo Boëmicâ majorem cerevisiæ, coloris nigerrimi, saporis tamen boni, palatôq; gratisimi advexere.

Inde per milliaria quatuor in Lossosin per densas sylvas difficili per radices arborum viâ devecti, unde prandiô refecti in Ruzanam Civitatem Illustrissimi Leonis Sappiæ pervenimus 20. Februarii, ubi præ reliquis, ejusmodi Civitatibus, multæ domus lapideæ templumq; magnificum spectantur. Rursum hîc, qui nuper, nos exterruit casus: ob defectum namque caminorum pro Principis aula habiliū, frequenter sub atrii tecto ad instruendam cœnam ignem excitare coactus fuerat Culinæ Præfectus; & ecce rimulam scandulæ ad comburendum dispositæ insiliit simul ac corripuit scintilla, mox in tectum prorepens, eam excitavit flammam, quæ nisi permultitudinem aulicorum tacitè sopita fuisset, vicinam lignearum Casarum congeriem in cineres omnino redegisset. Mane per tria milliaria in Dzievienkovic oppidum delati, ibiq; prandio refecti, duobus rursus milliariibus emensis, in Klossovice noctem egimus 21. Februarii.

Et jam ea nancisci cœpimus hospitia, quæ speluncæ magis, quam domûs casæve faciem præ se ferebant; in quavis namq; domo unum cubiculum mirè depressum, ab eo, quem intra se habet, camino, & furno teterrimum, fenestris (foramina rectius dixeris) nec ad exponendum caput humanum satis amplis, obscurè lucidum, irrequeto insuper cimicum morsu, patientiæ prorsus infestissimum, diversorii nomine superbit.

Toleratis aliquot ejusmodi specubus in Ziurovice oppido, tantisper morari statuit Princeps Herus, ob miraculosam ibi Deiparæ Virginis Iconem, in Divi Nicolai apud Basilianos Monachos, unitos Catholicos venerandam; atq; persoluto cultu, transeuntes fluvium Scara in Zidlovic pago relaxationi fessarum ab itinere continuo virium plus aliquid temporis tribuendum duximus. Terminanda adhuc hoc die erant Bacchanalia, 22. Februarii; itaque pro coronide eorum, ut adhuc carnibus valediceremus, siquidem inopia earum insignis fuerat, emi jussit Celsissimus Princeps

noſter

noſter bosculum egregiæ pinguedinis, quem mox occidi, ac parti-ri curavit, addito non modico mulso, cremato, & advecto etiam à sesqui milliari vase cerevisiæ, ut nemo esset, qui potu aliquantum non immaduisset.

Venit cinerum dies, & viâ incommodâ rursus 23. Februarii, per densas sylvas usque in Polomko, Civitatem à Moscorum furore in rudera versam, (etiamsi millia Moscorum ad eam à paucis Polonis postrata memorentur) venimus.

Sacrâ Divi Matthiæ Apostoli die ad persolvendum Sancto honorem, in Miś, Civitatem, duabus abhinc milliariibus festinavimus, ibidemq; sacrificio mislæ adfuimus, ubi à Reverendissimorum Patrum Societatis JESU humanitate, hospitaliter excepti, liberali prandiô, & copioso mulso, cervisiâq; honorati fuimus. Usitatum habet Polonia, ut esurialibus diebus cibos oleo lini, butyri loco condiat; hoc enim verò stomacho meo peregrino alienum prorsus accidebat, unde more mihi patrio lacticiis, cautè, ne fervens polonorum Zelus scandali occasionem acciperet, ubi potui, vescebar. Hinc ad noctem progressi in Kroszin civitatem Principis Radziwil, cujus Palatium nos quoq; hospitio recepit. Superveniente aurorâ perreximus in Sniow' ubi cum nec prece, nec pretio quidquam adprandendum reperissemus, necessariò, pastis solummodo equis ad Neszwisz Principis Radzivil Civitatem. 25. Februarii properavimus. Est Urbecula illa (quod hic per quam rarum) utcunq; muro circumdata, amplitudine fori, curiæ, annexarumq; officinarum ordinato splendore illustris; ab arce, quæ tormentis munitur, vallisq; cingitur, insignis. Hanc itaq; post emensa è Schedlecio quinquaginta novem milliaria subeundo, nostra ad obsequia magnam civium benevolentiam agnoscentes, nobis, jumentisq; nostris quietis locum statuimus, ea etiam spe, quòd ibi reliqui Aulæ nostræ è Klevan in Wolhinia vocati, nobiscum se essent conjuncturi.

Die 27. Februarii ad Mislæ Sacrificium in RR. Patrum Societatis JESU Ecclesia audiendum convenimus, à quibus jussa Studioſa juventus, salutavit Principem Herum, cui postmodum ad

C 3

triclini-

triclinium deducto, quidam Magister extemperancâ oratione felicem adventum gratulatus est. Tum ad appositum in lagenis cum condimentis, saccharaceis (uti Polonis mos,) crematum invitatus est, quas & nos jucundè evacuare non cessavimus: Ecce tem adsunt, qui pro impedimentis in Klevan ablegati expectabantur, quorum adventus causa erat, ut sumpto adhuc prandio advenis illis militibus servisq; refocillatis, rursus die ipsissimo iter susceperimus.

Comitatae sunt nos inclinata jam die incolarum bene precantium voces: ac viâ commodâ, transito pago Seczelowa, in Rimosez pagum in monte situm, duobus milliariis ad pernottandum venimus 27. Februarii; atque hinc primo manè viâ nimium lutosâ per Gendrzeikow pagum, in Piasieczna Civitatem longè afflictissimam appulimus; Hic siquidem (quod in Polonia frequens est, ut prædonum, hujusque farinae hominum nequam clamoribus, hostisq; adventantis falsis nuntiis perterriti municipes, urbem deserant) omnes fugâ sibi, suisque consuluerunt, ut nè unus fuerit super. Igitur desertum Hospitium nostræ aulae accommodatius ingressi, planè ipsam Parochi peramplam Domum occupavimus, atque illa, quæ penus nostra nobiscum vecta suppeditavit, hilare prandium dederunt.

Et jam ad Niemem fluvium rapidissimum, ventum erat, quem glacies ad utramq; ripam relicto medio alveo tantum fluido tam solide adstrinxerat, ut trajectum quasi prohiberet; quem cum magno pararemus labore, ecce tibi Dominus Obertinski (qui totius viæ onera sibi commissâ habuerat) ruptâ sub se glacie in aquam, decidit, & nisi arcus, pharetrâq; sagittis plena ad femur alligata pendulum in glacie sustinuisset, submersionem vix evasisset. Compactis itaq; undecunq; congestis trabibus, magno cum periculo currus supra positos, tandem faultis conatibus trajecimus, & eo adhuc crepusculo duorum milliarium iter adusque Semeniovæ pagum, 28. Februarii expeditivimus.

Czilikov pagum ineunte die sequenti 2. milliariis attigimus, etiam illum, admodum supra narratum incolis vacuum; ibi

ibi in meridiè cibati, inde in Piatovsczina in monte sito pago, Schismaticis referto, excepti pessimè, sub Jove frigido ob loci angustias, somnum capere coacti, copiosâ insuper aspersi pruina 1. die Martii. Tum per Lossica pagum, tribus adhuc milliariis superatis, Minsk tandem attigimus. Hæc urbs est ampla, per montes & valles non modicè extensa, neq; à Moscovitarum furentium rabie immunis remansit, prope in rudera conversa; sed labentibus annis in meliorem reparata faciem, ita ut Monasteria, Dominicanorum, Reformatorum Sancti Francisci, PP. Societatis JESU Collegium fundamentis jam jactis, non medio crem denuo splendorem urbi polliceantur. Quin etiamnum Schismaticorum ædes non vulgares, quàm plurimæ (quia ab hoste Schismatico fortunæ eorum omnium mansere intactæ) decus addunt.

Post Schmaticos, numerus maximus est Judæorum cum suis synagogis; hi, quia ingentibus tributis, exactè semper allatis Magnatibus, inde sunt per utiles, libertate quoq; magnâ potiuntur. Princeps fori hujus decus, est Curia in medio sita, copiosis mercium ædibus circumfita. Urbis incolas, victus, & amictus, præsertim luxus foemineus, & ædes cæteris splendidiores picturis afforis ornatae, opulentos esse ostendunt. Dominum Urbs agnoscit Excellentissimum D. Joannem Casimirum Sappia, Palatinum Polocensem, magniq; Ducatus Lythuaniae tunc Legatum, cujus hospitium in monte situm, omnibusq; Aulae necessariis, ac commoditate refertissimum, ob ejusdem absentiam adire non licuit, sed in urbe ab incolis per humaniter accepti, copioso mulso, cervisia, reliquisq; incolarum muneribus recreati, ad quartam usq; Martii diem remansimus, ibi prandiò peracto inter bene precantes Civium voces, iter resumimus.

Brevissimo tempore quatuor milliaria planissimo tramite adusq; Horodiszcie Cauponam in medio sylvarum sitam à Judæo hospite sordidam absumimus. Interea Dragonerorum Capitaneus à copiosiore potu adhuc ferventior, dum procul remotus nostrum subsequeretur iter, cum associatis sibi rixatus est, & inter-

interponentem sese dissidentibus Chirurgum transfodit; ob quod factum, etsi Principis oculos subterfugere niteretur, nihilominus à submissis clam militibus captivari, incarcerationiq; iussus est. Læsus Chirurgus, in urbem Minsk ad recuperandam sanitatem remissus est.

Nos inpratis pernoctavimus quartâ die Martii; quintâ verò ejusdem mensis die in Smolevicz Civitatem devenimus, ubi finitò prandio reus Capitaneus, per sententiâ judicum rebus suis spoliatus, & ab Aula amandatus, trecentos ictus funibus inflictos, sustinuit. Ejus locum Signifer per totam Legationem substitutus obtinuit.

Quatuor hinc milliaribus ad pernoctandum in Boguslawpole profecti, radices arborum invenimus adhuc in foro eminentes, signum, non pridem ibi adhuc sylvam fuisse. Sexta Martii egredientibus evenit, ut equi onerato currui juncti unâ cum ponte decidui è funibus miserabiliter penduli hæserint, mirè cum suspensio illo luctantes, donec funibus præcisus decidui enatassent. Viarum curatores fustibus adaecti, pontem melius reparârunt.

Superatis deinde plurimis horrentibus sylvis, post tria milliaria Borysow Civitatem attigimus, ubi septimam, & octavam Martii diem quieti destinavimus. Civitas hæc à Moscovitis occupata & ab eis, dum teneretur, ad validum præparata fuit munimentum opportunitate Beresæ fluminis grandis, invitante, prout etiamnum conspicuæ murorum vallorumq; reliquæ loquuntur. Verùm paucò post elapso tempore, collecta Polonorum vis adeò vim repulit fortiter, ut violentos incolas feliciter urbe pulsos deleverit prope omnes. Magnam hinc per paludes circa Urbem diffusas, pontiumq; absurdas structuras, difficultatem sufferre debuimus, donec in Lossice oppidum tribus milliaribus, & hinc in Nacza oppidum flumini Nacza adsitum, Schismaticis refertissimum devenissemus, ubi, & 9. Martii pernoctavimus.

In Krubki duobus milliaribus inde oppido ligneis casis compacto, ad prandium suo hospite Judæo, devenimus, ubi butyro, ovissq; conditum panem à Judæo hospite, jejunii die sibi oblatum

Prin-

Princeps Polonus pie respuit, mihiq; extero eundem comedendum porrexit.

Duobus inde milliaribus Bobr à vicino fluvio sic dicta civitas (ubi 10 Martii pernoctavimus) unum nobis prædivitem viæ comitem Judæum addidit, qui toto hoc residuo in Moscoviam itinere libero nobiscum fruebatur transitu: atq; hinc per Pawlovice pagum, Tczeczczin villam Holevczin civitatem parvam, & à Moscis vastatam, jam jam, urbem Mohilow ingressuri, ut majori ingrederemur decore, in Knissice oppido noviter erecto moram gessimus, omnibusq; de comitatu nostro, in ordinem coactisturmis præcinente tubicine urbis portas subivimus.

Urbem hanc cum aliquo ante hac annorum tractu dominantes Mosci possedissent, Polonis cessere denuò per pacta Pacis integram, quæ pulchris, & per pluribus Ecclesiarum, ast solum Schismaticorum gaudet decoribus; Unicam Dominicanorum Capellam cum exiguo monasterio habent Catholici pauculi; insuper domibus miro quodam, & eleganti picturarum genere ornatis constat. Accedit adhuc munitionis series; valla enim in paucis hîc urbibus visa; ingens præterea terræ moles ad murorum instar congesta, urbem probè munitam faciunt.

Mulieres, in ampla, rotundaq; facie, pleræq; omnes virum præseferunt, imprimis verò mirabilis est earum amictus: Caput mitrâ cornutâ, insuper telâ longâ velatum tegunt; pelliceum uno ex humero pallii instar pendulum gestant; omnes insuper (quod ridiculum præ reliquis) grandioribus cinericei coloris ocreis indutæ.

Homines hîc perquam hospitales: octo diebus omnes nos apud se habitos omnibus, quæ victus exigit necessariis, eervisiâ, mulso, crematoq; vinò, insuper ad abundantiam suppeditatis, pastis quoq; liberaliter omnium equis, bene jusserunt habere. Hic nuncius attulit, Legatum alterum (qui erat pro Magno Ducatu Littvanix) viam tenere aliam: unde & nos 19. Martii post prandium superato Nieper flumine (aliàs Boristhenes dicto) in Starii-mohilov abivimus lento gradu, quem Excellentissimus

D

D. Pala-

D. Palatinus Polocensis Legatus alter assequi posset, progressi, post tria milliaria in Makarinci pago miserabili substitimus, 20. Martii. Frigore adhuc urgente iussit intra cubiculum, furnum calefieri Princeps, ex quo, cum nullum caminum ad fumi exitum habuisset, per apertas fenestras, & portam fumus exivit; talia cubilia eorum universim teterrima, tales delitiæ pernoctantibus nobis persæpe contigerant.

Vasilevicè oppidum est è miserrimis unum, ubi iterum duobus solum milliaribus emensis pransi sumus, & pernoctavimus 21. Martii. Hinc ad Bassa fluvium advecti, dum ligneum pontem superare nitimur, existente jam curru uno in medio pontis, adeò pons moveri cœpit, ut nisi, subsidio militum, lignis fufultus fuisset, submersionem vix evasissemus.

Transseuntibus duobus milliaribus in Hubarin oppidum exiguum transvectis, & pagum Zdaniowice transseuntibus itidem ex ponte in paludem, delapsos priores è trigis equos, salvare oportuit, funibus, quibus currus trahebatur abscisis. At ecce mox alter currus nos subsequens planè in paludem invertitur, atque ità his infortunis horæ aliquot insumptæ sunt, donec in Hubinow, pago vigesimâ tertiâ mensis Martii prandium, cœnamque & nocturnam quietem adepti fuisset.

In proximam tribus milliaribus distantem Civitatem nomine Horki culinæ currus præcesserant; ast ob vias hîc nimis incommodas in Germaki pago 24. Martii coacti pernoctare, demum post facilem per Holissâ, & Czernava duo flumina transitum, ex solitis lacunis, & luto eluctati primò in Horki Civitatem Illustrissimi Polutinski propriam, convenimus omnes, ibidemque Festum Beatissimæ virginis Annuntiatæ in Parochiali Ecclesiâ perquam lacera (quando interim ornatissima reliqua sunt Schismaticorum templa) solemnia pertractavimus. Hinc die sequenti missi sunt nuntii Smolenskum, qui Legatos fieri jam Moscoviæ propinquos nunciarent; nobis verò per duos omnino dies data sunt ab itinerum molestiis feriæ, donec rursus 27. Martii visâ, & relictâ in parte dextrâ Civitate Horki in Sokolow de-

venimus,

venimus, ubi purâ aquâ prandentes refecti, ad cœnam cerevisiam aliunde advectam bibimus, In ea via dum è monte quodam descenderemus, equi in uliginem inciderunt, ut currum illum appositis retro aliis equis difficillimè extraxerimus.

Post Sokolow statim montem prægrandem uliginosum conatu longè difficillimo superandum habuimus, ex quo difficilior descensus evenit, ubi aspectu quidem modica, at profunditate periculosa perlabitur aqua, perquam ponticulo exili, ut ibi assolet, dum primus rebus primariis oneratus currus tentaret transitum, omnibus sex equis jam in terram transgressis, prioribus rotis in medium pontis devectis, pons rumpi cepit tanto fragoris strepitu, ut equi eo territi, dum fugam tentant violento impetu adhuc feliciter currum unâ secum demersioni proximum, eriperint.

Hoc perfuncti periculo, rusticos ex Szavieva vicino pago Haidones verberibus, ad festinè reparandum adduxerunt pontem, quo peracto exagitatos plurimis adhuc viarum malis duobus milliaribus Piervvîzinoho pagus hospitio nos recepit 28. Martii ad fluvium Brzezam cujus ripam sinistram tenuimus, dextrâ jam Moscoviæ subjectâ. Itaque transitis Denisovko, Beresavvo, Cziskov, & Virisabi pagis, sat bonis, & ordinatis, in Kadzin Civitatem optatam devenimus.

Civitatis hujus Toparcha est Palatinus Trocki, cujus ibi palatium nobis inhabitandum obtigit, nosque hospites habuit ad usque Excellentissimi Palatini Polocki adventum, quem secundâ Aprilis magnifico cum comitatu advenam salutavimus. Cæterum urbs ista in Lythuanix terminis Moscoviæ centermina, non habet unde speciosè memoretur, meri namque Schismatici, & Judæi eam inhabitant (pauculos si excipias Orthodoxæ Religionis) neque ullis munita vallis, seu muris, Mercatores plerunque habet Judæos, malim dicere fraudulentos deceptores, exili namque pretio è vicina Moscovia coemptas pelles, (eo quo perfidæ genti huic consuetum est,) pretio carissimo in Poloniam venundant. Hic quoque negotiationis suæ ultimum habent terminum, siquidem nec pede quidem Moscoviam contingere eis licitum est.

D 2

Diem

Diem tertiam Aprilis, quæ Dominica Palmarum fuerat, solemnem fecere Legati, apparatu sub missa musico, ibi nondum hætenus sic viso, concurrentibus propterea ad spectaculum Schismaticis incolis omnibus. Inde collatis Symbolis, lautum, ac magnificum prandium instituerunt; quo finito antequam sol occideret ad confinia Moscoviæ adhuc attingenda iter suscepimus.

CAPUT VII.

Ingressus in Moschoviam per Smolensko.

BRzesa supra nominatus fluvius Urbem Kadzin alluit, qui Moscoviæ confinia cum Lythuania ab ultima Polonorum clade terminat. Quanquam Sigismundus gloriosus Poloniarum Rex, hinc triginta duobus milliariibus post Dorohobusz civitatem, confinia, profundè in Moscoviam locaverit; posterius tamen Mosci victores adhuc usq; fluviolum Brzesam terminos protulerunt. Trajecto itaq; hoc fluvio, primum jam in Moscoviam immisimus pedem valdè importunè, cum pluviam toto hoc die lutosam viam fecerit adeoq; inundavit fluvium alium Molocha accolis dictum, ut superato insuper montis cacumine lassis equis, inclinato jam die proficisci nihilominus coacti, post solem jam occiduum serò nimium Civitatem Suhovo adiverimus. Hic nova molestia: quia enim Adstes (Przistaw Rutheni dicunt) nondum aderat, sine cuius iussu nec pro nobis, nec pro tantopere defatigatis equis, quidquam pendere volebant, ideo tandem commiseratione jumentorum ducti, perfringere portas iussere Legati, fœnumq; & quidquid ejusmodi erat abripere, quod tamen, nè Moscoviæ adversus Legatos aliquam crearet querelam, renuentibus quamvis venditoribus, æquò pretiò remunerati sunt.

Quartâ die Aprilis infelicem, & prorsus abominabilem aggredi cœpimus viam, per densas, lacunis plenas sylvas, ad quas penetrandas plures sæpè equi currui adjungi debuerant. Ibi prior currus onerarius lacunæ propè immersus, cum eâ die extrahi

trahi non posset, nocte totâ inibi hæsit, reliquis interim in adfutum pagum devectis; donec manè utriusq; Legati Haidones, milites, cæteraq; turba excindendo sylvam ingenti labore (nonnullis quoq; è Moscis, quibus viarum reparatio incumbibat, adjuvantibus) hunc difficillimum transitum superâssent, post quem in Rihorko pago post duo milliaria conquievimus.

Advenit obviam nobis Adstes viginti munitus Strzelicis (sclopetarios dicimus) suoq; stipatus comitatu, qui ad salutandos Legatos, in Moscoviam advenas emissos submissâ capitis inflexione veneratus, in protectionem assumpsit. Cui Præcedentia viæ incommoda cum retulissemus, communia terræ huic esse asseveravit. Deinceps tamen hospitia, cæteraq; ad usum necessaria sedulò providit, vigiles insuper, quibus noctu tutiores redderemur, statuit. Progressi itaq; devenimus in Lubni, oppidum exiguum. Hoc ultimum erat, quod Smolenscum ingressuros transire oportuit. Hic igitur refecti prandiò, ordinem quò in Urbem ingrederemur, in papyrus conjecimus.

Die itaq; septimâ Aprilis, summo manè Lubni ante memoratum pagum egressi, præmisimus duos currus culinares, aliasq; permultas minores bigas, trigasq; quibus Legatorum, & aulicorum supellex devehebatur ad hospitium, & ab adjuncto nobis Adstite præparatum, ubi cubicula interim decoris tapetibus adornata, donec & nos tribus illis milliariibus superatis ad horam à meridie tertiam adventarem, ordine subiecto. Agmen duxere tubicines Germanico vestitu, auro splendide fimbriato induti, terni, adjuncto tympanotribâ alternatim concinentes. Illorum vestigiis insitebant cum suis Præfectis Dragoneri seu Desultorii armati, Excellentissimi Palatini Polocensis, rubrâ omnes veste, fimbriis & reliquo ad luxum decore, concolores. Post hos Nobilis D. Radzimin Stabuli Præfectus præcedebat, Turcicos Celissimi Principis equos tapete rubro turcici operis, à totidem rubra veste concoloribus equisonibus manuductos. Hinc à tergo parippi duodecim Excellentissimi Palatini, præcedente itidem ejus stabuli Præfecto Aulico, similiter panno rubro in limbum

candidum desinente instrati; Singuli etiam ab equisonibus singulis manucebantur. Hos proximè secuti ductoribus aurigis colore pariter rubro investitis, equi Frisones generosi octo, fulco colore & corporum vastitate spectabiles, currui Celsissimi Principis Moscuam ipsam invehendo destinati. Tum septem quoque spadicei coloris equi Excellentissimi Palatini omnes subsultabundi ductoribus pannò rubro vestitis, progressum fecere magnificentiorè. Equos, secutus est à fuscis sex equis vectus, Domini Legationis Secretarii currus. Huic proxima Rheda viatoria Celsissimis Principis, sex equis ruffis vecta, in qua Aulae Medicus Dominus Feredini, Capellanus item Principis P. Thomas Schvan, Prædicatorum Ordinis, ac duo Societatis JESU sacerdotes ab Excellentissimo Lithuaniae Legato adducti, deveci sunt.

Tum generosa Polona Nobilitas, è variis viæ comitibus Volonibus (quos honesta visendæ Moscoviæ ducebat, curiositas) ac aulae Ministris conflata, phalleratis, selectisq; equis insidens progrediebatur. Tertia dein Tubicines Polono more Magnificè amicti, alternatim currui Legatorum præcinebant, quem tamen, ut incommodis viarum serviretur inferioris notæ assumsissent, attamen decore omni insigneam equi sex Frisones colore varii, apparatu, non minùs argentò quàm sericò divite ornati aurigantib; rubro ad Polonam normam vestitis amictu, superbè protrahebant: Latera stipabant rubei itidem argentò, more eorum, copiosè inspersi Haidones duo; Currum verò occupabant Celsissimus Princeps Czartoryski Palatinus Volhinae, Poloniae Legatus, & Excellentissimus Palatinus Polocensis, Magni Ducatus Lithuaniae Legatus, Perillustri Dominus Komar Judex Orsanensis Legationis Secretarius, & Dominus Adstes Moscus nobis obviam missus.


A latere Principis duodeni Cubicularii (Polonicè Pokoiovi dicti) duodeni itidem à latere Palatini equitabant, rubeo omnes ornatu concolores; duo dein equi gradarii, singulorum Legatorum pretiosis ephippiis, atque ad omnem apparatus compositi, singuli post currum ducebantur; Tandem Aulicorum Volonumq;

numq; centum & quinquaginta Ministri: Sexageni item Principis Dragoneri amictu novo, armisq; donati, pompæ finem imposuerunt. Secuti sunt adhuc novem currus militares, quos Poloni Karavan, Germani *Müßwagen* dicunt: duo currus novi Magnifici, quibus Legati Moscuam, ingrederentur; & alii plures parvi currus. Procul à Civitate Smolensko excepturæ nos paratæ stabant Moscoviensium equitum duæ Turmæ, cum tubis plaudentibus & tympanis, quæ nos non ad Civitatem nec penes mœnia, verùm procul deviando in Præurbium deduxerunt.

In hoc præurbio dextrorsum, & sinistrorsum collocata stabant agmina Moscoviensium Sclopetariorum cum fistulis & duplo, quam nostratiâ majoribus tympanis. Nos atæriter quidem per medium eorum procedentes, magna tamen afficiebamur molestia ob lutosam viam, donec pontem per fluvium Nieper illis dictum, Latine Boristhenem superâssemus, quem hîc jam alterâ vice pertransivimus. Hinc sinistrorsum, ad plateam declinando, Comitante nos Nobilitate Moscoviensi, ibi festa Paschalia celebravimus.

Parum indultum nobis fuit Urbis perlustrare situm, & quæ visu digna viderentur, annotare, siquidem nec per jam dictum pontem spatium amplius concessum erat, tam munitionis providendæ quàm nos ipsos hinc periculum conjiciendi metu.

Hæc Civitas per valles montesq; exporrigitur, mœnibus novissimè extructis utcunq; firma; multis insuper munimentis præmunitur; lapideis verò domibus ubique fere in Moscovia caret, ligneis interim refertissima. Medio harum eminent mons præcelsus, quem planè eo tempore cum & fodientium & terram avelentium exerceri labore perspexissem, ad imabundus ex incolis, quidnam insolitus labor vellet, quævis, qui respondebant: in animo sibi esse memoratu dignissimum aliquid eo in loco erigere: quidnam verò illud foret, subicebant. Præurbia perquam spatiosa Urbi subiecta sunt, ubi multa vendentiū ementiumq; mercimonia, eaq; plerumq; à scyphis ligneis, lepidoeorum more tornatis, variis ollis, cæterisq; vilioribus mercibus laudata. Templis etiam ferè ligneis decorantur. Vi-




Viginti abhinc annis, quo adhuc tempore Poloniarum Rex Urbi dominabatur, Polonum quoque amictum tenuere Cives; verum jam magnum Moscoviæ Ducem dum agnoscunt Dominum, usum etiam Moscoviticæ vestis recepere omnes. Ridiculus præreliquis videbatur mulierum vestitus. Induuntur hæc, tegâ longâ flavi coloris, ex humeris in terram etiam manicis dependulis, nullo cingulo latera præcincta, capita quoque insoliti operis mitris tegunt; Virgines Capillis solum dependulis sericis floccis complicatis discernuntur. Viri capillos curtant, barbam plerumque rufam nunquam radunt; quos inter qui plures in manica plicas, suæ togæ gestat, reliquis honoratior, autoritatēque dignior agnoscitur.

Urbs hæc, ut nixus jam Schismaticorum, in omnibus à ritu Catholicorum recedit, ut nec in formanda cruce conveniant, quam à fronte ad pectoris imum, dein à dextra ad sinistram, contrario nobis ritu formant, cum profunda terram versus inclinatione.

Erat dies Aprilis decima, quâ Festa Paschalia secundum novum ritum nobis, secundum antiquum verò illis peragenda, eadem die annò istò occidere. Hic spectare licuit celebrationis morem illorum; Obviantes enim, nullâ sexûs, aut statûs ratione habitâ, se se osculantur, rubrumque ovum ad morem nobis familiarem, sibi invicem donantes cum demissâ capitis inclinatione inquirunt: Kristos Voskres (quasi Bohemicè diceret: Kristus vos resurrexit: id est Christus resurrexit) cui gratias referens salutatus assumpto ovo: Voistin Voskres (giftu vos resurrexit) reponit, redditque basium; quod non parvæ nobis admirationi evenit, cum per omnes plateas & vicos turmatim sibi obviantibus id evenire conspexissemus.

Nobis ritu patrio solenniter cum tubis & tympanis Pascha celebratum est: ubi insolitum maximè visum incultis spectatori-
bus, quod è chartis signis musicalibus notatis, tam dulces moduli, & gratisimi auribus vocum concentus elicerentur: quo factum, ut adstarent apertis buccis attoniti omnes, quomodo præ-

ces



ces in DEUM dici possint à nobis eo tempore, quo tam jucunda auribus seu voce, seu instrumentis musicalibus canerentur, quæ ipsis magis ad saltandum videbantur animum excitare.

Frequens incolarum ad aulam nostram erat concursus, ob cultiorem nostratum in conversando modum; quando vicissim stupori illi nobis erant, quod barbarorum omnino agendi modum in omnibus actionibus suis patefacerent. Hinc universim se, & alienos sine respectu tuisant. Attamen ob magnam sui Czar æstimationem, nè aliquam causâ nostri apud eum incurrerent disgratiam, indies Aulæ nostræ panes, carnes, altilia, mulsum, cerevisiam, crematum, & reliquas victûs suppetias magno numero submisserant. Longum nobis visum est præstolari hîc novum è Moscua Adstitem: igitur persuadentes Legati præsentî Adstitem nobis in via occurrurum, effecerunt, ut nos paucis post diebus expediverint. Hîc jam per montes & valles planè barbaram aggressi viam, plus per horam molestiæ, quàm in Polonia sensimus per diem.

Die Decima quarta Aprilis, quâ præmissis lautis, & à tubarum tympanorumque sonitu solemnibus epulis, in ulteriorem Moscoviam, comitante itidem aliquâ Nobilitate incolarum, reasumpta est profectio.

Solemnem omninò fecere Urbis Primores hunc egressum, moniti à magno Duce, Legatorumque præstantiâ ducti, & inter fistularum tympanorumque applausum nos ex Urbe comitatisunt. Præterea rucolas quingentos (qui ad gentis morem Poduodæ vocantur & à singulis carrus unus, jumento uno, provehitur) ad impedimenta Legatorum facilius devehenda procurarunt: Atque ut à periculis iter nostrum tutius redderetur, ille Adstes, cui onus totum Legationis deducendæ impositum erat, suis se quoque militibus munivit.

CAPUT VIII.

Iter ex Smolenski in interiora Moscoviæ.

Progredi itaque per montium ardua, iter non sine per magnis molestiis & laboribus peregrimus, ut superato nobis ante hac non viso tanto luto, per milliaria duo serò nimis Volczinîc

E

exilem

exilem pagum pertigerimus; Ea verò pagi angustia fuerat, ut, cum capere nos non posset omnes, ad maiorem miseriam nostram, sub nudo Jove in adsito prato, excitatis circum quaque ignibus copiosis, adversus Septentrionalium ventorum turbines, noctem prope insomnem ducere coacti simus.

Hinc post confectum trium milliarium iter, in Chmosci Civitate exigua, prandiò refecti, & quia immensa equorum fatigatio quietem suadebat, nocte quoque inter molestos cimicum morsus, & continuos è furnis fumos, die decimâ quintâ Aprilis partem aliquam quietis cepimus. Furnos etenim intra cubicula, quadrantem eorundem ferè occupantes, ea ex parte collocant, quam nos cubiculi primariam hospitalitatis causâ pro excipiendo hospite æstimamus; è contrario hospitum locus est ad portam, ubi nos fornaces locare suevimus. Nec hæ nos avertere poterant miseriæ à pernoctatione, propter ingens adhuc frigus, etiamsi insuper ibi graves perpeffi simus morsus, quos patienter sustulimus: signis tamen in corpore sequenti die apparentibus.

Quinque deinceps confectis milliariis, transeundo Biala-cerkev oppidum. & pontem, quem vivum nominant (ille est è finibus pendulus, Vop flumini non modico impendens) in Vulfoug Slobodi oppidum magno cum solatio pervenimus: ibi, quia ferò prandimus, ideo & pernoctavimus 16. Aprilis. Ut autem pacifica à morsibus nocturnis nox mihi eveniret, me Domino Ká-novsky Capitaneo Huslarorum ad pernoctandum associavi, sed is interea crematò liberaliori ità nos unà secum affecit, ut nemo omnium fuerit, quem non copiosior haustus sopivisset. Atque inde accidit, ut jam non satis mentis compotes, profundiori somno capti, animalculorum, quibus in Patriis nostris vix simile quid conspicitur, morsus absque animadversione benè perpeffi simus: ubi in vigilia matutina iter parantes indecoras satis in vultu, manibusque notas non sine dolore obpruritus alter alteri visendas præbebamus. Quâ causâ datâ, cum quævissemus ex hospite, quodnam id seu pulicum, seu cimicum genus esset? quod similia morsuum suorum signa relinqueret; reponebat, esse animalcula, il-

laque

laque in rimis lignorum latitare, Karakan dicta, incolis quidem nè minimum incommodum inferre, sed externos multum molestare.

Karacan.



Decimus septimus Aprilis dies, isque Dominicus illuxit, quo debitum devotionis nostræ pensum soluturi, in exili hoc nostro tuguriolo, missæ sacrificium persolvimus; cujus equidem multi Schismatici spectatores aderant, admirantes, quod sacrorum nostrorum ritum in tam abjecto loco, (ignorantes nobis non licere in illorum fanis sacrificare) celebraremus.

Vognovszisna pagus inter ampliores numeratus occurrit; hic tribus milliariis confectis & meridiem & noctem agere decreveramus: absterrebat nos timor nocturnæ à Karakanis molestiæ. At hospes, quem lucri cupido tenebat, eâ usus est eloquentiâ, ut suo in hospitio ab omni malo nocturno, quietam & immunem noctem nos habituros persuaserit. Verùm malè esse voluit omnibus, cum aggregatis nocturnis ejusmodi incommodis, persentiremus contrarium, ita ut nox insomnis ferè tota, cum magna molestia, & contra hospitem blasphemia, transacta, è converso revolutio dici mirum in modum exoptata fuerit. Communis, eaque firma sententia contra ejusmodi deceptionem fuit, mendacem quoque hominem pœnâ congruâ munerari; sed extra Poloniæ limites nos positos, peregrinum solum prohibebat; attamen verbis acerrimis objurgatus luit; quanquam in jocum detorserit omnia, inquiens: nihil horum perpeti domesticos, forsitan in externos solos tantam effundi calamitatem.

Tria adhuc supererant milliaria conficienda, usque ad Doro-hobusz Civitatem, quò delati ad fluvium Nieper, qui præurbia

E 2

à Civi-

à Civitate fecernit, in uno itidem suburbii tractu, stationem per dies 4. quieti fiximus; nec hîc in Urbem ingredi licuit cuiquam, quæ per vetustis, iisque ligneis utcunque jam putridis, cincta est mœnibus; copiosas sed ligneas domos numerat, quantum in colle positas trans mœnia spectare licuit; inter quas mediam insuper schismaticorum Ecclesiam sitam conspexi.

Inundaverat hic fluvius Nieper adeò, ut per vicina prata effusus, non tantum flumini trajiciendo, sed & iisdem pratis navali opus fuerit subsidio.

Duo superaveramus milliaria, tertio jam Nieper (Boristhenem) flumen transuecti, equis liberè transnatis, in quo negotio solers Stabuli Præfectus, Dominus Jaschilkowsky, suo muneri satisfaciens & infilire volens in navim, pede aberrante, in aquam incidit, vix aliorum auxilio adjutus. Mlodzilo pagum, nocturnæ vacaturi quieti adepti 21. Aprilis fuimus; ineunte aurorâ egredientibus nobis, offert sese Schismaticorum monasterium non inelegans; quaterni hinc obviam prodeunt monachi, ritu Græci (Moskovitis Ezernici dicuntur, à nigro amictu, quem gerunt) & vultu & gestu, ipsis etiam verborum blanditiis, impertiendam nobis deferunt benedictionem, spe freti, eleemosynæ non nihil ærario accessurum. Verùm interpellari se non tulerunt Legati, & ideo omnigena in nos verborum jacula à repudiatis projecta, ea præsertim quibus Bisurman, hoc est, circumcisi ingeminabamur.

Inter prata camposque bona utcunque nobis evenerat via, per sylvas tamen valdè lutosa, insuper plurimos superare pontes accidit, donec per quatuor milliaria in Czobotowo (pagus vetustissimorum unus est) deventum, ibi pransum, atque ad beneplacitum Legatorum singulare, & cænatum, & pernoctatum. Rursum hic mentem subiit eorum, quæ Karakani dicuntur, animalculorum metus: Unde querulos timores apud paganos deposueramus singuli; at cum risu responsum accepimus: facili nimirum negotio ab eorum violentia liberandos nos, si circa cubilium angulos, frustra panis collocaverimus: quo consilio feliciter succedente, datum est nocturnâ tandem quiete potiri.

Me

Me primum expergisci fecit curiositas, videndi aliquem illum Karakanum, arreptoque pane animadverti, relicto cortice duro corrosus totum: tibi adhuc aliquot actu rodentes, ideòque retardatos, cepi, Collegisque meis spectandos dedi, in quibus illatas nobis injurias, uli sumus.

Sunt autem Karakani seu scarabæi, seu bruchi, animalcula tæda, & nigerrima, quæ ubi hominem odore perceperint, occultâ quadam viâ, atque vi in vestes sese insinuant, tantisque continuo conficiunt moribus, ut quem sopitum occupaverint, in vires omnes præ subiti doloris vehementia erectum, tanquam ab inimica manu pateretur aliquid, atque à se propulsaturus esset, è lecto exilire adigant, & (quod in subitis ejusmodi doloribus sæpe evenit) fallente pede in humum præcipitem agant.


Faventem noctem, non minus favens dies, utpote May mensis, jam præambula, subsecuta est; cum hilaritate confectum est milliæ, & jam fossa illa quadrata à fama notissima, quam Bellicofissimus Poloniarum Rex Sigismundus ditionum suarum limitem effici curaverat, noménque Polanouce indiderat, visébat.

Fossam via sequitur, quæ peregrinorum patientiam supra modum exercet quàm lacubus, uliginéq; profunda, tam malè fartis pontibus ex crassis rotundisq; trabibus compactis, prope impervia. Ideoque ex nimia currum concussione difficile omnino Principi Celsissimo evenit, per hujusmodi pontes, quorum quinque supra triginta numeravi, curru transire: idcirco se ab Heidonibus sellâ deferri jussérat: quem nos aulici ad discurrendum de tam miserabili itineris conditione, lubenti animo pedibus comitati circumdedimus, donec quinq; milliarium spatio, in Semlouo pagum tardè devenientes, inibi prandium corporaque summè lassâ, nox etiam quieta excepit die 23. Aprilis.

Incurrerat die orto sequente Festum Sancti Adalberti Solenne, Patroni magni Poloniæ, & Bohemiæ, cui imprimis consueti more nostro, honores sacros præstitimus. Hinc iteratò subeunda habuimus pontium incommoda, de quibus supra dictum est; hæc enim via tribus & quinquaginta pontibus insternitur, non-

E 3

nullis



nullis ad dimidium, duobus verò ad unum omnino milliare porrectis. Erat ex uno horum commune curribus periculum, qui flumini non exiguo instratus, onerarium unum Palatini currum non sufferens, ibat in ruinam, jamq; unum à curru equum priorem, aquis merferat; pluribus exitio futurus, nisi trabibus robustis præmaturè fuisset fultus; ubi equus scissis, quibus junctus erat, funibus, ad natandum liber factus, evasit.


Tandem igitur Viazmo, Urbem feliciter adepti, ad ordinationem Adstites per ampliores dispersi domos in præurbio (Urbem enim ingredi non licuit) nostræ ad quiescendum fixæ sunt stationes, quæ præter spem in longas (expectandus enim necessariò erat novus Adstes, qui legatorum curam & assumeret, & ad jussu Magni Ducis tutos in locum deduceret) protracta est moras.

CAPUT IX.

Iter ex Viazmo Moscuam.

URbs hæc trans fluvium, Viazma dictum, sita est, à quo & Urbi nomen dedere: supra hunc pons ligneus, solidus tamen incumbit, in cujus principio erectam habent tabernam (Kabak Mosci nominant) advenis hospitem. Urbs more solito ligneis mœnibus nonnullisq; turribus, & pergulis circumquaq; ex ligno item constructis circumsepitur; per hæc, quod in Urbe observandum esset, non nisi templa bina, & domos pro more ligneas conspici licuit. Ampla verò hic præurbia, ob mollitiem terræ, trabibus plerumq; rotundis ad ambulandum difficillimis instrata; per quæ nos Adstes noster circum Legatorum Domicilia locaverat. Hic demum bestiarum illarum copiam incredibilem, quasi eorum ibi esset patria, invenimus; quæ per parietes diffusa nigrore suo eos plane obumbrabant. Quapropter ne earum vexationi pateremur, atrium potius ad pernoctationem quietam elegimus, ad quam aëris temperies tunc ad votum quoq; favit. Templa ex lignis cum turriculis non ineleganter exstructa habent, penes quæ minora ex muris adstructa esse ad calefaciendum apta, quæ hveme sævientie frequentare solent, observavi.

Hoc



Hoc narratione dignum censui, quid in ipso Principis mei hospitio non longo ante tempore enixa infantem Materfamilias, illum, non suis Uteribus foverit, sed cunis impositum, & funibus quatuor è cubilis tholo pendulum, vaccino lacte, barbæ prorsus nutritur; ex illis quippe funibus à supremæ partis nodo funiculus pendulus cornu parvum sustentabat, ex quo infernè papilla Vaccæ prominebat: in hoc cornu tepesfactum infuderat vaccinum lac, quod per foramen infernè se papillæ illi insinuat, & hanc papillam longi jam temporis usu nigram gravissimè fœtidam & semiputridam ori infantis imposuit Mater, cui & assuetus infans ipse os ultro applicabat, & sùgebat affusum, si deficeret, crebriùs in die lac tepidum vaccinum. Ita ergo fugentem nutriebat. Ad nostram indignationem, præsertim, quòd papilla longo jam tempore ad usum pendula, odorem gravissimum produxerit: neque post objurgationes, feritatisq; exaggerationes nostras aliud Mater reposuit, quàm unum illud: sic solemus.

Illud insuper moris habent, quòd si eam jam proles adepta sit ætatem, ut humi pedes figere, & sinè nutricis adminiculo gradi possit, nolas aliquot Mater collo infantis appendat, eo fine, ut si quis error infantem domo abduceret, nolarum sonus errantem proderet; ad eum planè modum, quo, si quæ ex armento pecus deviare, tinniens aliquid collo ejus appendere solemus. Hos recens ambulones nolos, patrio vocabulo Hribienka vocant; Bohemicè Hrzibotka, Latine: hinnulos diceremus.

Expedit Nuntium cum Catalogo omnium personarum nostrarum, Moscuam versus Adstes, qui, quia retardatus, factum est, ut per dies aliquot hic morari oportuerit; donec à magno Czar Legatis obviam missus Adstes novus Strabcz nominatus, tandem advenisset, superbo amictu, barbâ longâ insignis, qui suscipiens Legatos, examinavit Catalogum omnium unà pergentium; an numerus personarum ei re ita corresponderet, remisitque priorem Adstitem in Smolensko, quem redncem munificentia Principis mei in gratiarum vicem, frameâ deauratâ donaverat.

A novo hoc Adstite fallendi temporis gratiâ, obtentâ in cam-

pos

pos excurrendi veniâ in quoddam pervetustum Palatium amplum quartâ milliarium parte ab Urbe diffitum curribus exiûere Legati. Hoc Patriæ more ligneum totum, in monte alto situm, nobis pervidendi data est facultas. Narrabant autem, cùm olim lues pestifera Moscuam depasta fuisset, huc velut in asylum, Magni Ducis Conjugem confugisse, in eoq; loco, vitam etiam terminâsse & sepultam esse. Quo factum, ut in diem usq; hodiernam, locum illum nemo Moscorum ingredi præsumat, in Dominæ suæ venerationem; tantâ est gentis in Duces reverentia!

Expectandum adhuc habuimus à Duce responsum de tempore, quo nobis discedendum esset, donec demum quartâ Maji die nobis abeundum esse nuntium attulisset Adstes, unde nos ab illo alimentis probè refecti, iter feliciter auspicati sumus.

Profecti itaq; sumus juxta Urbis mœnia ab Adstite ducti, effuso toti populo spectaculum quasi facti, ubi communis secutus nos est benè precantium clamor. Non procul hinc deveci, horrentibus rursum sylvis, uliginosis paludibus lacerisq; pontibus committimur. Superatis demum viâ pessimâ usq; ad Solis occasum milliariibus duobus, in sylvarum medio, collatis ad construenda tuguriola arbustis, prati planitiem nobis vendicavimus, humi exanantes, humi quoq; somnum capeffentes; Legati sua sub tentoria se se recepère. Hinc enim usq; in Mosaisco per milliaria 22. non nisi unum oppidum, unusq; pagus interjacet.

Provocaverant nos prima hâc pernoctatione Mosci ad lætitiâ, exonerationibus sclopetorum suorum per sylvas Echo edentibus; quibus proritati Poloni, mediam ultra noctem inter bombardarum quoq; explosiones, liberalesq; potûs æmulationes morabantur, atq; itâ, quantumvis à potibus gravia, & somni defectu invalida fuerint corpora, nihilominus die sequenti, quina ad meridiem usq; milliaria perfecimus; & quia hujus itineris tractu, nullam attigimus tabernam ad sumendum prandium; ea quæ culina nostra secum deportaverat, in amæno loco, ubi Haidones ad formam mensæ terram effodère, prandii loco consumpsimus.

Continuatum est milliaria adhuc per tria iter, donec Czars-kezaimoscie

kezaimoscie pertigissemus. Civitas est post incendia, quibus in Pagum propè abiit, iterum erecta; medio in foro habet Ecclesiâ, & unam popinam. Hic peracta est nox quinta Maji. Prandio adhuc refecti hic 6. Maji, quia bonam adepti viam, quinque adhuc ad noctem milliaria confecimus, atque peramænum pratum rursus hospitii vicem subivit, quod Mosci Kameniwrab nominant. Ea verò prati servata est distributio, ut pars amænior pro Celsissimo Principe, secunda pro Excellentissimo Palatino, tertia pro Legationis Secretario, quarta demum pro Adstite (singulis singulæ annexæ aulæ) eligeretur; neque longe abfuere Dragoneri utriusque Legati, qui ad omnium corpora custodienda constituti sunt. Ab omnibus, quibus placitum est, excitati sunt copiosi ignes, ad quos ut nox eò hilarior transiret, musica quoque sonabat.

Et jam orto die denique per sylvas & pontes, post milliaria 4. aliud rursum pratum se obtulit, Ostrovik ab indigenis dictum, rivo pellucido deliciosum, ubi Adstes cum Legatis prandens, protrahendo moras persuasit, ut hic & pernoctaretur. Inter tonitruum fulminumque terrores, hæc tota nox abivit, unde nostrum nè unus, nisi madidissimus, manè surrexit. Lutosâ post hæc, & admodum humida via supererat per milliaria tria, serenato tamen aliquantùm meridie, Gelnam, quæ villa supra montem posita est, appulimus. Hic sumptò prandiò iterum per tria milliaria Urbem Mosaisco attigimus, à qua rursum exclusi, præurbia occupavimus.

Urbs supra montem mænibus lapideis quidem, sed ob vetustatem, undique disruptis cincta, præurbia copiosis mercatorum tabernis habet instructa. Populus est, qui ut bibat, vivit, unde binæ eis popinæ, quas, ut supra memoravi, Kabak nominant, quæ helluonibus plenæ semper conspiciebantur, cùm alioquin ad singulas urbes unica solum taberna esse soleat. Plebs hæc leporinæ Generositatis, ut vel ad unum minacem vultum exhorrescat: cæterum omnis humanitatis expers omnino. Aliquot denuò diebus hic morari contigit, resolutionem Magni Ducis præstolando, donec

nec 12 Maji prandio solemni reſecti, ob imminentem fatigationum noſtrarum terminum, lætiori animo nos viæ commiſimus.

Viaſt Moſcis milliare dicitur, qualia quatuor, noſtrorum unum milliare conſciunt. Per duodecim ergo Viaſt, ſeu noſtra tria miliaria Moſaiſco, amænium, ſeſe nobis pratum denuò obtulit ad quieſcendum, in quo nobis tuguriola ex virgultis; illi Schalaſch nominârunt, ad ſomnum commodiùs capeſſendum ereximus. Adveniente matutino tempore, pergendo aliquot Viaſt per Scholkovka (ſunt in ſylvarum medio caſæ aliquot) & per Wczaffowna (tria itidem tuguria ſic nominata) Kubinſko quinſ miliaribus noſtris ſuperatis Oppidum ſubire datum eſt, ubi die illo, nocteque tranſactâ, ineunte die poſtero, poſt permeatum Tatarka fluvium exiguum, tribus conſectis miliaribus ad Juniperetum longè amœniſſimum allapſi, ibi Sacris à Legatorum Sacerdotibus intra Tabernaculum peractis, prandio humoque deinde recreati, melioris jam hinc viæ ſpe confortabamur.

Aſſumpto itinere dimidio milliari diſſitum Viazoma monaſterium pervetuſtum, muro lapideo cinctum piscina grandi circumſeptum, ponte inſuper aquis impoſito itidem lapideo ornatum, ſuſpiciendum tranſeundumque ſeſe nobis obtulit.

Poſt quatuor deinceps reliqua miliaria, planâ omnino viâ, jucundisque reſerta viridariis, ac magnificis undique inſtructa palatiis, & Eccleſiis, quæ per longam, quâ patebat viciniam ſpectabantur decimâ quarta Maji, in Mamonow pagi tuguriis quies obtigit, ubi & Princeps à Rege Poloniæ literas accepit, Moſcho Equite afferente, ex quibus unus perpetuò Moſcuâ in Smolenſko, alter ex Smolenſko in Moſcuam pergebat, itâ ut ſemper alternis ſeptimanis literas daremus & acciperemus. Hæc viarum planities, amœnus loci ſitus, & frequens aularum ſtructura, ſuſpicionem nobis fecit non longè abeſſe Moſcuam.

Quo commodior accideret Urbem Moſcuam introitus, hîc ad quindecim Viaſt, deviando à recta viâ in Oſtroginoſt, Oppidum, univerſam Legationem deduxerat Adſtes, ubi acto meridie, poſt milliare Moſcua flumen, quod Urbem influit, trajiciendum

dum viam diſſecuit; quo ſuperato magnum adhuc pagum Szukieno tranſeundum habuimus; hinc per duo miliaria ad eam quam ad Legatorum commodum, & ad Urbis Moſcuæ jaçtantiam (nam inde turres deauratæ, Palatia, magnificaque reliqua viſebantur) Magni Czari Prædeceſſores, aulam ligneam olim jam erigi fecerant, Legatos totamque unâ ſimul concomitantium turbam, deduxerunt. Unde quia uno & dimidio milliari duntaxat diſtabat Moſcua, ad quam per tot diſcrimina rerum tendimus, liquidum omnibus ſolatium, atque adeò & jocorum hilaritas excitata, & eorum; quæ hætenus perpetienda fuerant, memoria ex animis omnium deleta eſt.

CAPUT X.

Ingreſſus magnificus Moſcuam.

Duos habuere dies Legati, 15. & 16. Maji, quibus introitus in Urbem pararetur. Jamque currus apparabantur, equi omnes, præſertim verò Friſones, depẽctebantur, utque decenter exornati & non ſinè lege graderentur (nam in iis major reſoſita erat magnificentiæ ſpes) ſæpius per Aulæ aream exercitii gratia ducebantur. Miniſtri cæterique Comites de veſtium ſplendore curis agebantur, ipſi denique Legati ad Majeſtatem omnem componebantur. Dum ad ſplendorem ſummum parata eſſent omnia, advenerunt duo Equitantes, ex iis, qui inter Primores Moſcos cenſebantur, numeroſo ſtipati comitatu, Legatiſque veniam à Mâgno Czar Urbem ingrediendi detulere. Progreſſum ergo eſt in magnam illam Moſcoviæ Metropolim, (Stolicza, id eſt Sedes patrio vocabulo nominatam) die 17. Maji, ad horam antemeridianam decimam, coram inundante ſpectatorum multitudine, ordine ſequenti.

Primò carros facilè quingentos, qui in Moſaiſco Urbe ad devehenda onera Legatorum, ſimul aſſumpti erant, uti & in aliis Civitatibus factum, præmiſerunt; hi igitur ciſtis, & vario impedimentorum genere onuſti, magno Legationis ordini fecere ini-

tium; modico ab his intervallo diffitæ in longum porrecto ordine sequebantur bigæ, trigæ, quadrigæ, & quos recensere longum foret, numerosi Nobilitatis currus. Lento dein pede quaterni currus culinæ impedimenta deferentes: currus item alii, quos Karavan supra nominavi, quatuor Celsissimi Principis flavo, quinque Excellentissimi Palatini Polocensis rubro panno instrati, aulæis, & reliquo seu ad vestium, seu ad cubilium splendorem ornatu pleni, sex equis vecti singuli processere. Hic jam terni tubicines annexo tympanotribâ Excellentissimi Palatini, Germanico amictu rubrô, aureis fimbreis multum inspersô, generosis insidentes equis altum intonebant, ducentes, sexaginta Dragonerorum æquæ rubrè vestitam cohortem, omnibus spectabilem. Subsequi procedebant Legatorum (Rhedas dicimus) viales currus duo, sex ad quemlibet junctis equis, uno, qui à Sacris fuerant Capellani, altero Medicus tuendæ valetudinis gratiâ assumptus (cui quia Germano more vestitus erat, ego simili quoque vestitu Polonos inter locum non reperiens, associatus) vehebantur. Tum Excellentissimi Palatini currus deauratus totus, sex Pantheræ instar coloratis equis, equili apparatu deaurato, sumptuosè ornatis, lemniscis sericeis rubris à vertice in longum defluentibus vectus, radiabat totus. Hos sequebantur Dominorum Legatorum Parippi octodecim, ad singularem pompam adhunc actum deducti, modo Persico Ephippiis, Saphyris, gemnisque pretiosè exornatis contexti, qui varia præstiterè saltuum spectacula, ut eorum quatuor postremi, quantumvis pedibus constricti funibus & insuper à duobus stabulariis ducti, maximam tamen generosi cuiusdam fastus, ac Majestatis, spectantibus omnibus ad admirationem prorsus exhibuerint indicia. His proxima centum facillè tum Comitum tum ministrorum turba sumptuosis vestibus induta, superbientibus equis inducta, progrediebatur. Demum longo ab his intervallo tres Polono more vestiti tubicines Legatorum adventum festino clangore nunciabant, longo spatio diffitum Legatorum currum præeuntes. Illo de vecti Legati.

Celsis-

Celsissimus Princeps Michaël Georgius, Dux in Kle-van, Czartoryski, Palatinus Volhinia, Wielisensis Capitaneus, Legatus Magnus Regni Poloniae.

Excellentissimus Dn. Dn. Joannes Casimirus Sappia, Palatinus Polocensis, Legatus Magni Ducatus Lithuaniae.

Per-Illustris Dominus Komar, Judex Orsanensis, Secretarius Legationis

Adstes Strabesi Moscus, qui deducendam Legationem habuit.

Erat currus iste Wratislaviâ Silcsiorum Metropoli, eum in finem (ut supra dictum est) Principis ære emptus: Holoferico rubro interius rubebat totus, aureis, argenteisque nodulis ad insolitum Moscis splendorem, circa tectum interius refertissimus, neque erat ferrum aliquod, quod non deauratum, pretii plurimum addidisset. Currum vexere equi Frisii sex, quibus equili apparatus æquæ deauratus erat, & in fronte plumarum albarum fasces tremuli. Hi eò gradiebantur fastu, ut magnificentia plurimum addiderint, ac præ generositate, hinnitus prominentes volasse quasi visi sunt. Principis latus Haidones duodecim, (quorum color vestium, coralliorum purpuram multo cum argento referebat) sex itidem alii veste concolores, secures, quas Poloni,



Obuch nominant, in humeris tenentes, Excellentissimi Palatini latus stipavere. Ad latera Legatorum item equitavere viginti quatuor Cubicularii, & equorum generositate, & coccineo vestium ornatu insignes. Horum terga sequebantur ter centeni facillè, variis addicti muneribus servi, novo vestitu spectabiles omnes; hos inscuta, quæ Celsissimi Principis corpori custodiendo fuerat armatorum, quos Dragoneros vocant, cohors, quæ magno Legationis ordini, finem imposuit.

F 3

Hunc

Hunc igitur ordinem ex ea, quam uno & dimidiò milliari dif-
sitam dixi Aula, in patentes campos egredientem, profusus popu-
lus ob insolitam hujus Legationis Majestatem attonitus spectavit
tantâ copiâ, ut ad progressum nostrum locus vix suffecerit. Fer-
tur interim nuntium, non properantum nobis, imò passu lentis-
simo procedendum, ne eorum, qui obviam procedere parabant
à Czaro submissi ex Urbe exitum præveniremus; lenté itaq; pro-
gressi omnes, donec paratis omnibus expectari Legatos, nuntii at-
tulerê.

Magnum omnes accendit desiderium Urbem, maximè ve-
rò ipsum Czar, ejusq; Residentiam visendi atque ira gestientibus
nobis, à longè jam sonorus tympanorum, tubarum, buccina-
rumq; strepitus ad attentionem omnium audiebatur; Tum spe-
ctandum præbuit sese florens exercitus bifariam à dextris & si-
nistris (Legatis per medium transeundum fuerat) divisus, multi-
vario colore distinctus, tubicinum, atq; tympanotribarum re-
fertissimus.


Militum Præfecti generosisimis equis Persicò modò pretio-
sissimè ephippiatis, insidentes, eâ vestium varietate, & ornatu com-
paruerant, ut mirâ inter se pulchritudine, majestatisq; splendore
concertaverint omnes: cumq; proximiores Urbi facti essemus,
ecce novam, ante hac non visam armatorum cohortem! Cujus
vestium rubrarum longè dependentium color, in omnibus unus
erat; candidis insidentes equis omnes, item alas humeris apposi-
tas & supra caput eminentes ac eleganter pictas gerentes, hastas
insuper longas & in earum cuspide deauratam affixam Draconis
volantis effigiem, ad venti flatum vertibilem tenentes spectavi-
mus. Hæc Angelicam quasi Turmam præferre videbatur.
Qui hoc tantæ elegantie spectaculum miratus non fuisset, næ il-
lum certè & in florido quodam viridario pulcherrima florum va-
rietate instructissimo & amœnissimo cæcutire omnino crederem.

Tres jam milliariis unius partes confeceramus, cum Cubicula-
rios Czari pretiosissimè indutos, gradariis ornatissimis volantes,
obvios haberemus. Quos ob nimium luxum, pulchritudinem,


ac

ad pag. 46.





ad pag. 47.



A



ac splendorem imaginatione sola perceptibilem, imo mearum non esse virium, ut ornatum hunc eorum, vestium varietatem, & reliquam pompæ totius superbiam, eò quo par esset modo, exponerem, confiteor: pro modulo, tamen meo, quæ attonitus inspe-
xi referam.

Tunicæ coccineæ corporis eleganter erant adaptatæ, & præter eas aliæ instar cujusdam dependuli pallii, collo alligatæ, stupendâ arte intertextæ sobollinis pellibus suffultæ, quas patrio nomine vocant Feresiæ; hæ singulæ ad pectus utrinque rosas maximis unionibus, auro & argento ditissimè ornatas ostentabant. Has Feresiæ à brachio dextro apertas & in dorsum rejectas ferebant. Mitræ, quibus caput tegebant, ab eo, quam præferebant gemmarum, auri, argentiqûe splendore, ad solis radios micantes, illusterrimum illum Ornatissimorum Cubiculariorum ordinem, mirum in modum fecêre clariorem.

Equorum apparatus non minùs augebat splendorem: ex dextra namque & læva faucium parte usque ad nodum Ehippii in formam arcus, alligatas trium digitorum latitudinis catenas argenteas & aliqui etiam de auratas, figuris variis insculptis atque impressis, saltum equorum suo strepitu provocantes habebant, quorum etiam gratiosum sonitum virgarum quas manugerebant pulsû provocabant. Sed & soleæ à Catenulis argenteis affixis sonoræ; nec non pretiosa monilia equorum, pedes exornabant. Denique splendida ac fulgentia omnia, totam eorum (ducentos penè fuisse arbitror) cohortem, quasi in lucem meram converterunt, sicque sat diu inter se subsultantes, alios ac alios pretiosius ornatos adduxêre equos, & relictis jam fessis, mirum dictu, non contactâ humo ex uno in alterum, & in alterum ehippium insilientes, eam probavêre dexteritatem, quæ ad stuporem omnium, tantam artis peritiam demonstrando, oculos mirificè delectabat.

Ornatissimam turbam hanc, secutus est amplus Magni Ducis currus, exterius multum ab auro coruscus, interius ab aureis argenteisq; fimbriis circumqua; instructus, ad eum, quem Gallicum

cum dicimus, modum confectus, ad suscipiendos Legatos à Duce submissus. Bis proinde coactus sistere processus; prius nempe ad reducendos, quos post nos reliquimus, in Urbem armatos Moschos, qui fora, quæ Legatis transeunda fuerant, occupaturi erant. Interea pedetentim appropinquavere maximo cum strepitu Moschovitæ, virgulis dissimulanter equos quatientes, ut saltus, & hinnitus majores ederent. Singillatim omnes, quos obviam missos jam dixi, Legatorum curram adivere, honorificam imperipientes salutem, donec ordine postremus, dignitate primus senio venerandus, & omnium ditiores tunicâ spectandus, Legatis curram conscendendum detulit, & post multas eorum loquelas & ceremonias ipsis confidentibus, se unâ comitem adjunxit. Ubi cum jam propius Civitatem accessissent Legati, secundo processum stiterunt.

Dum autem ita subsisteretur, ut & dum lentè progredieremur, (quia plurimis militibus in bellum, quod tunc contra Turcam fervebat, amandatis, paucos sibi pro sua magnificentia, domi habere Czar videbatur) interea iidem milites, quos prætergressi fueramus, per alias vias à lateribus celeriter præveniebant, & se nobis rursus spectandos alibi exhibebant.

Hic dum pacata videntur omnia, ecce non modica inter Legatorum & magni Ducis ministros lis exoritur, de loco honoratiore; hæc per trihorium duravit contentio, donec subsistente toto processu, ad M. Ducem recursum est, ejusque hac super re voluntas postulata; atque ita à Czaro statutum, ut ministri duo Mosci medium Polonum, ordine secundo, duo Poloni medium Moscum atque ita deinceps tenerent. At verò dictus hic in ipsa Moscovia Moscorum splendor, cum Polonorum incessu viatico comparatus, apparuit incomparabiliter major; quando ex adverso magnanimitas animi ex vultu Poloni in mediò duorum Moscorum sita, ambos, faciei gravitate & generositate longè antecellens spectabatur.


Urbem ingressis Legatis sonantius applaudere jubebantur Tubicines Mosci, dispari tamen à tubicinibus nostris ratione;
horum

horum enim artem cum illorum si comparârim, à Moscis, Liripipiû, à nostris tubas inflari dixerim; tantâ nempe confusione sonus editur à Moscis, ut nulla omnino Cantus harmonia discernatur. Hic verò in vicos Urbis excurrere omnes eo numero, quem capere potuerant vici; reliquis fenestræ, canales atq; tecta ipsa spectandi locus fuere, tantâ multitudine, ut mirum omnino mihi visum sit domos, quæ è ligno duntaxat consolidatæ sunt, tanto pondere pressas, ruinam non fecisse.

Spectatores inter, non postremum locum tenuit, Virginum Copia, quæ omnimode conabantur ad hunc ingressum Legatorum comparere splendide. Hæ ut eximium decorem mentiantur, faciem ut palleat tingunt, genas solas purpureo colore illinunt, ut pallor ruborque invicem ad decorem concertare videantur: Cingulo digitos tres lato, auro argentoque fulgido frontem præcingunt dependentibus undique stellulis tremulis, cæ elegantia, ut motum subire frons nequeat, quin radiare videatur.

Itaque multa spectantes, atque ipsi spectati plurimis, transito magno illo præurbio Slobodow, Urbis portas custodiis militaribus, machinisque bellicis probè munitas adivimus, quæ Urbis pars Zemlenigorod nuncupatur. Transitâ hic denuo longâ plateâ, si (rotundis instratâ trabibus, quæ difficilem curribus transitum causant) attigimus forum, militibus, tubicinibusque, festivo concentu nobis applaudentibus plenum. Tum deducti ad aliam Urbis partem, cujus mœnia alba: hinc Bialgorod vocata. Ejus porta armatorum item manu, tormentisque bellicis instructa, per cujus longam, & latam plateam distributi pedites, in foro verò Equites collocati, nos plausibus variis excipientes steterunt.

Denique adivimus Kitaigorod, præ reliquis munitiorem Urbis compartem, in cujus porta Czar ipse spectatorem processus nostri egit, atque ad pervidendum melius horæ dimidiæ spatio subsistere jussit Legatio. Portâ hæc superatâ, forum glabris trabibus stratum, totum attigimus, ubi deprehendimus iterum illam
G cohortem



cohortem militum, quæ Dracones in hastis volatiles, ut supra memoravi, gerebat, quibus præerant sex Tympanotribæ, qui maxima Tympana flagellis mirâ circa caput æqualissimâ & ad momentum concordi omnes, manuû gyratione & corporis agitatione adstuporem planè pulsabant. Superato hoc foro, sinistrorsum in plateam tandem deducti, ubi magnificam pro exterorum Legatorum usibus exstructam aulam ingressi, nostro per ducenta novemdecim milliaria Germanica itineri 17. Maji optatam imposuimus finem.

CAPUT XI

Palatium Legatorum, & primus ad Czarum Aditus.

UT Legatorum Palatium Lectoribus satis innotescat, sciendum est, quòd Alexius Michaëlovicz Architectus eleganti hac fabricâ, totâ (quod in ligneis hîc Urbibus rarum est) ex lapidibus cœctis constructa, tres contignationes altâ, quatuor turriculis, seu, ut vocant, cupulis, in quatuor angulis super gradus totidem eminentibus decorâ; arcem quadratam includat, cujus medium fons amplius occupat. Fabricæ hujus primarium decus, Turris alta & artificiosa magnificû introitum ædificii continet, quæ tribus pergulis (quarum una in altissimo, media in medio turris, tertia reliquæ structuræ æqualis) tam ad prospectum deliciosis, quàm ad deambulandum spatiosis decorata, non exiguum Urbi huic addit ornamentum. Ædem hanc ad habitandum Legatis in tres partes divisere Moscæ: primam eamq; potissimam, Legato Principi; secundam dextrorsum Palatino itidem Legato; tertiam demum sinistrorsum ei, qui Legationis Secretarius fuit, designavere. Toti autem Legationis comitatui hæc unica amplissima domus suffecit. Cubicula fornices tam humiles habuere, ut nulla quæ nobiscum adveximus, Aulæa fuerint, quæ tam parùm elato parieti aptari commodè potuissent, quin potius ea valde complicata oportuerit affigi.

Videbi-



Videbimus jam quem Moscæ in cubilibus posuêrint apparatus: Affixa muris fuerant scamna circumquaq; cubilis medium mensæ, longæ, longa itidem scamna mobilia occupabant, rubrò pannò instrata omnia, quò & parietes infernè, quantum sedentis hominis dorsum pertingit, obducebantur. In uno ex cubiculis Principi Legato assignatis splendide adornato, paratum erat solium, imminente desuper pretioso Baldakino, ubi Regis Poloniæ imago; sub qua sedes Principis Legati admittendis ad alloquium destinata. Intimum Principis conclave tapetibus auro textis, historiam Samsonis exprimentibus, ornatum erat, sed quia aer antea diu undiq; conclusam auram corruerat, necesse erat, nè Principi esset noxius, fenestras aliquot vi eximere, ægrè licet ferentibus Moscis. Tres constitutæ culinæ vastæ, cum suis promptuariis, vicinisq; vivariis, ac reliquis cellis. Tria item Stabula, eos, qui ad frequentiore usum necessarii videbantur, equos, servabant: reliquos per prata senis ab hinc miliaribus dissita, alternantibus per hebdomadas custodias equisonibus, pascebant: Bina demum ampla atria, ad deambulandum & convivandum. Illud verò non parvam Legatis peperit admirationem, quod fenestræ omnes ferreæ magis & lapideæ, quàm vitreæ, & pellucidæ fuerint: & quidem, quæ plateam spectabant, crates parietibus profundè immuratas, humani pugni crassitiem æquantes habebant, valvis etiam ferreis munitas, quibus tamen singulis adhuc aliquem armatorum numerum Moscæ addidère, ad arcendam, ut aiebant, hominum rapacium & furacium nequitiam.

Posthæc cura omnis erat de muneribus Magno Duci quàm decentissimè seu Regio seu privato Legatorum nomine deferendis, ubi complures nobiles Poloni aulici, quæ privatim habebant cimelia, ultro Legatis magnificè offerebant Czaro præsentanda.

Paratis rebus omnibus feriâ sextâ, vigesimâ Maji sub horam matutinam octavam, vicena equitum paria (rubra illis vestis concolor omnibus) equis candidis inveci adium nostrarum arcem ingressi, longo sese ordine collocant. Hos alii dignitate majores Aulici, amictu ornatiores, candidis itidem equis insidentes, ad

G 2

quindè-

quindecim paria subsequuntur; ordinem tum vestis ornatu tum equi splendore insignior clauferat stabuli Præfectus, currum superbissimum (quem quondam Gallia Legati unâ cum equis Magno Duci pro munere dederant) antegressus. Vehabantur eo curru Mosci primores tres, auro argentoq; in vestibus intermicante ditissimi, atque ubi ad Legatorum aulam pervenere, Legatum Principem adeunt, ubi & alterum Legatum præsentem invenerunt, delatâ singulis à M. Duce salute, ad colloquium cum eo habendum per humaniter invitârunt.

Lubentes annuere Legati, atq; ut majestate aliquâ id perageretur, ministris penè omnibus se comitandos præcepere (quod utpote toti Aulæ gratissimum, magno cum apparatu peractum est) eodem unâ cum iisdem tribus Primoribus curru ad Ducis palatium devecti sunt.

A primo mox egressu per forum compitaq; omnia in Kitai-gorod, ac deinde similiter in Krimgorod, (quæ Ducis sedes veluti cor in Urbis medio est) & dextrorsum & sinistrorsum collocatos longo deorsumq; ordine armatos spectavimus. Hic irremissus subsultantium quibus referta fuerant compita, equorum hinnitus; festivus item barbarum tympanorumq; strepitus, processum Legatorum fecere solemnior, populoq; in Urbem effuso spectabilem.

Ingressis igitur portam in Krimgorod, per Longam quandam juxta Parthenonem Virginum (eas Ezernicze appellant) plateam, in forum ducti, ducenta omnino tormenta bellica, buccis sibi contra stantia, quorum aliqua tria foramina habuerant, arte variâ picta, custodibus copiosè munita invenimus, & per mediam illorum adhuc vecti, tandem Ducale adivimus Palatium. Hic ad initium statim graduum vigiles omnes nos arma ponere jubent (jussuri & Legatos, nisi domi suæ adhuc in tempore, nè armati venirent, præmoniti, fuissent) atq; ita inermes omnes in palatium educunt.


Mox obviam procurrunt Aulici Ministri Moschi ad splendorem compti tres, hi Legatis perhumaniter avere jussis, eosdem Ducis nomine ad audientiam invitant, eo, quo in Moscovia fieri

receptum

receptum est modo; nimirum, Ducis sui titulum à capite ad calcem recitant, summa cum attentione, nè vel in verbo labantur, hæsitentve, graves aliàs etiam ad mortem, pro more, pœnas habituri; deinceps Regis, cujus Legatos alloquuntur, ac tandem Legatorum quoque titulos, neq; Secretarium Legationis prætereundo, cum magna honoris contestatione præstantur; demumq; usitatâ loquendi formâ ad Ducem invitant. Præstato id officii genere, præbant Legatos, atq; penes capellam Ducis usui propriam, cujus elegantiam porta anea, deaurata, varias Patriarcharum ejus gentis historias referens, indicat, per gradus aliquot in amplum lapideum atrium deduxerunt, atq; hic rursus Ministri aliis priores, ornatu excedentes, eò, qui jam narratus est modò, repetitis iterum titulis omnibus, ordine jam dicto, Legatis sese exhibent officiosos, perq; lapideam affabrè constructam, columnis quatuor lapideis ornatam pergulam, hastatis viridi sericea, quasi ad morem Helveticum veste indutis satellitibus refertam, ad portam usq; atrii Magni Ducis deducunt, ubi iterum jam tertio Ministri adsunt itidem tres Mosci alii, prioribus compiores, prædictoq; modo in ipsum atrium invitant: ipsisq; cum aliis prioribus præeuntibus, Legati ingrediuntur audientiæ locum. Erat atrium grande, cujus fornicem, media sustinet columna, ob quam in medio thronus Ducis erigi commodè non potuit, proindea Prædecessoribus Ducibus, ad latus collocatus invenitur.


Hic thronus mole quidem exiguus, pretio tamen maximus. Sunt columnæ quatuor variâ arte effigiatæ, auro oblitæ; sublimior pars, tecti seu fornicis præfert speciem definens in conum, à splendore non minùs, quàm pretio spectabilis. Throni apicem Aquila biceps, utrumq; caput coronata, occupat, tertia insuper corona desuper coronis his medio in loco impendebat: atq; hoc est insigne Ducis, quod sæpius aliàs à nobis per Moscoviam iter facientibus in turrium, ædiumq; apicibus spectatum est.

Hoc throno sublimis confidebat Magnus Moscorum Dux, majestate ætatem (octodecim enim annos natus) ad stuporem adstantium superante, mitrâ fulgentissimâ, cui insuper inserta fuerat corona aurea, lapidibus pretiosis cimeliisq; reliquis locupletissima



pletissimâ, caput Ducis ornabat. Manus ducale sceptrum occupabat. Tunica, quam mihi eminus stanti, splendor nimius penitus inspicere prohibuit, ea fuerat, quæ ubi spectatorum oculos delectare desiit, in recessu ad Legatorum ædes, omnium deinde ora ad continuo deprædicandum provocavit. Paludamentum in fyрма defluens, eos ab Adamantibus & unionibus spargere radios videbatur, ut Moscum hoc amictu fulgentem, Solem stellis amictum conclamârint.


Throni latere stipavêre officiales quatuor cum hacce armorum specie, quæ hic designata videtur



itemq; supremus Marichalcus Dolgoruky' nomine, per quem Dux cum Legatis colloquebatur. Reliqua atrii implevêre Ministri, Nobilitasq; cætera, numero super quingentos. Horum ornatus & splendor unius, decore alterius obumbrari videbatur.

Jamq; sedatum fuerat populi ad spectandum profusi tum admirantis, tum deprædicantis murmur, cum ad Legatos juxta throni gradus stantes, Dux ipse ita fari orsus. *Kak se brat nafs Jan Krul Polski Majut*: quod ad verbum est: quomodo se frater noster Joannes Rex Poloniae habet? reposuit Legatus Princeps: *Wam bratu Swemu Bozau miloscian Wielkiemu Hospodaru, Caru, y Wielkiemu Kniazu, Theodoru Alexie-viczu, wszistkieg, Wielkiey, y Maley, y bialeg, Ruszi Samoderfczu, y Wielu Hospodartzwo, y Ziem Woztocznich, y Zapadnich, y Sziewierzskich ocziczu y dziedziczu, Nasledniku, Ossudaru, y obladatau Wasze-*

III



mu Carzskiemu Wieliczeftwu poklonic sie, y Ozdrowie Waszego Carzskiego Wieliczeftwa wiedziecz, y nawidzicz roskazal

Latinè sic sonat.

Vobis, fratri suo DEI Gratiâ Magno Domino, Czaro, & Magno Principi, Theodoro Alexidæ, totius magnæ & parvæ & albæ Russiæ Monarchiæ, & Magno Dominatori; ac Terrarum orientalium & occidentalium, atq; Severiensium paterno Possessori, Hæredi, Successori, Regnatori, & mandata danti, Vestræ Czaræ Majestati reverentiam exhibere, & de Sanitate Vestræ Czaræ Magnitudinis rescire ac inquirere mandavit.

Secundus verba fecit ad Ducem, Palatinus, Magni Ducatus Lytuanix Legatus, atque de fancienda pace non nihil insperfit. Tertius deniq; se ad gerenda Legationis Secreta missum declaravit. Tum Magnus Dux nutu facto eos confidere jussit. Protulit dein munera, quæ Regis nomine deferebantur Legatus Princeps, tum sua Legati singuli; ac demum, quia magnificentia Czari, largius remuneraturi spem in multis excitaverat, sua etiam multa cum venerationis significatione, offerebant Legatorum ministri, comitesve.

Utq; suam Czar ita honoratus testaretur benevolentiam, manum osculandam toti ministrorum turbæ præbuit, quod reverenter, servato tamen dignitatis ordine, à singulis nobis peractum est. Ultimo locutus rursus Magnus Dux, cibos suos daturum se hodie, quibus vescerentur Legati, perhumaniter pollicitus est, nosq; supra descripto ordine (qui reliquis quoq; sessionibus omnibus servatus est) in ædes nostras revedi sumus.

Plena adhuc mansere compita, plena fora militibus, qui continuo rursus tympanorum tubarumq; cantu, reduces in Aulam suam Legatos prosecuti: & quia accepta admodum fuerat Magno Duci omnium nostrum præsentia, & per munera prodita erga se amicorum nostrorum propensio, illud singulare retulimus comites, quod illimitatam per Urbem spatiandi licentiam adepti sumus, comitante semper una è militibus præ foribus excubantibus, ad evitandas malevolorum invidias ac petulantias. CA-

CAPUT XII.

Epule Moschovitice.

Domum reduces, sua vix quisque cubilia repetivēre, tum Legati, tum ministri, & jam curriculi quatuor jumentis duobus singuli advehuntur, cibos, & quæ necessaria fuerant culinæ impedimenta deferentes magno armatorum comitatu stipati. Hos subsecuti milites alii colorem uniformiter vestibus præferentes, eos Krahulezik nominant. Ductor eorum vocabulo gentis Holova, quasi caput diceret, per paria divisos præibat omnes. Tulēre isti amphoras, cantharos, crateresque prægrandes auro argentoque divites, arte laboreque multiformes, quos à Diversorum Regum Legatis in munus venisse Magno Duci memorabant. Opinio omnium nostrum fuerat potibus selectioribus repletos fore, verum ubi omnis potus vacuos reperimus, præstandi honoris gratiā Legatis, patulē per urbem eos latos esse, animadvertimus.

Dein insuper coqui cum Archimagiro advenēre, laminas ferreas pedibus fultas, quæ postmodum ad calefaciendos à carbonibus cibos (in aula namque Ducis jam penē ex integro cocti fuerant) deservirent, singuli operosē apportantes. Architriclinus interim, & ille quoque ex Ducis ministris, mensæ initium, quod Legatis destinabatur mappā instraverat, & sex argenteis orbibus, cultris item, cochlearibusque in ordinem composuerat; mensæ reliquum absque tegimine nudum relictum. Cibi crudi numerum ducentessimum adæquabant.

Ubi ad conficiendas à coquis epulas vix erat, quod ultra desideraretur, nuntius missus ex jam dictis militibus unus, qui parata jam omnia ad Aulam Czari nuntiaret. Neque tardavit adventu suo Legatos à Duce destinatus Moscus Princeps (Knias Mosci dicunt) quin opinione citius aderat, equo pretiosē pharetrato insidens, & superbo ipse amictus spectabilis, assumptosque Ducis nomine Legatos in eam, quæ suprà descripta est Salam,

atriumque;

atriumque, ad epulandum deduxit. Mox adfuēre, qui in cibis mensæ inferendis partes suas agerent ministri, itidem Mosci, qui calidos licet ad vescendum proposuerint, minimē tamen gustum Legatorum seu pascebant, seu recreabant, eò quod Moscorum epulæ, nē frugales quidem cibi Polonorum palato, utpote antehac insueti, viderentur.

Seu multiplicitem, seu multiformitatem escarum; quas inibi apponi contigit, longum esset enarrare. Erant ciborum, quàm plurimi, sed ex meris piscibus à quibus non gustus tantum, sed visus etiam abhorreret. Est Moscis copia Marinorum piscium ad abundantiam; & ideo, ut sumtibus parcerent, semper solis piscibus nos tractarunt. Horum nonnulli, illis Bielcze dicti (ab alba carne) bovis magnitudinem omnino adæquant. Ex his itaque in frustula comminutis, ciborum varietatem quàm plurimam confectam mensis apposuisse. Habet id piscium genus è carne sua humorem, seu liquorem quempiam, cui coagulandi vis inest; ex hoc igitur in massam ad coquorum libitum tractabilem coacto, ficti fuere anseres, galli Indici, gallinæ & alia id genus, ut spectarentur magis, quàm ederentur proposita. Ex farina item oleo lini commista, compactæ fuere turres, mœnia, & ut reliqua non commemorem, quàm plurima, arte singulari conficta, præsertim bicipites aquilæ supremum occupantes locum viscebantur. Accessit aliorum piscium numerus & rara magnitudo: unius certè dimidium, tres, viribus robusti, impensō conatu super lance prægrandi in triclinium intulēre.

Illud singulare in lance, alia: Erat frequens fructuum varietas, eo artificio saccharo commista, rebusque aliis seu aromatibus nobis incognitis condita, & compacta, quæ panni rubri in petiam compositi effigiem mirē præferebat, atque adeo spectantium fallebat oculos, ut an pannus, an cibus esset, non modica circumstantes inter ministros enata sit contentio. Neque postremo loco habendi fuere pepones per medium divisi in saccharo & pipere copioso ut videbatur, cocti, dulcedine opinionem superantes. Locatis jam epulis, quas apposuisse Mosci, Legatos as-

H

fidere

fidere fecerant mensæ, & illa calida, quæ specialiter ad Legatorum gustum præparata fuerant, fercula præposuere.

Ita præsentibus Legatis, Knias supradictus seu Princeps Moscus, qui Czari personam agebat in epulis, circumspectâ Ministrorum turbâ: jubete (inquit ad Legatos conversus) ministri vestri mensæ reliquæ assideant, præsuri unâ. Cui Legatus Princeps ignoscatur ministris nostris (ait) neque enim Nobilitas Polona ad mensam non stratam prandere in usu habet. Pudefactus enim verò non nihil Knias, & mihi ignoscendum (reponit) utpote Polonorum rituum parùm gnaro; simulq; ingenti mappâ, quam sinè mora missus Moscus minister ab aula attulit, mensæ reliquum insterni imperat, atq; annuentibus Legatis, primò confedere omnes.

Prægustatis parumper cibus, haustum proponi jussit Knias hoc ordine: Primum locum tenuit Winicza Osludarzka, seu vinum crematum, quò deaurato scypho, miro artificio extructo infusum, servato dignitatum ordine bibendum proposuit; crematum namq; vinum, Ducis solius esse haustum, unde & nomen sortitum est, autumant. Secundum cerevisia, & nullum argenteis scyphis infusa, singulis, pro libitu. Tertium demum locum, habuit vinum, illudq; multiplex, & secundum pretii, saporisq; ordinem mensis illatum: Rhenanum primò Mosellanicum secundò, Petreziment, & Romania (genus vini illius nominatur) tertio; Hispanicum, deniq; quartò allatum est; eratque tantus à pocillatoribus in ea vini varietate, aliorumq; potuum ordine servando excitatus clamor sibilorumq; strepitus, ut Legatis cum admiratione, reliquisque mensæ assidentibus omnibus, fuerit conticendum.

Hilaris interim minorum gentium famulorum turba, Haidonum, armotorumq; mutuis computationibus tempus agebant; atque nè subesse possent querelæ, à Legatorum turmis fortassis ob defectum potûs excitandæ metus, urnam insuper cremati plenam, in aræ medio locari jussit Knias, quò omnibus ad bibendum pateret aditus. Sciverat nempe Polonos ad crematum esse propen-

1112/011
1577 253
1577 253



- A. Residentia Czari Krimgorod dicta
- B. Krimgorod
- C. Bialgorod
- D. Zemlenigorod
- E. Slobodsko praetorium
- F. Ecclesia S. Trinitatis
- G. Moscua Fluvius
- H. Pons fluminis innatans
- I. Strizoleczka Sloboda
- K. Neglina Fluvius
- L. Platea, qua Legatis introducta
- M. Palatium Legatorum
- N. Platea, qua Car Spatiatum
ferebatur
- O. Platea, versus Kukui
- P. Via quae ex Urbe versus Orgom
lowska Sloboda ducti Legati
- Q. Hortus pro specia libus
equis Czari
- R. Fora ampla, ubi domus
parata venduntur.
- S. Pars Urbis tunc igne
inperato exusta.
- T. Forum spatiosum
tribus glabris
stratum
- V. Officina Mercat
orum

MOSCUA

Metropolis Moscoviae

CZARI

Residentia

ad pag. 99. seqq.



penſos. Hic jam ſuprà nobis nominatus à potando famoſius Stirga Haido, tantum hauſerat, ut exanimi ſimilis humi corruens oculos tortuoſè verſando ac inconditas voces eructando, atri inſuper fumi globos ex pectore, ardente jam cremati vi, voluendo, communi reliquorum lætitiæ modum impoſuerit. Miſertus combibonis ſui Haido Procurat dictus, non magis lateris, quàm poculi fidus Achates, flocco frigidâ aquâ bene humectato, pectus hominis crebriùs tergens, flammam intus urentem reſtinxit, eo eventu, ut hominem extra periculum jam poſitum, conſuetà bibendi libido ruriſum occupârit.

Dum plena potibus omnia, reperti fuère Moſcorum aliqui, ex eis, qui cellas vinarias curabant, qui utile ſuum, dulci Legatorum hauſtui præponere ſtuderent; namq; liquorum varietatem commiſcebant, ut miſtis hauſtibus conſecti convivæ, quod de optimo ſupererat, cedere Moſcis potuum à Duce ſubmiſſorum adminiſtris. Verùm detectâ fraude, dum porrecti in crateribus nunc iſti, nunc illi liquores ab indignantibus convivis, ſeu ex ore ipſo, ſeu ex vaſis in terram effunduntur, facilè percepère Moſci, in aperto jam eſſe, quod tantò ſtudiò contegebant, ortaq; hinc partim palàm conſuſione, partim hoſpitum ejuſmodi deteſtatione, inviti licet, id quod præcellebat reliquis vini genus, epulantibus abſq; discrimine omnibus propinavère. Præſtita dein Legatis veneratione publicâ, Ducis palatium repetivère.

C A P. XIII.

Moscuæ deſcriptio.

§ 1. Krimgorod.

Eſt Palatium Moſcorum Ducis, Moscuæ Urbis pars primaria, in medio, quaſi cor, ſita, Krimgorod ab iis nuncupata. Locus aliis elatior, hinc Moscuæ, alluitur reliquis tribus lateribus à Neglina fluvio bifariam diviſo circumdatur: Hunc in gyrum mœnia ordine triplici perquam firma claudunt. Intra hæc portæ duæ verſus Kitaigorod altera; verſus Bialgorod lapideæ utrobique


utrobiq; pontes vallis impositi exitum præbent. Has portas tribus, quarum prior ferreâ, altera cupreâ, tertia arcâ variis figuris suorum Patriarcharum, insignitâ laminâ obducta, obsecrant januis: Portæ primæ, turris alta imminet ex muro solida, splendore firmitati pari.

Est in ea turri singulare horologium in viginti quatuor horas quæ illis Ezasii dicuntur, ad Bohemici morem divisum, eâ arte, ut minores campanulæ per ordinem exprimant Musicam octavam eaq; semel decursâ indicetur primus quadrans; secundus verò, tertius, ac quartus, repetitâ bis, ter, ac demum quater. Horas autem designat sonus campanæ Majoris. Aquila biceps (Czari insigne) coronata, tota deaurata, supereminente tertiâ insuper corona majore aurata, fabricæ totius apex est.

Hæc sola Urbis Moscæ portio, Duci aulæq; habita, ea abundat templorum copiâ, ut non pauciora quinquagenis censeantur. Horum Princeps est Santi Nicolai sacellum, quod usui Ducis servatur. Primum ab hoc templum magnificum, ubi seu Duces ipsi, seu Ducibus sanguine juncti tumulari sueverunt. Tertium Parochiale, magnum illud sanè & ornatum; Decorem auget in ipsa templi fronte Divæ Virginis Matris planè ad modum Passaviensis media effigies, quatuor tamen ulnarum longitudinem exæquans, pereleganti Apellis opere depicta.

Alterum templi ornamentum est turris quadrata media, media ad apicem rotunda; eam Jwan Welikoy indigenæ appellant. Hæc ipsa triginta, & septem campanas complectitur eo, qui nunc dicitur modo. Sunt in alto turris fenestræ circumcirca; in quarum singulis est campanula; quæ omnes discantum sonant: Tum ordine secundo sub illis primis totidem item fenestræ & campanulæ, quæ omnes altum. Sub his ordine tertio, item tot fenestræ & campanæ majores, quæ tenorem; quarto denique ordine, sub hisce tribus campanæ totidem quæ bassum, velut voces Musicas ad se concordēs, resonant.

Ad bina turris latera, bini quoque muri: in horum singulis singulæ rursus campanæ, prioribus multò grandiores; quarum ea,
quæ



- A. turris in porta cum horologio artificioſo.
B. Monasterium Monialium.
C. Monasterium Monachorum Czernici. dictorum.
D. Templum Metropolitanum.
E. Edificium aulicus Czari.
F. Turris Iwan Welkoi cum campanis.
G. Armamentarium.
H. Pons muratus Supra neglinam.
I. Forum elabris trabibus inſtratum. ad pag. 60.





*modus inclinationis ad
formatum crucis.*



Templum St. Trois.





quæ à sinistris, habet inferiorem circumferentiam filo à me dimensam octodecim ulnarum; illa verò, quæ à dextris, viginti & unius ulnæ.


Verùm mole grandius arte pretiosius reliquisque omnibus spectatu dignius est, grande illud cymbalum, è turris fronte pendulum, quod quia studioso labore dimensus sum ego ipsemet, habendam mihi à lectore fidem confido certius. Est periphæria illius infima ad 28'. ulnarum, circumfusa: corpus ipsum seu latus, unam ulnam & unum præterea quadrantem, & duos digitos crassitie adæquat. Altitudo ad ulnarum septem longitudinem porrigitur; Cor denique seu lingua, quâ moles percussa resonat, ejus est magnitudinis, latitudinisque, ut protensis duorum virorum brachiis, vix stringi possit.

Cæterum in eo numero Moscua Urbs tota templis referta est, ut vix certum eorum numerum posse iniri incolæ ipsi referant; at tamen à 700. templa, quantum communis fert opinio, mille & septingenta censent. In horum turris in cuspidem vergens; ad latus templi, ve etiam in turri campanæ, ad minimum octonæ, ad edendam jam narratam consonantiam musicam præparatæ: singula Ecclesiæ recta octo item turriculis exilioribus (cupulas dicemus) quarum singulæ cruce deauratâ schemate prout ineffigiat, occasum versus insignitæ, adornantur.

Quàm magna hæc templorum frequentia, tam rarus est apud Moscos in templa ingressus; in eo namque implere se omnia arbitrantur, quod per urbem iter facientes, si fortè templum prætergrediantur, illud submissâ corporis inclinatione & tricies formatò in fronte Crucis signo venerentur: Quamquàm & illud ad pias eorum consuetudines pertinere videatur, quòd indies crebris campanarum pulsibus eorum, quos colunt, divorum festa celebrent.

Id verò ad eum modum peragitur, ut campanas non agitent, sed cordi seu linguæ campanæ alligatus est funis, qui dum trahitur, repetitis ad locum eundem ictibus, æs resonat, eo ordine, ut

H 3 pul




pulsetur minima campana sola v.g. sexies, dein simul alternatim una cum majori. Itidem sexies; dein utraque jam simul alternatim una cum majori, itidem sexies; dein utraque jam simul cum majori, tertia iterum alternatim vicibus totidem, & sic servato ordine, ad summam usque, ad quam ubi perventum fuerit, tum campanæ deinde omnes compulsentur, idque totidem quoque vicibus. Dein repente cum omnibus cessant, atque tum eundem huncce ordinem iterum resumunt, & sic vicibus multis per diem repetunt, idque in variis Ecclesiis & pro cuiusque transeuntis libitu, cum publicè semper cuilibet ad omnes accessus pateat. Dum verò in Palatio illas supra enumeratas triginta septem campanas pulsare continebat, angustiam & internum quendam cordis horrorem inferebant. Omnes cupulæ & eminentiæ, quæ in Krimgorod deauratæ sunt, ad splendorem solis tantam reddunt repercussionem radiorum, ut visendas se præbent ad sesqui penè milliare; quod etiam nobis primo videntibus non parum ejus Urbis attulit æstimationem.

§. 2. Kitaigorod.

Kitaigorod Civitas suo longo (quod dolatis trabibus totum instratū est) latoque foro Krimgorod confinis paulò Major Moscuæ pars est. Hujus singulare decus est templum perelegans, quod, Sant Trois Mosci, Jerusalem Germani nominant, ab hoc memorandum maximè, quod infaustus fabricæ Architectus, perducto in finem opere præmii locò oculis, Czari mandato, sit oratus. Metuebat nimirum Tyrannus, ne si deinceps tantus artifex Basilicam alibi exstrueret, isti destrueret singularitatis prærogativam.

Hanc ponè molem suggestus, grandioris instar cathedræ erectus, cancellis in gyrum circum septus ad gradus sex elatus, pavimento è marmore albo stratus visitur, ut ex eo Patriarcha eorum, benedictionem, quæ annuè fieri solet, commodè toti populo dare possit: ut &, si quid populo propalari necessum esset, ibidem proclameretur.

Posticum hujus suggestus firmat murus solidus, ulnas septem
altus,



altus, in quo bina tormenta bellica locata, quorum unum novem ulnas longum, septem digitos crassum, os ad ulnæ quadrantes quinque amplum, pandit: alterum est dimidio minus.

Hæc latam plateam respiciunt, quæ Tartarorum (ut narrant) incursionibus plurimum obnoxia antea fuerat. Continuat forum, ubi à dicta Basilica usque ad ipsos versus fluvium civitatis muros (qui toti rubri sunt) est descensus ad vallem per amplam, ubi vastum ædificium quoddam, tabernis Mercatorum ex Persia plenum, merces Persicas auro argentoque ditissimas, lapides pretiosos & alia multa vanum exponit; in cujus medio pro ponderandis mercibus grandis lanx pendet. Ibi quoque pelles sobolinæ quæ ad Czarum pertinent venduntur.

Ampla per suprâ dictos rubros Urbis muros patet porta, quæ venit ad fluvium Moscuam, qui proximus mænia alluens sternitur ponte pensili è dolatis asseribus quercinis compacto ipsi flumini innatante. In hoc indies spectare erant lotrices innumeræ, festis quoque ac Dominicis diebus balneatores copiosi.

Alteram hujus Urbis partem versus Bialgorod, alter fluvius Neglina circumfluit, qui allambens mænia Krimgorod in Moscuam influit. Forum supra dictum tam amplum est, ut totius Urbis officinis Mercatoriis sufficiat. Ibi Oeneopoleæ vina varii generis propinant, ac in primis Romaniam (sic Mosellanicum vocant) alterum Petreiment, id est Hispanicum, dein Rhenanum, Gallicum aliæque. Post hæc pannos Sericeos telas Turcicas & similia vendunt. Tum aurifabri: & sic diversis ordinibus diversa artefacta, uti Ephippiarii, Sutores, tornatores quàm plurimi. Tornatorum hoc speciale est, quod è singularis pretii ligno (kapove drewo appellant) præter cochlearia (quibus si jus fervens comedatur mollescent) scyphos figuræ lepidæ, more patrio, quorum duos conatu difficili illinc deportavi, formare noverrint.

Has inter Mercatorum turbas, numerus Maximus Pellionum est, qui non alibi, quàm loco hoc merces proponunt; quemadmodum & reliquis omnibus, etiam minima videntibus, ordi-
natus

natus locus certus est, nè emprurientes advenæ, suarum, quas ambiunt, mercium locum opus habeant labore multo investigare. Est & una platea perampla, quam ipse Dux quoquoersum pergat, pertranlit, hæc à Krimgorod porrigitur, non aliis, quam pictoribus habitata. Hi quia Divorum effigies copiosas venales faciunt, platea Divina dici meruit à Moscis.

Præ reliquis lepidum est videre mulierum Moscarum eò confluentium merces aut negotia. Ubi namque seu telas seu filâ, seu indusiâ seu annulos ad vendendum contulerê, aut otii gratiâ ad spectandum convenêre, tantos clamores excitant, ut eos ardentis Urbis vel subitorum gravium casuum indices esse advena non expertus arbitraretur. Discolor varietas vestium, multum illas spectabiles facit, sed illud minimè commendat, quòd quàm plurimæ, exque senes potissimùm, quibus jam formæ decus ætas confecit, genas tingere, atque ità seu formam, seu juventutem deformitate mixtâ mentiri in usu habeant. Nonnullas ore annulum, cui lapis Turcois insertus erat, gestare, admiratus ego, quid hoc sibi vellet? quæsi; & ecce reposuêre Moschi, hoc signum esse, venalis pudoris muliercularum.

Est alia platea à Legatorum ædibus non longè diffita, casulis densissima, quæ ad nihil aliud inserviunt, quàm quòd inibi plebs infima seu adpectendum à sordibus caput, seu crines deponendos accidendosque conveniat. Unde & nomen, forum pediculusum traxit. Tanta ibi in viam projecta capillorum copia, ut vix pedem figere liceat, quin crinium cumulus, isque hinc indè sordidissimus, pulvini instar calcandus occurrat.

Ex adverso ædes sunt magnificæ, in quibus Typographia linguæ Græcæ, tametsi corruptæ habetur, itemque Moscovitica Bibliotheca asservatur. Plura etiam ibidem magna Palatia, quæ Primores Mosci (illis Kniasi) inhabitant. In singulis verò bina trinave templa cum decoris cupulis reperiuntur, turribus totidem campanisque copiosè instructa: tantò enim pietate Magnatus alterum superat, quò plura Templa in suo Palatio crexerit. Quin & hinc atque inde in platearum transitu sacella Divorum

hono-

honori sacra erigere, sueverunt Mosci. Ex adverso ædium nostrarum Sancti Nicolai (quem præ reliquis singulari devotione colunt) & Beatissimæ Virginis capellas spectabamus, alibi S. Georgii, alibi aliorum etiam nobis non notorum. Neque inculta sinunt, quin ea, quæ à Divis impetrata arbitrantur miracula, in tabella depicta, lychnos, cereos, lampades & id genus anathemata appendunt, eique, qui secundum morem sacello adstat, Monacho, non illiberales eleemosynas largiuntur. Notavi crebrius hæc eorum pietatis officia; sed, quòd spectare volui, genu flectentem, aut precantem aliquid, vidi neminem; frequentia crucis signa, & profundas corporis inclinationes, qui fortè ea loca præteribant præstabant omnes, nec ultra aliquid.

Urbis custodes, quoties nocturno temporis lapsu horologium horas resonat, toties illi vigilare se signo produnt. Et quia ea vigilum multitudo, quæ armata protegit Urbem, tumultus Civibus, ac Duci ipsi permolestos excitaret, si tympanorum strepitu addandum vigilæ signum uteretur; ideo dum horologii sonitum percipiunt, mox ad portam Krimgorod, utpote horologio viciniorem, trahi, ad hunc usum paratæ, fuste ictus aliquot infligunt; quo audito, qui ab his primi excubant vigiles, trabem simili modo verberant, atque ità per Urbem totam sensim propagato, quæ excubitorum domus sunt, obtuso fustium sono, suam in vigilando solertiam contestantur.

Præter plateas, quæ rotundis trabibus etiam in tota Moscua stratae inveniuntur omnes, duæ hinc primores; una quæ Duci in campum pergenti transeunda venit; altera ad ædes nostras, trabibus glabris stratae sunt.

§. 3. Bialgorod.

CZargorod dixêre Mosci veteres, quæ Bialgorod nunc appellatur quòd tunc, cum Czar renovari mænia, dealbarique fecit, inceptum, ut nomine ab albis muris desumpto, illis Biala Stenna (albus paries) diceretur. Est ista Urbis Moscuæ major portio, à qua quintuplo omnino Kitaigorod supra descripta magnitudine

I

exceditur

exceditur. Muros suos à Moscua flumine orditur · flectitur verò & in longum protenditur ut gyro, quem à Moscua flumine cœpit, & Kitaigorod & Krimgorod complectendo ad eundem fluvium revertatur. Neglina fluvius Urbem hanc transit, donec penes Kitaigorod pertingat ad Krimgorod.

Numerosæ hic templorum, & quæ à Primoribus inhabitantur, Aularum fabricæ. Magna item Mercatorum copia & artificum mechanicorum, quorum artis genus pendulâ è fenestris mechanicâ notâ agnoscitur. sic sartores varias variarum materiarum particulas; futores ocream aut calcei partes ante fenestras suspendunt: Hos inter numerus maximus est talium, qui calceos ex flexili vimine implectunt usui vilioris conditionis hominibus. Sunt item frequentes Lanionum tabernæ carnibus refertissimæ, gravem odorem (quia eorum aliqui fœtidas carnes Soli expositas vœnum habent) spirantes, quas ubi Mosci etiam Magnates prætereunt, aut prætervehuntur, digito carnem à corruptione jam cæruleam, an satis jam mollis sit explorant, & frustum illius crudæ cum frusto allii publicè devorant, scypho cremati super hoc exhausto.

Præter cerevisiæ braxatores sunt adhuc alii cocturas varias exercentes, quas Mosci Kwas vocant, apud quos diversimodè per plateas magna potuum quantitas propinatur. Hic potus sic conficitur. Polentâ lupulo permistâ vas repletur, tum ferventis aquæ mensura illis nota superfunditur, atq; ita repletum vas, diligenterq; conclusum, donec præparata hæc omnia acefcant, stare intactum finitur, lapsisq; diebus aliquot, ubi ad eorum, qui conficere norunt arbitrium acefcere jam videtur, singulare potus delictum jam censetur. Est etiam præter cerevisiam & Mulsum Moscis in amoribus potus alius, è pomis confectus, à jam dictis hominum industriis vendi solitus, quem eò promptius hîc memorare lubet, quò recentior ejus apud me est memoria. Postquam namq; guttas aliquot, ductus curiositate, delibâssem, continuus duodecim omnino hebdomadis tertianâ, tremulus toti Polonorum commilitonum turbæ, risus fui, jocusq;.

Ex primis in Urbe hac ædificiis est Monialium (illis Czernice) monaste-

monasterium, quod Parthenonem compellare nefas duxi: licet namq; sint earum nonnullæ, quibus illibatus adhuc est virginitatis honos, facit tamen concessa intrandi viris pariter ac mulieribus, exeundiq; Monialibus libera facultas, ut nihil omnino sit, quod in decus illis à me commendari hîc possit; sunt Virgines paucae, viduæ plures, conjuges à maritis profugæ plurimæ. Est vetus, multumq; suspecta Moscorum præsertim Magnatum cum Monialibus, atque harum cum illis familiaritas, agendiq; licentia. Hinc earum nonnullis nomen quidem virginis, sed onus non honestæ Matris. Educant illæ proles suas scelestè conceptas, infamiter partas, eâ lege, ut ubi adoleverint, vitæ deinceps reliquum monasterii servitio addicant.

Ad Neglinam fluvium spatiosa stat domus, metallo liquando fundendis campanis, tormentisq; Bellicis, & iis quæ ad Urbis munitionem pertinere videntur, præparandis apta: quibus commodè fluvius lignorum generis varii necessariorum copiam advehit. Juxta, est stabulum Ducis, speciosis atq; ad morem nostrum in equestri Schola probè exercitatis caballis refertissimum.

Atq; hic etiam Ducalis magnificentiae locus est, Carceres, inquam, Tartarorum (quorum aliqui sunt Kalmuki, alii Circassi) Kosacorum Turcarumq; & quoscunq; in Captivitatem Moscorum venire contigit, qui ut Ducis Majestatem augeant, ejusdem expensis continuo aluntur, & perstudiosè curatur, ut numerus captivorum fiat quàm maximus, majori Ducis gloriæ futurus, ut plerumq; bis millesimum excedant.

Colligantur oblongâ catenâ pedibus bini, & affixum raptant per terram cuneum, quo noctu domi in terram incussè affiguntur. Elaborata pro equis flagella per Urbem divendunt; & ubi cadavera equina, canina ut & aliorum animalium reperiunt, cruda devorant.

§. 4. Zemlenigorod.

Zemlenigorod rotam Bialgorod mole sua circumdat, maxima Moscuæ portio, fortunâ, opibusque minor reliquis. Mecha-

nicos tantummodo complectitur, si pauculos demas Magnates, eosque non summos. Domibus iisque ligneis dense plena, quam flammis frequenter combusta. Ex quippe, pleræque in Zemlenigorod domus sunt, quæ compactis trabibus, mulcoque inter rimas munitis levi brachio, leviori nummo, quia jam paratæ venduntur; eriguntur. Et quidem pro domibus talibus vendendis, solummodo in Zemlenigorod fora multa prostant. Placet ibi ob incendiorum frequentia pericula longè ab invicem distatæ. Molis totius magnitudinem quadraginta quinque Vast, adeoque nostra novem milliaria Germanica in circum occupasse olim referunt; nunc verò bellis Tartaricis olim ante tempora Joannis Basilewicz gestis diminuta, quinque occupare certum putant Moschi, quod nobis facile credendum venit, cum ex nostra sit alta turri, quam supra descripsi, Urbem considerando, fines Moscuae attingere non potuerimus. Magna dirutorum jam Mœniorum vestigia, valla profunda, aquis stagnantibus copiosè repleta, splendorem antè habitum crebris Tartarorum insultibus perditum ostendant. Certè ex nostro diversorio; qua brevissimus ex Urbe patebat exitus impendenda nobis erat sesqui hora usque ad suburbium, per quod etiam dimidiâ horâ erat pergendum. Præurbium enim longè lateque pomærii totius magnitudinem amplitudinemque auget plurimum. Slobodow illud Mosci nominant, eam, ut opinor, ob causam, quod inhabitandi facultas detur omnibus, seu patrii illi, seu alienigenæ sint, advenis; quasi Swoboda quod libertatem Slavonico idiomate sonat, diceretur. Atque inde est, quod popula populi que facce abundet adeo, ut populosæ Urbis speciem præferre videatur.

§. 5. Strzeleka Sloboda.

Toti Urbi opposita est trans ripam Moscæ è regione Krimgorod, Strzelecka Sloboda (quasi dicas: militum Libertas) locus à militibus Ducis, ut supra dictum, inhabitatus, in vicos octo ob armatorum copiam (quibus Solis ibi ædium est facultas) divisus. Sunt illi Magno Duci à custodia tantum, eorumque singulis & pen-

pensum & vestis concolor è Ducis ærario quotannis tribuitur, & si ætate graves, armis jam inhabiles æstimantur, & illi & Coniuges eorum, prolesque omnes in Xenodochiis compluribus ejusmodi necessitati destinatis, impensis itidem Ducis adusque vitæ exitum aluntur.

Horum numerum quia is est, qui fidem ignaris superare videtur, omittendum censui, id unum asserens, eos qui Urbem Moscuae custodiunt armati, numerum quinquagies millesimum omnino superare. Eo sanè tempore, quo ea, quæ refero, præsentì mihi spectare licuit (Junius Mensis Anni 1678. fuerat) ad unam Urbem, quam Czehrin dicunt, contra Turcam tunc defendendam, tantum erat armatorum præsidium, ut ducenta hominum millia recensita fuerint: perditisque eorum millibus omnino centum, brevi interlapso tempore in pristinum numerum restituti sunt.


Est hæc militum Urbs, tam ab armatorum vi & multitudine fortissima, quam ex ipso loci situ munita. Unam ejus partem fluvius Moscua Lunæ cornutæ effigiem deferens, allambit; alteram mœnia ordine duplici tuentur. Hæc in propugnaculum Urbi Moscuae stat, cum nullibi locorum frequentiora sua cum Tartaris certamina habuerint, neque alibi irruere potuerit eorum hostilitas Moscis infestissima, quam ex hac parte. Cæterum nulli hominum, præter propolas, vendentes varias viles merces, uti lupulum, avenam & frumentum, hanc cum militibus inhabitare Urbem permittunt.

Est etiam ibi ad ipsum fluvium, grandis Hortus, & grande pratum, ubi Czari equi pascuntur.

CAPUT XIV.


Germanorum Vrbis Kukui dicta.

Compluribus abhinc annis seu inopia artificum in Moscovia seu negotiationes cum exteris nationibus (sinè quibus commodè obire sua non poterant) compulsi Moscos per magnam ex



arario Czari solutionem, Germanos variarum artium Mechanicarum peritos allicere. Hinc non modica quoque sectarum varietas in Moscoviam penetravit. Reperierunt Germani primum hospitales Schismaticos; verum temporis lapsu, ob morum & præsertim fidei difformitatem, iisdem illis, quibus antehac officiis omnibus accepti fuerant, facti sunt odiosi, exasperatis nonnunquam in mutuas usque cædes animis. Quapropter ut paci utrorumque consuleretur, in eum, quem supra Sloboda Strzelecza nominavimus, locum, remissi fuerant Germani, & mutato nomine, recens ea Germanorum sedes, Moscis Naleiki, quod quasi Infundibulum illis sonat, appellata est. Pupugit ea nominis à potibus derivatio Germanorum animos, quod & verbis exprobratum & sarcasmis explosum est, sæpius à Moscis, adeo, ut proritati Neoincolæ postquam ejusdem potandi libidinis, cujus ipsi arguebantur, reos magis ipsos, qui arguebant, Moscos cernerent, postulato à Czar incolatu alio, ad milliaris dimidium ab Urbe migrare necesse habuerint.

Ibi itaque fixis ædibus, ordinem à Moscis sanè invidendum, ad Germanicarum Urbium modum servavere, in erigendis multiplicandisque domibus ligneis quidem; sed ingenio magis, quam sumptibus modum præbente, ad decorem constructis. Totum illud Advenarum Neo-municipium Niemeczka Sloboda (ac si diceret Germanica libertas) antehac appellatum, nunc, unde nescio sumpta origine, Kukui illi nomen impositum est. Inter hos incolas fidei multa est diversitas, multa etiam nationis. Imprius quidem Germani; ex his plurimi Lutherani, quibus bina templa Pastores bini præsunt: pauciores Calvinistæ, qui ad unum suum templum, unum fidei magistrum habent; paucissimi Catholici, qui Romanum adhuc Pontificem veræ Ecclesiæ visibile caput confitentur, templo & sacerdote destituti. Præterea Itali ac etiam Galli. Ex his omnibus multi honoris opumque amore rebaptizati, schismaticam amplexi sunt fidem. Ad Catholicorum preces erat Czaro supplex factus Legatus Princeps meus, quo liceret iisdem ex proprio Curatum Catholicum inter suos alere;



alere; sed quia schismaticis exotum est Pontificis nomen, effectum caruit supplicatio. Artifices singuli, ex Czari arario quot mensibus liberali stipendio donantur. Sunt inter hos exteros etiam dignitatum, munerumque gradus, neque par omnibus amictus. In hoc tamen omnium conformis, quod Germanicus sit, atque ut plurimum ad Nobilium Germanorum modum, præsertim in mulieribus Virginibusque. Induunt & servas suas, quæ vel Moscoviticæ præpingues, vel Tartaricæ deformes sunt, Germanico amictu, qui earum enormi formæ miram ad risum aspicientium deformitatem addit.

Domibus singulis hortus bene cultus lactucis floribusque refertus, est annexus: quanquam hæc Moscis sit risus materies. Evenit namque, ut dum apud Germanos aliquot, factos mihi affectu conjunctissimos, hospes degerem, atque recepto illis, nobisque cibo lactucis vescerer, circumstantes admirabundi Mosci, partim indignantibus, partim explodentibus verbis, à cibo illo nos dehortati sint, monentes nè bestiarum more ad vorandum gramen converteremur.

Verum ubi ad sæcundos vini calices, ingentesque cerevisiæ (est illa colore nigerrima spiritu fortissima, quæ licet inebriet facile, caput tamen dolore non gravat) scyphos ventum est: tunc enim verò humanum duxere Mosci nobiscum ad crebros usque vomitus compotare. Viderat hospitalitatem Germanorum magnum apud me æstimationis locum reperisse Cancellariæ Germanicæ Secretarius, qui Latinitatis aliquid in memoria adhuc retinebat, & placitumne foret Domine (ad me ait) magni Cæsaris nostri (sic enim Czarum nominant) ob eam, quam calletis linguarum Polonicæ, Bohemicæ, Germanicæ, Latinæ & Italicæ diversitatem, sanè gratum agere ministrum? stipendium magnum, honoris incrementa, auri pondera pollicebatur. At ubi ex aliis ejusdem fortis Germanis certum accepit, semel servitio Czari addictos, toto reliquo vitæ tempore cum tota domo sua addicendos esse, quanquam ante propenderit animus pecuniarum spe illectus, mox

mox humaniter actis homini gratiis, auream mihi libertatem, aureis promissis præplacere reponebam.

Cæteras inter Germanorum industrias numeratur vasta officina vitriaria uno abinde stadio distita; ferraria item, & ad Jaguſa flumen, quod extra Urbem in Moscuam influit, Papyraria. Sunt etiamnum vestigia, quæſitas ab eis fuisse quondam auri argenti-que fodinas, sed irritò labore: quidquid illis auri argenti-que est, totum aliunde importatur.

Cimelia Moscis sunt multa & varia, Uniones, Smaragdi, Turcoides, Sapphyri, ex frequenti cum Persis commercio, labore levi, pretio quoque sanè exili. Rubini certe minuti iique ritè scissi, adeò apud eos viles, ut per libras venum proponantur: libra una viginti florenis Moscoviticis, seu sex Germanis.

Plana admodum est ad eam civitatis partem regio, ubi in jam dictis officinis labor Germanorum defudat. Allexit Czarum rara planities, ut binis relaxationi suæ extructis ex cultis-que ibidem hortis (quorum unus ad Italicorum hortorum formam comptus, alter trecentis turriculis in cuspides elegantes in uno eodem-que ædificio desinentibus, raro-que artis opere ordinatis mirè spectabilis) locum fecerit nobiliorem. Et quia locus iste præ reliquis animum Czari occupavit, eam sibi ipse legem imposuit, ut singulis hebdomadis (favente aëris temperie) eodem ad pervidenda, perlustranda-que, etsi quid ad ornatum desideraretur ad suppeditanda omnia, se conferat.

Habent præ Urbe hac popinam communem, à potibus atque relaxationibus nec semper satis honestis, attamen Moscis familiaribus, multum famosam. Est & usitatum Moscis, non in Urbe Moscuæ aut præ-Urbio, verum publico in campo locum potibus destinare, nè eorum compotantium petulantia & probra, omnibus palam fiant. Solemne namque illis est, quem procandi, potandive libido tenuerit, Urbe tantisper desertâ, in vicinam popinam, ad duos trèsvè ibidem agendos dies, noctesque egredi ibidem-que Veneris simul ac Bacchi solemnia agere, eo plerum-que eventu, ut ubi solvendis haustibus epotis par non fuerit heluo,

vesti-

vestibus exutus, nudatusque etiam indusio à caupone, eo modo pretium supplente, publicum in campum ejiciatur, donec ad sobrietatem somno redux nudusque aut seminudus in Urbem regressus obviatorum plausibus & probatæ temulentia præconiis excipiat. Et verò ipsi mihi ejusmodi infames spectare contigit, quando Legatorum Aulam prætereuntes nudi toti, præterquam quod sub telæ frusto pudenda latuerint, tantas excitavere populi acclamationes, ut insolitum aliquid visu-que dignum arbitantes ministrorum multi, fenestras occuparint ad spectandum, neque videre licuit aliud, quàm heluonum probra, ob potandi peritiam à circumfusa plebe collaudata.

Frequens Moscis ab Urbe in aliam Urbem peregrinatio, quo fit ut omnis artis inscii quàm plurimi, vitam aptè sustentent Zwosczyk id est, vectores dicti, quorum substantia tota unus equus est, & curriculum ligneus. Hi in Urbis foro profecturos quoscunque præstolantur, levi planè pauculorum nostratium cruciferorum pretio, etiam remotius devehunt.

Est id genus hominum adeo in opere suo pertinax, ut alter factus alteri obvius, rotas currus alterius rotis implexas frangi potius, quàm orbitâ cedere præligant, nisi sessor obvius sit Primorum aliquis.

C A P. XV.


Legatorum in Senatu Czari acta.

PERAËTÂ Audientiâ, de qua Superiùs, tres otio destinatos dies, subsecuta est determinante Duce 23. Maji Sessio prima, utque de manè consilium, ita & hæc, & sequentes, matutino tempore dabantur. In devehendis Legatis ad audientiam hic ordo observabatur. Milites à porta Legatorum aulae, usque ad ipsum Czari palatium pulchro ordine utrinque collocati, arma polita & mirum in modum fulgentia ostentabant, videlicet Berdisz,

K


cui

Berdisz.




cui terræ infixo appenderunt Sclopus; ex latere framea patrio nomine Ordinka nuncupata dependebat. Hic observanda differentia inter militem, & alterius conditionis hominem; nemo namque frameam femori alligare audet, præterquam miles; cæteri itaque loco ejusdem, longis cultris togâ obtectis utuntur.

Culter.



Milites electi, qui ab illis Krahulczik appellantur, trecenti pro Legatorum custodia, Berdisz, sclopis, frameis & parvis insuper securibus



armati ad ædes excubabant, pulchro semper & novo, vel aureis zonis vel argenteis ligulis distincto ad ostentandam Ducis magnificentiam, induti amictu; vexilla habebant permagna, affabrè auro argentoque intertexta, tympanaque magnitudinem nostrorum bis superantia.

His succedebant ternis diebus alii trecenti, itidem novo sed aliò

aliò induti habitu; communiter tamen rubeo: & ità toto illo tempore, quo Legati intra pomeria Moscæ degebant, tam militem, quàm vestem alternarunt. Duxerant post Currum Legatorum equifones eorundem pro majori Pompa parippos duos pretiosissime ephippiatos, quibus ob nimiam ferociam ipsos pedes ad certam distantiam colligare necesse erat; nihilominus Legati Lythuaniz equus improvidum stabularium per brachium ità arripuit, ut miser lacrymabilem clamorem ad adstantium admirationem promovere coactus fuerit; nec citò furens bestia liberum dimisit, ut dolor per septimanas aliquot tolerandus eum cautiùs se gerere debere edocuerit. Hac primâ Sessione occasionem innotescendi cum Legatis nacti sunt Consilarii Magni Ducis, unde factum, ut mutuis se se ceremoniis salutantes, nihil negotii peregerint; brevique domum regressi sunt. Elapso die unu sessio altera 25. Maji instituta est.

Hic primò causas Legationis congregatus Senatus excepit, Primariæ hæ numerabantur. Prima de armistitio cum Czarò, ad annos 14. secunda de conjunctione armorum, & ineundo fœdere contra Turcàm. Tertia de restitutione Civitatum Smolensko, Kiowia & Capitaneatus Wielissiensis, quibus Polonos privarunt; Quarta, denique de assumptione exercitii Catholicæ fidei: & de hoc ultimo puncto, statim hæc primâ propositione, nè ulterior mentio fiat, inhibuit Czarus: tam faventes sunt Catholicæ veritati, ut nè de illa audire velint, cum tamen aliarum sectarum exercitia non solum admittant, sed etiam illorum prædicantes & pastores propriis expensis alant. Alia adhuc puncta, quæ leniora & nullâ magnâ consideratione egebant, mox obtenta sunt.

Triduo præterlapso, tertiam obtulit Sessionem vigesima octava Maji, quâ, sicut & sequentibus, non nisi de prioribus punctis Consilia & disceptationes habitæ sunt. Sessio itaque quarta, data est secundæ diei Junii. Quinta Octavæ Junii. Sextam ordinavit decima Junii. Septimam decima tertia Junii; octava determinata est decima quarta Junii, & Nona, decimo sexto Junii. Ad quamlibet hanc sessionem, prædictâ comitati pompâ sunt Le-

gatos, curribus, equisque ad stuporem ornatis, & quod diligenter observatum est, quâvis vice ad commonstrandam Czari Majestatem, variatis.

Vulgus Ducem suum omnibus, quæ dari possunt, rebus abundare proclamatur, patrio adagio: wokazni Ezarzsky wosleho wosleho mnoho! id est, in thesauro nostri Czari omnium omnium rerum copia! cumque nos joci gratiâ Polonicè interrogassemus Maczel wokazni Czarzky Choroby; habetisne in illo thesauro morbos, & alia absurda; respondebant: Qenoster, id est, plena omnia: quæ subinde non parvo inter nos risui occasionem præbuerunt. Illuxit dies decimus octavus Junii, adeo frigidus & ventosus, ut nivem magnitudine nucis juglandis parem attulerit, quam subsequenter diei serenitas mox resolvit.

Vigesima Junii dies festus juxta antiquum Calendarium divo Theodoro sacer, valde celebris ob Natalem Czari fuit, nemo enim hominum cujuscunque professionis laborare ausus est, quamvis diebus festis, & dominicis laboratum sit aliàs communiter. Personabant à manè usque ad vespèrum in omnibus Ecclesiis campanæ tanto fragore, ut in explicabilem auribus insuetis causarint abominationem: dumque nos inexpectatam hanc solennitatem, satisque molestam miraremur; venerunt ad ædes nostras Adstites, Natalem sui Czari nuntiantes, eumque, ut optimam, quâ erga Legatos fertur, benevolentiam indicarent, jussisse nobis Convivium ad lætitiâ hujus diei solennius transigendam præparari, magnâ reverentiâ significârunt; quo audito vicissim Legati gratias agere omnia faustissima apprecari, natalémque ad astra usque extollere coram Adstitibus cepêre. Factum itaque ut adventante meridie, adventarint unâ coqui cum carris, cæterisque requisitis eo ordine, prout superius patefactum, omniâque ad epulas disponentes magnæ incrementa spæi convivii futuri melioris dederunt, cum dies lunæ fuerit, quo nos utique carnibus refecturos autumavimus. Sed fefellit spem præsentia quadragesimalium penè crudorum, ducentorum tamen ferculorum majori ex parte oleo lini infectorum. Hic verè deceptus est appetitus, dum unos

avcr-

avertebar oculos, alter nauseam concipiebat, tertius disgustu laborabat, tantum profectò acquisiverunt ex aspectu ardorem convivandi. Jamque Knias sui Czari nomine missus, Legatos invitatos ad triclinium deduxit, sed tam gratas videntes epulas, gratias pro delizioso hoc convivio egerunt, suoque ut frui possent prandio, & carnibus vesci, licentiam, quæ etiam concessa est, petiverunt. Interim hæc cruda anthropophagis digniora fercula se velle in diem abstinentiæ differre; quod etiam factum, & præfecti culinæ cujusvis Legatorum æqualem inter se divisionem facientes, ad proprias culinas deportari jusserunt. Haustum tamen, quem unâ attulerunt, absumere & pocula evacuare cum illis non omisimus. Illis absentibus nos inter tubarum, tympanorumque harmoniam splendide cibos consuetos epulantes, & in sanitatem Czari crateras alacriter à suis ponderibus levantes, solennitatem hujus Natalis consumnavimus.

Venit dies 21. Junii, quâ Sessio decima instituta fuit, ex qua cum Legati reduces venissent, videbantur, malè contenti, adeo, ut audiverim meum Principem dixisse sæpius, se malle cum ferocibus Tartaris, & Turcis agere, quàm cum inconstantibus Moscis, qui semel, statuta revocabant, & revocata iterum statuebant.

Sessio Undecima habita est 22. Junii. Duodecima 27. Junii. Decima tertia 28. Junii. Decima quarta 3. Julii. Decima quinta 5. Julii. Hæc Sessio exiguam dedit spem aliquid fructuosi in Legationis expeditione efficiendi, cum Moscos multum contrarios esse animadversum sit. Hujus dissensionis maximum processit momentum ex restitutione petita Palatinatûs Smolensk, & Kiow, & Capitaneatûs Wielisshensis, qui continet Civitates Schewirs, Newel, & Wielisch, quæ armatâ manu Polonis Mosci eripuerunt. Hæc restituere noluerat Czar, adeoque ut aliquod æquivalens peterent, insinuavit. Petiverunt ergo Legati sex Milliones aureorum, ad quod attoniti Mosci sexies centena Millia obtulêre. Hanc itaque improportionem, & vilipendentiam sui vicissim irridentes, & respuentes Legati, reposuêre, suum Regem

K 3

Polo-

Poloniæ posse illa, & velle, nî aliter concluderint, armatâ manu recuperare; ad quod responsum excandescens Czar, indignatîque Senatores, mox ordinare se velle Legatum in Turciam, unionemque armorum cum Sultano contra Poloniam inire. Interea verò Legatum Principem tanquam nimium pertinacem, captivum, servare tam diu, donec, qui negotium apud Sultanum successisset resciretur; Legatum verò alterum in Poloniam remittere minatus est. Triste erat fateor auribus inexpectatum responsum, ast sprevit innata indoli Polonicæ generositas fictiles has comminationes, huncq; pavorem, seque ad resistendum, & his obviandum præparare Legati intenderunt. Redierunt itaque in ædes & convocatis aliquibus majoris officii, licet aliquantum consternatis scænam hanc tragicam exposuerunt; cæteri, metum non exiguum concepimus, At in similibus jam exercitatus Lithuano-Polonus Genius, facilem invenit obviandi modum, ut contrarium pelleret contrario. Quocirca, ne prævaleret metus, collocatis in sublimi ad sonum lætissimè spargendum tubicinibus, & tympanistis; in pergulis quoque ordinatis variæ harmoniæ musicis, insolitæ lætitiæ argumenta, vino etiam largè propinato, dederunt; quod nobis omnibus tunc adhuc ignorantibus, quid sibi hæc tam extraordinaria & insperata lætitia vellet, mirum apparebat.

Præterlapsis in hoc dulcisono instrumentorum fœdere aliquot horis, advenère Adstites ad percontandum raræ hujus lætitiæ, causam; cum autem à nemine rescire possent, Legatos accesserunt; his benevolè exceptis, Legati mox scyphum, non parvum deauratum in sanitatem Czari propinavère, quem, nî sanitas Ducis fuisset, more suo respuissent, tam parùm affecti exteris, ut neque inter liberas Liberi patris delicias, ullam inire cum eis conversationem liberiores velint. Itaque volentibus scire hujusmodi lætitiæ causam, reposuerunt, Legatos non tantùm sibi invicem valedicere, sed & toti Moscoviæ; insuper Principem se in exilium parare. Hoc audito, præmissâ decenti salutatione abierunt.

Neque propter hoc interrupta est inchoata Legatorum lætitia.

tia, quæ cùm ad mediam usq; noctem continuo tympanorum fragore, tubarum clangore, musicalium instrumentorum sono personuisset, ipsum deniq; Czarum ad sciscitandum, quid hoc lætitiæ, & ubinam esset, compulit; turbatus quippe Czar, servum apud se dormientem vocavit, quem profundo sepultum somno excitare ubi non potuit, surrexit ipse, servumq; excitare intendens, arrepto lumine, barbam ejus pro more amplam, succendit, qui tamen expergefactus prius non est, donec barba incendii instar ad mentum usq; conflagrâset. Hic, quid secum ageretur ignarus, cùm barba arderet, clamare cœpit Palatium ardere. Missus itaque est ad sciscitandum, ubi nam esset, hæc lætitia? qui primò ob barbam miseram à Czaro accensam (hanc maximum ornamentum reputant) tristis abiit, & ductore tubarum sono ad aulam nostram advenit: ibi cum à nemine excubiarum, quæ tantæ causæ esset lætitiæ, condignè certior fieri potuisset, coactus est, retrahente quamvis ob combustam barbam pudore, illam ipsam, ubi lætitiæ signa dabantur, pergulam ascendere, ministrumq; Legatorum, quem obvium planè habuit, interrogare: Minister tam gratum hospitem mox deduxit ad Legatos, cui ad interrogationum idem, quod Adstites, responsum est, utq; imberbis hujus, & pustulis undiq; adornatæ faciei apud illos inconfuetæ, Moscum contemplari melius possent, scyphum vini in sanitatem sui Czari obtulerunt, causam quid sibi hoc genus faciei vellet, quærentes; quibus pudibundus combustam sibi à Czaro barbam cum fletu narravit: & sic responsum referens abivit; Interea Legati fortius exhilarari, & Tubicines alacrius inflare jusserunt, atque ita cum Czar ob irremissum barbarum clangorem somnum capere non posset, remisit brevi imberbem illum Legatis nuntiando, ut saltem in gratiam sui, quòd dormire non posset, ab inchoata lætitia cessarent: quod mox factum, & somno, vinoq; gravata capita quietem auspicata sunt.

Redeunte Sole advenerunt Adstites, indicantes Sessionem, ad quam licet nec dum serenatis capitibus, tamen perrexerunt. Hæc Sessio jam decima sexta, habita est 6ta Julii: quam excepit decima septima

septima 15. Julii & decima octava 16. Julii. His tribus sessionibus omnia secretè agebantur, ità, ut ne minimum quidem audiri potuerit. Sed non diu latuit unguibus suis exporrectis leo, quin unicus saltem latentem proderet. Nam cum Legati Reipublicæ suæ bono patrocinantibus causam suam fortiter propugnarent, neque perniciosi, violentisque sibi propositis conditionibus assentire vellent; Mosci quòd in cassum disceptationes caderent, injicere terrorem volebant. Jusserunt sequenti die advenire Podwodas (sunt rustici cum carris & equis) hoc prætextu, quòd Legatos ob nimiam pervicaciam, imperfectâ expeditione in Poloniam, ut onera eorum devehere juvarent, remittere vellent. Hic terror major erat præcedenti, dum omnia ad reditum à Moscis apparabantur, fictè tamen in gratiam movendi solùm Legatos ad conditiones sibi gratas eo promptius incundas. Sed & hîc oleum & operam perdiderunt; maluerunt enim imperfecta re Legati redire, quàm ad illud, quod Reipublicæ detrimento esset, consentire. Itaque currus & ipsi suos extrahere, reparare, res deferre, in currus componere, & se seriò pro itinere præparare, ceperunt. Videntes ergo Mosci se minùs minis, quàm prudenti conferentiâ efficere, iniuere potius de novo postpositâ omni sui confusione cum Legatis sessiones. Secuta ergo est Sessio in ordine Decima nona 21. Julii. Vigesima. 22. Julii, quibus factum est, ut vanis terrorum fictionibus relictis, paulatim ad oblatas Legatorum petitiones inclinarint.

CAPUT XVI.

Pacta inter Moscos & Polonos jurata.

UT primum illum metùm fulem exceperat jucundus tympanorum tubarumque chorus; ita secundum hunc inani terrore prætextatum, exsolvit duarum millionum summa. Ecce!

Quam gratus venit nobis post nubila Phæbus,

Et longo dulcis capta labore quies!

Itaque post translapsa disceptationum nubila, Vigesima prima Sessio

sessio undique rutilantem in candicantibus fortunæ quadrigis aureum nobis Cynthium 23. Julii præsentavit. Ad Legatorum Votum hæc sessio transacta est, dum utraque pars in consensu duorum millionum paratæ pecuniæ placide conquiesceret, & Capitaneatum Wielischiensis cum omnibus suis civitatibus, oppidis, & pagis Czar restitueret; tali tamen conditione, ut cum id in gratiam Principis Legati faceret, nulli etiam, nisi Principi illi, cederet, quod & à Rege Poloniæ præstitum deinde est. Conjunctionem quoque armorum contra Turcam inierunt. Ratione Fidei Catholicæ ob impetrata alia, ne illos disgustaret Princeps Legatus, nullam ausus est facere mentionem: atque ita afflantibus Tonantis pacifici favoniis, comitantibusque aggratulationum titulis, ad ædes suas recepere se se Legati.

Contigit his diebus, ut aliqua fæmina amoris sagittâ vulnerata, in aliquem Polonum ministrum Legatorum, sua vicissim spicula dirigeret; quod advertens maritus, eam verbis an verberibus? excepit. Fæmina semi, præ amore, rabida, partim ut majorem amandi faceret sibi licentiam, partim etiam ex ulciscendi ardore, marito suo morte guttur discindendo, dolorem suum ulta est. Ast prodita fæmina, pænas luere, non tamen vitâ privari debuit, cum hic ob homicidium, non nisi candelam unam, aut plures, in auxilium animæ occisi, & ad suam redimendam culpam, offerant. Quia tamen maritum occidit, hoc supplicium ei tulerunt, ut denudata, manibus retro colligatis, media in humum defossa, tribus diebus & noctibus duraret; absolutis illis libera dimitteretur. Quid factum? ecce canes, qui macerrimi passim civitatem, pabulum quærentes obambulant, sensu odoris ducti, miseram invadunt, mordent & luctantem, ad adstantium horrorem (neque enim eam defendere ausi sunt) dilacerant. Illa inermis vociferatione, luctamine, & dentium stridore, quibus non unum canem arripuit, se se ut potuit defendens, denique fatigata, post parvum tempus exanimata est, quam postmodum canes effoderunt, & ferè integram devorârunt. An non actus iste sit Tyrannicus, & planè bestialis dijudicandum Lectori trado. Secuta

L

est

est Vigesima secunda Sessio 24. Julii, & Vigesima tertia 25. Julii. His jam sessionibus omnia unanimi consensu peracta erant; solummodo roborans utrinque pacta juramentum restabat, ad quod persolvendum diem sequentem elegerunt, 26. Julii oriente sole ortus est non tam Sessionis, quam ceremoniæ spiritualis apparatus. Jamque Legati in aulam advenerant, deliberaturi, quo in loco iuramenti solennitas opportunè peragi posset, an in Hypocausto, ubi Sessiones peragebantur, an in Capella Ducis? Et verò resolutio Czari venit, ut in Capella perageretur. Hoc audito magna adstantium turba, in qua & ego fui, spectandi avida mox turmatim se intruserat; & ego quidem curiositatis gratiâ videnti Capellam Czari me inclinando, ne me viderent (indutus enim habitu Germanico fui) unâ cum aliis operâ sequentium intrusus sum: aliàs si me advertissent, ante portam profectò vigilias egissem. Cum jam intus existentem me Poppus quidam interrogaret, quid hîc vellem? quomodo ingressus fuero? quasi indignus tam sacro loco? nî forte adstantium testimonium, me esse baptizatum (quod cruce à me formatâ approbare debui) patrocinarum fuisset, me utique capellâ expulisset.

Hujus Capellæ D. Nicolao sacræ, de qua superius mentionem feci, pulchritudinem intrinsecam, splendorem, & pretium describere condignè non valeo, quippe ad splendentem auri, argenti, adamantum, & unionum nitorem nimium oculi mei caligârunt; proponam tamen, quod caligo ingenii mei imbecilliter assequitur. Intus capella est aliquantum tenebrosa, & angusta, altare Græco ritu per medium Capellæ quasi scenâ præcinctum, multo auro, argentoque ditissimè adornatum. Superius per latitudinem Capellæ stant duodecim Apostolorum pulchro ordine dispositorum imagines, in quorum & altaris medio visitur Salvator noster. Sub illis siti sunt eorum Patriarchæ. In medio altaris, sub Magistro Apostolorum, est porta duarum alarum, quæ tunc etiam aperta fuit, post quam conspexi majus altare divitiis ingentibus coruscans; & in hoc celebrant sua sacrificia. Utrunque ad partes Capellæ duo altaria, in quibus dextrorsum Christus

Do-

Dominus in statura pictus per magna: sinistrorsum Mater DEI ejusdem staturæ, & proportionis. Penes quodlibet hoc altare, erat iterum porta minor, & ad latera iterum duo altaria. In uno S. Nicolaus apud eos in cultu summus Patriarcha; in altero B. Virgo infantulum in amplexibus gestans, quæ tam formosa erat, ut videntes, eam inviderint huic loco. In medio Capellæ stetit altum scabellum ad legenda Evangelia aptum, cui sumptuosus splendorem addebat tapes; in hoc positus erat Evangelii liber ad octo digitos crassus, artificiosè auro, argento, omnisque generis unionibus distinctus; hunc circumdederant Poppi elegantissimè apparati, expectantes Senatores Moscos, & Legatos.

Interea Princeps Legatus misit currum pro suo, coram quo depositurus esset Juramentum Dominicano Capellano, qui sumtis Albâ Missali, & Crucifixo, candelis & facibus, unâque imagine argento circumquaq; largè obductâ Beatissimæ Virginis, cum altero quoque Excellentissimi Palatini Capellano in aulam advexit; cumque jamjam Legati ad Capellam descendere vellent, repugnârunt Capellani, causati non convenire in schismatica Ecclesia ceremonias Catholicas peragi; unde factum, ut hypocaustum, eligeretur. Missus itaque est Diak (quasi Cancellista) ad Moschorum Poppo nuntiando Legatos non posse, nec audere in eorum Capella juramentum persolvere, adeoque ut illis ascendere placeret. Itaque assurgentes, hoc processerunt ordine. Primò ibant duo Czernici, id est Monachi, vestitu induti Diaconorum, scabellum supra nominatum portantes; tum unus totam inauratam candelam præferbat; huc sequebantur duo Poppi, quasi Parochi, splendide ornati, thurribulis librum Evangelii suffumigantes, quem duo quasi Abbates portantes procedebant. Hos duos valde pretiosè auro gemmisque elaborata ornabant paludamenta. Ad latera horum duo magna candelabra argentea candelis accensis portârunt duo quasi Diaconi sumptuose vestiti, qui subsequenter tandem habuerunt Grandævum quendam quasi Episcopum, qui unionibus maximis undique in flores affabre circumfusus ornatum paludamentum gerens, stipantibus iterum la-

L 2

tera

tera duobus Capellanis æquali splendore ornatis, graviter progrediebatur. Hic meus denuo sollicitus erat ingrediendi animus, cumque turmatim ad ipsam hypocausti januam devenissemus, aliquam inter se moverunt Senatores quæstionem, quæ antequam decisa esset, nos ultra horam foris expectare fecit; tandemque intromissis aliis, ego magna cum difficultate etiam ingressus fui.

Primò ergo Monachi, in medio scabellum posuere, supra quod liber ille grandis collocatus fuit, & tum ad latera cum candelis accensis stabant. Omnes ordine Dignitatis dispositi: ita ut proximus huic libro steterit Episcopus. Processerunt itaque singulatim Senatores Mosci ad hunc librum; & præoravit primarius ille Knias, quasi Princeps, formulam juramenti Rutheno idiomate, quam alii repetentes, se frequenter, & profundè coram illo libro inclinârunt, finitaque formulâ cum profunda reverentia abierunt. Capellanus noster Dominicanus extruens more Catholico altare, duobus Cubiculariis faces tenentibus, in Alba & Stola sedens, Legatorum juramentum excepit; & sic finita est utrorumque Juramenti solemnitas, atque ne roborata semel partium juramentis pacta vacillarent, petiverunt Legati etiam ipsius Magni Ducis pro Confirmatione juramentum, quod exsequentibus unâ electâ diebus persolvendum Senatores promissere.

Nostri aliàs recreatio & distractio his temporibus communiter erat in Kukui Civitate, ubi cum Germanis vel lusui pyramidum, vel colloquiis, sed maximè poculis cerevisiæ evacuandis, (eius bonitas plurimum nos allexit) studebamus, Nostræ Dragoniæ seu militum defultoriorum Leitenontius seu Locum tenens, quandam juvenem Viduam Lutheranam ibi adamavit, & cum ea sponsalia inivit. Habuit hæc Matrem, Vitricum, Fratres, Sorores, & amicos copiosos. Vitricus hic natione Germanus, multis ante annis in militia Czari fuit, Geometræ, aut Magistri Artilleriæ munus gerens, dumque aliquot annis inter inconditos Moscorum mores perseverasset, petiit amore dulcis soli ductus, patrios penates revifere. Sed infelix ex solo insinuato abscessu tam graviter impegit, ut vix non vitam perdidisset: Sciverunt illi, quod

quod omnis eorum fortificationis cognitionem haberet, adeoque ex timore prodicionis, & immitti in alienigenas rabie, varias incum tulerunt Sententias, ex quibus hæc electa fuit, ut manus & pedes illi, ne aliquomodo invitis illis se se subduceret, confringerentur, manus verò dextra planè absceretur: quod executioni etiam datum est, nisi quod locò manûs dextræ, sinistrâ privatus sit, cum se Lutherannum professus, debere crucem dextrâ formare diceret; adeoque ne prorsus formatione crucis orbaretur. Miser homo genibus serpere coactus, vix sanatus est, cum alterum itidem ei obviavit infortunium per hæc nuptias. Cum enim venisset ad Przisaz, hoc est Cancellariam Germanicam cum Supplicatione pro licentia filię celebrandi nuptias impetranda, eaque denegata fuisset; nihilominus, quia sponsus ex Legatorum aula erat, qui copulationem eo respectu sibi impunè futuram sperabat, adeoque apud hunc Vitricum nuptias porro urgebat, ideo tandem, etsi contra Decretum Cancellariæ, in nuptias clandestinè peragendas consensit. Itaque sponsam assumptâ prius fide Catholicâ, vinculo matrimonii per Capellannum nostrum Dominicanum sponso juncta, Nuptiarumque sollemnitas celebrata est in domo cujusdam Viduæ relictæ post Capitaneum Regiminis. Latuerant inter dulcisonos applaudentium choros per duas dies; & ecce tertiâ die ex improvîso veniunt vigiliæ, sine misericordia illam hospitam Viduam, ac hunc contractum Vitricum, & alios adhuc convivas, in carcerem deducunt: Sponus tamen, sponsa, & Mater expeditâ pedum alacritate evaserunt, & sese in Civitate absconderunt. Captivi ergo omni spe liberationis amissâ pænas luere debuerunt, atque ne iste contra moderatorum licentiam commissus excessus traheretur in exemplum aliis, mox Viduam ad forum deducunt, publicè ad terram prostratam detectâ togâ verberant nudam loris, continuis quinquaginta facillè ictibus, nullis lamentis mitigati, neque adstantium precationibus commoti donec numerum, qui assignatus erat, persolverent. Misera fœmina immota jacuit, & credebatur à nobis exanimata: applicato tamen ad nares confortativo, sibi restituta, atque in manibus

nibus fœminarum, concomitantibus lacrymis domum reportata est. Vitrico illi licet confracto, idem factum bacillo & centum ictibus culpa redempta. Instrumentum hujus tam placidæ executionis est bacillus, vix crassitiem auricularis digiti exuperans; nihilominus tam durus, & firmus, ut non faciliè frangatur: hoc modo delinquentes verberati ad horrorem vociferantur. Hoc genus (quod Batogi vocant) Verberationis vix non quotidianum est, nam quodlibet, etiam maximum, facinus, quia libentissimè fletus, & gemitus audiunt, hoc modo vindicant. Aliud adhuc genus, quod Knoti appellant, est flagellum simile illi, quod pro equis coercendis in ludo equestri habetur: in fine tamen sunt fila ærea unius spitamæ longa. Hoc flagello plerumque animam e corpore pellunt, quia quilibet ictus horridè pellem discindit. Cæterum incarcerant, fame, & levioribus pœnis torquent.

CAPUT XVII.

Inconstantia Moscorum: Czechrinum à Turcis captum: Benedictio fluminis.


A Deo inconstans, & infidus est Moscorum animus, ut fidem juramento publico firmatam moventibus stomachum quibusdam scrupulis non plus ultra unam noctem servare potuerit. Ratio, quam adstruebant, fuit, quod præcedentium Legationum pacta, quæ Andrussoviensia nominant, non confirmârint. Instituta est itaque Sessio vigesima quinta 27. Julii, ad quam citati Legati, existimantes Czari juramentum splendidè futurum, comparuerunt; sed fefellit opinio, cum illa pacta, quæ Mosci servari volebant, sex integrarum horarum lectione indiguerint, ita ut nos hujus extraordinariæ moræ causam ignorantes, variis animum nostrum conjecturis oneraverimus.

Recluso 28. Julii Solis jubare vigesimam sextam Sessionem iniverunt. Hæc Sessione sperabatur procerto Juramentum Czarifore, sed vel propriâ Moscorum dissensione, & discordiâ, vel Ducis ipsius inconstantiâ factum, ut ob privatam inter se alterca-

tionem

tionem, impeditum fuerit. Latuit hic angvis in herba, cum Senatores alii juramentum servare, alii mutare, alii prorsus revocare conati, discordiæ semina sparserint. Ut igitur Legatorum conatus detinerentur, juramentum Czari donec in placido omnes consensu, conquiescerent, differebant. Secuta est Sessio vigesima septima 1. Augusti. Sed neque hæc quidquam fructuosi peractum est, solum de Juramento Czari disceptabant, quod sequenti die futurum Senatores (sed invanum cum nulla fuerit Sessio) sponponderant. Interea bona advolvit fama, afferens Victoriam contra Turcam, ante Civitatem Czechrin obtentam, quæ totâ æstate ab eo cum bis centenis armatorum millibus, oppugnata, & totidem millibus à Moscis defensâ fuit. Narrabatur autem, quod Generalissimus Radamanowski, cum suo exercitû Turcam ex una parte castris exuerit, & ad 50. eorum millia, spoliis ingentibus acquisitis trucidaverit. Quia tamen magnâ etiam sui exercitûs parte spoliatus fuit, incidit in Czari indignationem, qui cum revocare, & officio dejicere decrevit. Amicorum tamen beneficio iterum reconciliatus, ob mox narrandam inimicò illatam cladem, conceptum Czari odium cum favore, & æstimatione commutavit. Cum enim Turca, non adeò castra deperdita curans, fortius Czechrinum obsedisset, atque expugnatam Civitatem etiam totali ruinâ dedisset, Generalissimus arcem Civitati adsitam ingreditur; & quia benè advertit, nec hanc diu teneri posse; clandestinè cuniculos in arce fieri, & multo pulvere repleti fecit, ac inimicò arcem sponte in potestatem tradidit, quam cum Turca plenus applausu, toto cum milite ingrederetur, & circumcingeret, ecce incensis à Generalissimo cuniculis multa millia Turcarum una cum arce in aëra abierunt, pluraque adhuc millia terra obruta, & viva sine vespillonum adminiculo sepulta sunt.


Vigesima octava Sessio, 6. Augusti habita, in qua graviter utrinque disceptabatur, ita ut cum radio, & indignatione Legati secedere coacti sint, maximè cum animadvertissent, Moscos non



non tantum in pactis plenisque jam juramento firmatis vacillare, sed & à toto velle recapitulare.

Nona Augusti secumtulit Sessionem 29. hanc nil perniciosius Legatis erat, cum ob perniciosam instabilitatem ab hora nona matutina, usque ad quartam vespertinam contrarios inter sermones disceptatum sit, atque fastidio comitati domum Legati, primo tunc prandio sese refecerint. Mirabile equidem est, quod dum tamdiu Legati intra Comitiorum parietes cum Senatoribus graviter, & gnauiter contenderunt, ipsi etiam ministri eorum cum Moscis rixas sæpe sæpius ad vitæ exitium, nā vigil excubiarum diligentia adfuisse, iniverint. Maximè & primariò ex orientibus ob fraudulentas pellium sobollinarum Venditiones. Cum enim rixosos, & judæorum more deceptores advertissemus Moscos medietatem æstimationi offerebamus. Hic statim Mosci ad blasphemias, & stommata descendentes, reciproce subinde etiam colaphis excipiebantur, & ulterius devotum fuisset, nā vigilæ statim advenissent, quæ advertentes nimis blasphemum venditorem, sæpe baculis dorsum ejus dimensi sunt, cum epiphonemate. *Pudy / Pudy / bledyn Syn.*

Trigesima Sessio, in ipso Festo S. Laurentii 10. Augusti indicta propter nostram S. Martyris solennitatem manè differenda fuit, neque enim festis nobiscum concordant. Ab hora tamen secunda usque ad decimam noctis, verbis pugnatum est. Videbatur namque Moscis difficile reddere Urbes Smolensk & Kiow; æquivalens quoque torquebat dare nimirum summam duorum millionum monetæ Polonicæ (quæ summa non nisi bis centena millia efficit aureorum) nulla tamen ulteriori disceptatione egebant, cum jam dudum postulatis Legatorum assentientes, juramento publico id firmaverint. Interea anniversarius oriebatur dies 11. Augusti, quo Patriarcha aliquot stipatus Prælati fluvium Moscuam benedicere solet. Ascendit ergo cum Poppis suis theatrum, quod extructum mox sub arce Czari, supra fluvium erat, egregiæ amplitudinis, sed tam demissum, ut aquam exporrectâ manu attingere potuerint: Qualibus autem ad benedictionem hanc



hanc ceremoniis usus sit Patriarcha, videre propè erat impossibile, cum tantus hominum concursus, qui annuam illam spectabant solennitatem, fuerit, ut omnes omnino angulos adimpletos adverterimus. Itaque eminus spectare coactus, conspexi plurimas corporum inclinationes, magnæ crucis argentæ ad populum præsentationes, qui universim inclinato profundè capite crucis continuò formabant, cumque ceremoniarum finem advertissent, universim sexus utriusque parvi & magni cujuscunque fuerunt conditionis se vestibis exuere cœperunt; ubi demirari primò nos fecit quid sibi hoc vellet? Benedicto ergo flumine accepit Patriarcha imaginem Beatissimæ Virginis Jesulum portantis, tribusque vicibus immergit: & eo momento se Mosci turmatim in aquam abjicere ac sine omni verecundia nudi, aquæ benedictæ immergere promiscuè festinabant tanto numero, & fluvius intumuerit, & pontem ei supernatantem elevaverit. Quod dum mirarer sciendi avidus, percontatus sum, quid hæc imaginis immersio secum ferret? at responsum non satis potui intelligere. Nihilominus tamen hanc suæ causam immersionis dederunt: Infantes hic baptismo initiari, ac denique omnes delinquentes remissionem peccatorum, & insuper indulgentias consequi. Peractis optimo successu illis immersionibus & indecentibus clamoribus, vix Patriarcha cum assistentibus suam attigit residentiam, ecce in Zemlenigorod ignis horâ primâ pomeridianâ exorsus, exustis jam aliquot plateis, antequam homines flumini innatantes, se ad pulsum campanæ ignem denuntiantis, induissent, & accurrissent, usque ad horam sextam tam potenter profecit, ut pene sex millia casarum cum hortis, frumento, pecudibus, Ecclesiis plurimis, ad liquefactionem campanarum, & aliquot hominibus consumpserit; neque tam facilè sopitus fuisset, si ad muros albos usque, qui Bialgorod nuncupantur, delatus à ventis non fuisset, ubi nullum reperiens pabulum, paulatim extinctus est.

Trigesima prima Sessio evenit 15. Augusti, quâ nec ipsi festo Beatissimæ Virginis in cælos assumptæ, post prandium pepercere. Exoptabant enim Legati semel ab illorum instabilitate & ignominiosa

niosa ingeniorum vafritie liberari. Sperabant quoque tandem juramentum Czari subsecuturum. Ast Mosci pacta sua jam jurata iterum reformata, altero novo juramento roborarunt. Necdum Legati erant de fine sessionum futuro certi, cum jam Moscorum egregiam inconstantiam experti, an non adhuc pacta, & juramentum pertubaretur, expectarent. Restabat semper Czari juramentum, quod studio differebant, ut retrocedere, si aliquid occurreret, possent. Tandem tamen Adstites resolutionem deponendi die 17. Augusti à Czaro juramenti, Legatis denuntiantes, magno nos omnes gaudio repleverunt.

CAPUT XVIII.

Juramentum Czari, & Finis Legationis.

ITaque sub auroram 17. Augusti, omnes Aulici sese ad assistentiam Legatis præbendam splendide adornarunt. Circa nonam matutinam adventantes cum Rheda, magnificoque comitatu Adstites, exceperunt Legatos, atque cum omnes jam paratos vidissent, non diu morantes, locatis in Rheda Legatis ad Sessionem trigessimam secundam 17. Augusti perrexerunt; ubi horâ integrâ inter se adhuc disceptantes, (cujus disceptationis capita quidam Kniaz Czaro ultro citroque referebat) demum Sedatis disceptationum Euris conventum est. Deducti Legati ad audientiam Palatium Magni Ducis jam in Throno sedentis, adstante ad latera ejus Nobilitate sumptuosissime indutâ, Juramenti solennitatem spectarunt. Hujus brevis erat ceremonia. Primò enim advenit, quasi Episcopus, cum aliquot Poppis, librum Evangelii portantibus: collocatis illis ante Thronum, supremus Præfectus præoravit juramenti formulam, quam Czar inclinato paulisper vertice, repetens, ita persolvit juramentum; quo peracto stabilita, tandem fundamentaliter sunt Senatorum pacta, & Legatorum feliciter finita expeditio.

Hic etiam Dux ad Regem tradi jussit compactata, statimque adstans Kniaz, inclinando se ante Thronum, accessit Legatos, eisque

eisque litteras commissoriales ad Regem magno cum sigillo munitas tradidit, quibus assumptis profundam Czaro reverentiam facientes, de peracto tam feliciter Legationis suæ successu, & affabili erga se suosque Czari benevolentia, gratias agentes, magno cum solatio domum regressi sunt. Jam igne cupiditatis flagrabant præcordia ob donum, quod impertiri omnibus Legationis Aulicis, magnus Dux consuevit, diemque magno desiderio expectabamus.

Ante occasum diei hujus, venerunt ad Legatos Adstites, nuntiantes, sequentem determinatum à Czaro esse diem pro ultima audientia, & manûs osculatione: unde conclusimus nos brevi vale obtenturos, defatigationisque nostræ terminum bonum, fructuosumque assecuturos. Advenerunt itaque adventante aureo auroræ amictu, majori comitati numero, & splendore pro Legatis; quippe sex equos albos notis subnigris, ad instar tigrum variegatos, & ad Rhedam totam deauratam junctos (quæ ambo præcedentibus annis Legati Galliarum dono dederant) ad devehendos in Sessionem obtulerunt Legatis. Hæc ultima trigesima tertia Sessio, vel potius valedictio 18. Augusti obtinuit. Deducti sumus ad aliud ædificium, ligneum tamen, Legatos comitantes, quivis enim ultimæ præsens salutationi esse cupiebat. Erat hypocaustum tapetibus Romanorum præliis eleganter insignitis (hoc quoque Rex Galliarum Antecessoribus Czari præsentavit) exornatum, cujus tabulatum Cælestibus signis cum Zodiaco planetarumque cursu depictum erat. Ingressi Czarum in humili Throno sedentem conspeximus, qui reducibus Legatis iter felix precatus, sua quoque munera Regi, Legatis, & cæteris Aulicis distribuenda promisit; quæ quidem dona neque artificiali venusta ingenio, neque aureo, argenteoque onusta decore, sed hirsutis pellium sobolinarum villis, magnificentiam, & liberalitatem Czari designarunt. Ad demonstrandam demum Czar suam gratiam, porrexit manum dextram Legatis & Aulicis præcipuis osculandam; valedicens Legatis, Fratrem suum Regem Poloniae salutandum commisit, & adhuc ad ultimum convivium, quod in no-

stram deportatum est aulam, Legatos invitavit; sicque dimissi sumus. Vix ergo domum regressi, jam currus cibus onusti cum coquis, & rebus culinæ necessariis eodem splendore, ut jam bis memoratum est aderant, qui tamen, quia denuo crudi, & jejunales cibi, cum dies carniū fuerit, parum placebant.

Huic ultimato Convivio assidendum erat, necessariò, nè offenderetur Czar & spretus ejus videretur affectus. Quamquam delicatus ventriculus eo parum delectatus sit; Vinum tamen aliqualem, quod triplex apposuerunt, addidit gustum. Mosci, qui ad inserviendum assignati erant, strenuè pocula levare juverunt, ita ut accenso jam cerebro, quod per mixtionem cremati, mulsi & vini citissimè sit, ad clamores, ululatus, & etiam rixas descenderint; ad quod attoniti Legati, præsentiam suam condignè non æstimari, indignati sunt. Hoc advertentes Adstites, nè aliquod malum, cum utrinque humor verticem obsedisset, eveniret, pervigilias hos rixatores, & ebriosejici mandârunt. Neque diu inter hanc cruditatem ciborum & haud moratam Moscorum perversitatem, morabamur, sed ordinarium adeuntes prandium, quod carnes præsentavit, appetitui meliùs consulimus. Cum ergo utraque pars jam pacta approbata juramento publico firmâset, pacificamq; amicitiam inivisset, hanc suæ Liberationis occasionem arripuerunt Sclavi, qui tempore belli ante Smolenscum captivati erant, & in eum usque diem in magnis molestiis, ærumnis & laboribus degere cogebantur. Convenerunt igitur aliquot, & quidam ex illis, accedens suum Dominum, petivit captivitatis remissionem, ut cum Legatis rediret in Poloniam; quem furens Dominus non tantum non dimisit, sed diris adhuc tractatum verberibus, carceri mancipavit. Rescitum hoc ab alio, qui nè & sibi idem accideret, acceptis rebus suis optimis, clam ad aulam nostram confugit; Tertium hoc attentare volentem, qui Nobilis Polonus erat, uxore & prolibus impeditum, prævenit Dominus, & ingenti ferreâ catena vinctum, à proposito abstrahere tentavit; ast captivus, tyrannidem Domini dolo tali evasit: Jussit ab Uxore mutuo accipi pallium Germanicum, & pileum, catenasque

nasque telâ ad impediendum sonum circumvolens, summo manè transcendit sui claustrum muros, atque vigilias nostræ aulæ, quæ Germanicè vestitos sinè impedimento intromittebant, pallio involutus præterivit. Hic de libera, securitate acquisita, DEO ter optimo, gratias egit. Si enim à Vigiliis agnitus fuisset, non tantum detentus, sed pristinæ captivitati Domini sui traditus fuisset. Itaque concatenatus ante Legatos comparuit, quibus deplorandum statum suum, cæterorumque Sclavorum, quos Mosci jam aliquot, ad mortem usque verberârunt, enarravit; quocirca consternati, egerunt de novo pro liberatione captivorum cum Adstites Legati, ut omnino concederetur à Czaro omnibus, quicunque cuperent abscedere, ut securè comitatui Legatorum accederent. Noverant jam Legati perversitatem Moscorum: itaque qualis nam hæc esset pacifica conventio iracundo exprobrantes vultu, tandem hoc obtinuerunt à Duce; qui non tantum annuit, sed insuper in gratiam Legatorum, Dominum illius concatenati, egregie puniri jussit. Copiosi advenere cum liberis, & suppellectile sua captivi, redire in Poloniam exoptantes, quos Legati unâ simul assumpsērunt. Multi vicissim nostrorum aulicorum servi, à Moscis persuasi, manserunt, sponteque in servos illis sese, promissione magnæ solutionis deliniri, dederunt. Ast graviter decepti: vix enim iter nobis aggressis, paucos post dies, dorsis eorum pecuniæ locò, verbera largè solvebant.


Vergente jam ad occasum Legationem, non otiosus quivis suarum rerum satagebat, aut aliquid coëmendum sollicitè quærebat.

Die decimâ nonâ Augusti, advecti sunt currus onerati vasis pecuniâ repletis, quæ Imperialibus, & aureis, plurimum verò Kopicis constabant; pro quâ revidenda, & computanda, tres penè dies insumpti; & iterum pecuniâ numeratâ sacci, saccis vero vasa repleta, securè constituta sunt. Huic numerationi præerat Dominus Gumowski, Vir scientiis præ aliis excultus: Domino verò Zbrofzek commissio data est, saccos illos ad vasa componendi & obserandi. Deerat ad hoc opus Vietor, adeoque necessitate ur-



gente acceptus est Carpentarius, subditus nostri Principis, (qui pro reparandis curribus nobiscum assumptus erat) ut vasa hæc videret. Hic victus cupidine circa hos saccos refertos (quilibet eorum mille florenos Kopicarum continebat, florenus autem sex grossos Boëmicos æquivalet) animum quoquoersum voluebat, quo modo unum juris sui faceret. Evenit, ut Dominus Zbrofzek occupatus transpositione saccorum, se se averterit. Hæc occasione unum saccum Carpentarius in caligas recondidit, illudque vas alacriter, tam egregiâ recreatus prædâ, vievit. Ventum erat ad prandium, & ille à labore vacans, usus temporis favore, saccum illum abscondit. Peracto prandio reassumptum est negotium, & ecce Dominus Inspector Zbrofzek recolligens mente matutinum laborem, advertit se in errorem devenisse, & commiscuisse saccum Imperialium, cum saccis Kopicarum: quæ tamen jussus fuerat separare, Coactus ergo aliquot iterum vasa solvere, perlustrando saccos, unum abesse cognovit: qui terrefactus & stupore percussus, quisnam tam versipellis præse se furtum tentasset, cum suspectum haberet unum Carpentarium, hunc perquirere, pulsare, sibi verò crines evellere ac vociferari cœpit. Carpentarius simplicissimos formando gestus, se nil habere pejeravit: Quid factu opus? Adivit lamentans Dominus Principem, & mille florenorum jacturam, conquestus est, sed quid? responsum erat tritum in aulis. *Videris tu*: Nihilominus Princeps compatiens misero, consuluit, ut nullo rem clamore aut rumore prosequeretur, sed ac si refartum esset, paulisper dissimularet, furi impossibile fore, hos mille florenos secretò habere. Obmutuerunt ergo omnes, neque mentione rei ullâ factâ, eventum bonum præstolabantur, qui etiam, quod suo loco narrabitur successit. Hanc summam in tres Legati ad vehendum facilius, diviserunt portiones; duas Princeps accepit, pro Regno Poloniæ, tertiam Palatinus Polocensis, pro Magno Ducatu Lythuanix. Jam nil aliud supererat, quàm ut dona à Czaro, in remunerationem eorum munerum, quæ, ut dictum est, ipsi Ministri Legatorum sub audientia prima Czaro etiam obtulerant, subsequerentur. Factum demum, ut Adstites

cum



cum uno Kniaz stipati pluribus militibus, in perticis supra humeros dona illa à Czaro promissa, nempe pelles sobolinas superbè portantibus, advenerint. Hic Kniaz Legatis salutem à Czaro deferens, hisce muneribus Legatos, cæterosque ministros donari significavit; statimque indice prælecto hirsuta pellium præsentatio, proportionatè, quantum æquivalere judicabatur, Legatorum donis, inchoata est. Quia verò ministri suis minimè equipollere donis animadverterant; sobolina non tantum rejecerunt munera, sed etiam sua ab Adstitibus sibi reddi petentes, argentea cimelia, risu utrinque personante, receperunt. Reliquas etiam pelles, quibus minoris conditionis servi ditandi erant, Legatus Princeps occupavit. Hinc muneribus Czari, quæ omnibus etiam minimis munificè distribuere suevit, nos privati sumus.

His diebus advenerunt Poduodæ facilè quingenti cum carris ad Legatorum res commodius, ut currus magni allevarentur in itinere vehendas. Seriò hic omnia parabantur pro itinere; tantummodo decretum Ducis expectabatur.

Non sunt passi nos in hoc statu multis diebus; siquidem 23. Aug. Adstites venerunt Legatis nuntiantes crastinum diem processionem destinatum; ad quod attoniti moram petiverunt Legati, esse festum Sancti Bartholomæi Apostoli Domini, solemnitatis magnæ: Se velle aliquot adhuc diebus, propriis vivere sumptibus: Sed in hoc amplo barbariei mari, arenam numerârunt, voluntas denique Ducis exequenda erat.

Die 24. Augusti, constituerant Legati, tardiùs mandatum hoc exequi, adeoque accingere manus operi cunctabantur, ut hac ratione unam adhuc pernoctationem extorquerent. Ast vexavit incassum futile pondus, palmosum Moscovitici fructiceti cor, cum depressa quantumvis Palma, eò pertinaciùs assurrexerit, decretumque semel suum exequi compulerit. Quam fervidi sint Executores inviolabilis mandati Ducis sui, & quàm violenter Legati hoc adhuc die discedere coacti, infra, cum reditu in Poloniam recensetur.

CAP.

CAPUT XIX.

Mores Moscorum, & Terræ Constitutio.

MOres gentis hujus quantum morationis tempore deprehendi, adeò instabilitati sacrificant, ut occultâ quâdam qualitate cum Luna mutari, ejusque reverâ ectypon nuncupari mereantur. Devotionem eorum quod attinet, non multum ingrediuntur templa, sed ante fores stando, plurimas formant cruces, sicque obligationi satisfaciunt: plurimum tamen, sono campanarum incredibili, solennitates suas celebrant, quas & aliàs quoque indies, studio devotionis compulsant. Si quem visitant etiam negotiorum causâ ingredientibus hypocaustum, non prius respiciunt hominem cujuscunq; conditionis ille sit, sed statim imaginem Beatiss. Virginis Jesulum gestantis (cùm minimus quivis imaginem talem ex argilla aut alia materia, in conclavi è regione portæ locet) inclinato capite salutant, & tres formant cruces; quod ipse à nostris Adstitibus observatum spectavi. Tum primò negotia sua, proponunt. Amicitiam mirabili commonstrant ritu, siquidem non tantum intra, sed etiam extra parietes, imò publicè in plateis indiscriminatim viri, pueri, mulieres, & virgines sibi noti, obviantes, se se mutuò excipiunt osculo, sicq; consanguinitatem, & amicitiam patefaciunt. Si verò ad invicem conveniant (quod rarò fit) statim Scyphum cremato plenum ex speciali ligno patrio nomine *Rapow drewo* certæ magnitudinis elaboratum, (cujus sortis binos quoque unâ mecum in Patriam attuli) offerunt; hunc singuli evacuare, cum semper sanitate Czari insignitus sit, tenentur; inde quoque nomen *Winiſa Osudarſa* / quasi vinum, vel haustus Czari, acquisivit. Absoluto hoc, si ad prandium hospes adest, propinatur cerevisia, dein mulsum, ultimò vinum multiplicis sortis. Hunc itaque morem, dum nos sæpius prandiis exciperent, observabant. Uxores suas, quamdiu epulæ durant, nusquam admittunt, nisi aut hospitibus magnæ æstimationis, aut amicis perblandæ charitatis id petentibus, tunc enim Uxor, quam



quàm splendidissimè induta sese præsentat, moxque prope fornacem manibus post dorsum sepositis se collocat; hanc hospites benevenire jubentes, accedunt, singillatimque manus etiam, sicut illa, post dorsum tenendo, porrecta sibi invicem ore sese mutuo deosculantur, atque ita favoris, amicitiaque argumentum denuntiant. Illa demum osculo suscepto, scyphum cremati uni alicui propinans, abit; subinde & à marito licentia datur, sua cum uxore longiori intervallo, etiam absente se, discurrendi, & ad placitum confabulandi.

Incessus eorum uniformis. Mares in togis longis ex materia aqueo cinerei coloris, manicis trium penè ulnarum, quas plurimi, pro ditiori statu, in brachiis complicant, Mitris altis; capillis ad morem Judæorum rasis, barbâ, quæ communiter ruffa, nunquam rasâ, laxato thorace (qua de causâ ventre sunt præpingues) incedunt. Ocreas ex Turcica pelle flava, cærulea, vel etiam viridi, viliores ex nigra, pedibus angustè, affabrè tamen adaptatas, portant. Fœminæ verò mediocris conditionis, veste bombicinâ, plerumque flavâ indutæ, manicis longis aut terram verrunt, aut complicatis brachia contegunt; neque facilè ulla his carebit; quia præcipuo apparamento destituta putaretur. Pallia quibus se diebus festivis adornant, ligulis undique circumfuta ad modum nostrarum in Schabes Judæarum, manicis itidem dependulis, gerunt; Caput tegunt mitris in modum pilei supernè rotundis, limbo in quatuor cornua obliquato, quas decentiæ causâ aliâ adhuc telâ persicâ ad faciem unâ velandam contegunt. Corporis tamen reliquo indumento semper dissoluto & discincto, ut propterea monstrôsæ sint crassitie; faciemque fucò tam affabrè illinunt, ut farinâ aut pulve circumspersas primo intuitu diceres; nihilominus nè albedo in pallorem degeneret, eam rubore delicatissimè attemperant. Quæ altioris sunt statûs, Uxores nempe Principum Kniasorum, & Bojarorum, communiter, curriculo exiguo ad modum parvæ Rhedæ, unico equo helcio ornato, vehuntur, aurigante aliquo puero, vel Sclavo miserè pellibus hirsuto nudipede. In curru serva, aut Sclava, scabelli munus, per-

N

agit

agit, cui præpinguis Domina pro lubitu & commoditate pedes suos, supra caput, aut humeros superponit. Spectaculum perjurandum fuit videre, quod ad minutissimum quemlibet currus motum, foeminae pondus pinguedinis assidue agitaretur.


Juvenes utriusque sexus proprium observant vestitum. Adolescentes in togis curtis coloris cinereo-aquei genua non excedentibus circumcunt, qui ut subtiles, & celeres sint, arcte sese constringunt; ad femur cultrum longum in vagina (frameas enim, quas Czeczuga vocant, portare non nisi militi concessum est) alligant, quo nihilominus sæpè in rixis sibi ventres discindunt. Collum quoque monili unde quaque unionibus circumsepto, & ad tres digitos lato, condecorant, in manu bacillum, illis *Tarvolla* gestantes.

Puellæ manicas indusii, plusquam maritalæ complicantes, longas ex cœrulea tela togas, manicis vestium, pro more, per terram serpentibus circumferunt. Capillis ad modum nostratium habreatum bifariam discriminatis, latis ligulis obvolutis, atque in fine duobus lemniscis dependulis superbiunt. Fronti (quæ supra modum, ut & facies tota, fucata) cingulum stellulis tremulis, unionibusque elaboratum alligant. Harum labor & occupatio, plerumque est lotura, quam baculi longi extremitatibus æquali utrinque pondere alligatam, humeroque in æquilibrio impositam, manibus haud quaquam applicatis portant, & ita armatæ ad pontem fluvio supernatantem procedunt Moscua, ubi quoque juvenes turnatim convenire solent, & nugas varias, petulantias, balnea, sui invicem comperisiones, & quis singula enarrabit? exercent. Lusus eorum non adeo honesti. Plebei plurimum in plateis conveniunt, ubi ferreum circulum vix peripheriam floreni nostri adæquantem, in terram tribus circiter a se passibus projiciunt, unusque eorum se incurvat, super cuius dorsum alter à longè currens saltat, sedensque desuper, & ferrum cuspidatum,

hic



ad pag. 99.




hic appictum, per cuspidem tenens, in circulum projicit, alio id ei semper iterum porrigente. Quot vicibus tangit projiciendo centrum circuli, tot vicibus errare ei licet: si verò erret vice unicâ ultra quàm tetigit, tunc lusum perdit: alterumque dorso suo insidentem, tamdiu vicissim sustinere debet, quàm diu & ipse hoc pacto erret: sicque procedentes quandoque horas aliquot impendunt. In hoc lusu aliqui eorum quotidiano exercitio tam dextri evadunt, ut vigesies & ultra, ad stuporem adstantium, nauseam vero misceruli sustentantis, centrum circuli tetigerint.

Primores foliis chartæ lusoriæ Gallicis ludunt; mercatores Sohach, Puellæ & juvenulæ mulieres, ubi commodum sive in platea, sive area habent spacium, ponunt truncum egregiæ magnitudinis, supra quem in æquilibrio locant asserem, in cujus extremitatibus stantes altera alteram agit, atque alternatim in altum elevat, quandoque (dum exercitatae conveniunt) tam audacter, ut una alteram ad magnam distantiam in aëra supra asserem ejiciat. Hac agitatione horas etiam insumunt.

Discursus eorum non est de exterarum nationum statu, politica, aut alia quaque honesta re, vel jucunda, cum laudabilium scientiarum sint prorsus ignari. Historiæ & memorabilium à prædecessoribus gestorum imperiti, obvia loquuntur, maximè verò quæ lasciviam, & impudentiam sonant. Saltus per impudicas corporis gesticulationes & motus peragunt; hinc nec mirum, varia obscena, & scelerata prodire.

In rixarum occasiõibus pessima usurpant scommata, uti Blendin Syn: Stulti filius. Sufin Syn: Canissæ filius: Sobasfa / canissa, binaque præterea ex inhonestissimis proverbialia, quibus parentes proles suas, & hæ vicissim parentes afficiunt, ad quas abominabiles voces, ingens nobis scandalum, quandoque ad ipsam indignationem, causavêre.




Puerorum etiam recreatio est cum canibus, quos, alias inter artes, etiam vehere docent, uti mihi obambulantem non semel videre contigit, canem mediocris magnitudinis, junctum curriculo parvo, ac apparatu ad instar equi egregio, absque tamen freno vestitum, curriculo illo tres insidentes pueros vehere magno sat conatu, nam tanto onere pressus, linguam ore protrudere ac sæpè sæpius terram capite offendere videbatur: nihilominus à pueris flagello, clamoribus nimis, terminum assequi coactus erat. Vicibus quoque pluribus observavi hujus sortis canes aquas, pueris impellentibus, domum devehere, quod in Tartaria nimium invaluisse affirmabant Mosci.

Ridiculum & hoc: quod si obvius quispian fiat Poppo (munus Parochorum hi obeunt) qui per altam duarum pene spithamarum mitram dignoscitur; ab eoque, etsi Poppus Uxorem præsentem habeat, roget benedictionem, & peccatorum absolutionem, statim uterque, abscedente Poppi Uxore ad partem, nudato capite, ac inclinatione corporis se se salutent; tunc propius accedens Poppus, pœnitentem ore afflat, ac super illo aliquid murmurans, magnâ eum cruce signat, quo peracto, inclinantes versus se æqualiter capita, atque iteratò sese cruce signantes, mitris repositis discedunt. Jam autem quandoque contigit, ut uterque bene potus, vix firmiter stare potis fuerit; ubi ad illam inclinationem ventum erat, ambo tam mirabili, ridiculâ ac extemporaneâ titubatione, eam peregerant, ut hircos duos sese verticibus impetere (barbigeri enim quoque sunt) diceret. Cum verò Poppus suâ cum Uxore procedit, totam testam manuducit, nam nullam aliam ducere amplius sub perditione Poppiatûs institutum eum fit, ideo ad nutum Uxoris, tanquam primi mobilis, omnis Poppi Genius se accommodat.

Formationem Crucis adverti contrariam nostrâ, siquidem à fronte deorsum, postmodum à brachio dextro ad sinistram, manum ducunt; quid causæ esset hujus à nostrâ diversitatis, aliam mihi imaginari haud potui, quam quòd illi in plerisque ceremoniis ab Ecclesia Catholica datâ operâ dissidentes, ut signo digno-

sceren-



scerentur manifesto, hanc crucis formam ad contestandam religionis suæ ab aliis, maximè verò à Catholica, quàm innato, & plusquàm Vatiniano prosequuntur odio, differentiam constituerint. Mihi verò semper hæc crucis formatio in animo hærebat, donec tandem occasione datâ Poppum fores aulæ nostræ transeuntem conspiciens, accessi, crucisque signum ab eo petivi, quam eum more suo mihi impertivisset, eum cur non talem, qualem ego (quam statim feci) formet? interrogavi. Hic moto paulisper capite respondit nihil; iterum ego plumbaginem ei, ut crucem in charta formaret? dedi; ille crucem non à dextris ad sinistram, sed à sinistris ad dextram duxit; cui ego, cur crucem in charta aliter, nempe à sinistris ad dextram, quàm in se, nempe à dextris ad sinistram, formaret; reposui, qui cum adhuc quidquam respondere non valeret, moto capite admirabundus, & perplexus abitum paravit. Verum ego per manicam, ut explicationem expectaret, detinui, & in medio harum duarum contrariarum crucum, tertiam formans majorem, taliter ei rem exposui.

Crux formata à sinistris.

Crux Christi.

Crux formata à dextris



Ecce in hac media Cruce nonnè Christus Dominus Redemptor noster pependit? In Cruce à dextris, cur Latro adductus ad pœnitentiam, non item ille à sinistris? Nempe quia Crux illa conformis Cruci Christi, à sinistris versus dextram ducta, ducebat ad Christum Crucifixum, & ideo Diabolus hanc Crucem aggredi ad seducendum non potuit, poterat autem accedere alteram, quia illa, si ducatur conformiter Cruci Christi à sinistris ad dextram, tunc abit, & abducit à Christo, si verò ducatur versus Christum

N. 3

Do-

Dominum, à dextris ad sinistram, tunc est difformis, & Contraria Cruci Christi, quæ (etiam te formante) non à dextris ad sinistram, sed à sinistra ad dextram formatur. Cum ergo Vos tali Cruce, Cruci Christi Contrariâ utimini, nullatenus ejus Virtute Dæmonem abigitis, verum in malitia cum Latrone illo malo jam sepulti, eidem ad vos in iniquitate firmandos ansam porrigitis. Ad discursum hunc attonitus Poppus, meque oculo constanti intuens, cum argumentum hoc nequaquam retorquere potuisset, Ruthene respondit: *Виднаго Нѣтъ*: id est: absurdus iste sermo; & ita abiit: quem per plateam integram caput movere, secumque discurrere observavi. Quid factum! hæc jucunda utrinque & pia confabulatio, quis diceret? miras egit in corde Poppi radices, ad eò, ut nullo modo extricare se, licet aliarum complurium operâ usus, potuerit, quin imò inani succumbentes labori, rem ad ipsum Patriarcham suum detulere, qui imminens alicujus rebellionis, si res plebi innotesceret, periculum augurans, ne de Autoritate sua periclitaretur, Poppum illum bene asservari, incarcerarique mandavit. Insuper de re Czarum commonefaciens, monuit, ur sitque, ut Legatos seriò de hac re moneret, alioquin si plebs insurgeret, illos ipsos causas sui proprii exitii fore. Venientibus igitur ad Sessionem Legatis, rigorosa habita de re hac fuit conferentia; quibus se de casu proposito, nullam prorsus habere notitiam asserentibus dictum fuit: fuisse casus hujus Germanum quendam, Authorem, simulque demandatum, ne ulterior fieret hujus mentio. Consternati illi domum regressi, immediatè convocatis omnibus, etiam alterius Legati Aulae Germanis (mei tamen nec meminerant, minimè namque sibi persuadere poterant, me tam multum Ruthenè discurrere posse) rem proposuere, examinareque ceperunt; verum nemine horum conscio, tandem fors me manifestavit, qui nolens volens, coram plurimis conaulicis discursum hunc plenariè exponere debui; quod demirati tum Princeps, tum Palatinus Legati, ne amplius, de discursu hoc mentionem facerem, inhibuere. Poppus autem ille, nec citius liber-

tati

tati restitutus, sed tam diu in carcere detentus, quam diu Legatio inibi morabatur,

Balnea vidi Moscæ bina, unum præcipuum ad fluvium Moscua, alterum ad fluvium Neglinam in Bialgorod: & sicut nulli honestè, ita nec hîc, imò scelestius se gerunt. Hoc aliqui nostrum curiositatis gratiâ lustrare proposuimus, atque more nostro Patrio velati, similem prout interris nostris, balneandi rationem autumantes, adivimus; ast sub ingressum statim notavimus diversitatem, dum portam apertam, fenestris non occlusis vidimus, tametsi balneum nihilominus valdè calidum erat. Ubi vero nos Mosci velatos, ipsi enim absque omni verecundia nudissimi erant, conspexere, ingenti risu & cachinnis exceperunt. Nulli hîc Ministri, nullus Balneator, aut tonsor, sed qui aquam habere voluit, ipse pro ea ad fluvium descendere cogebatur. Itaque inibi aliquandiu commorantes sicci, ut venimus, abivimus, postquam eorum in balneando mores vidimus, qui loco fricationis, virgultis ipsimet sese flagellare, clamare, aquâ frigidâ perfundere, insuper gesticationes corporis, coram prolibus scandalosas moliri ceperant, atque hæc averlati, multo cum risu exivimus. Eundem balneandi modum habere feminas, & nudas quoque promiscuè circumcurritare spectavimus.

Venatio sola cum accipitribus, nîsis, & falconibus laudanda apud eos videtur, quâ profectò excellunt; sæpè enim magno cum gustu spectaveram, quomodo sylvestres anates, cane instructo è piscina expulsas, à spatiante in aère accipitre in terram deciduas, manibus levaverint. Lepores quoque & alias feras, quibus Moscovia abundat, harum operâ avium jucundè venantur.

Ferarum diversitatem hîc multam & magnam dari, non tantum Historia probat, sed ipsa Regionis vastitas evincit; nam & ego varia, & terris nostris profectò animalia ignota meis conspexi oculis; quæ hic paucis attingam.

Primarium tum æstimationis, tam pretii locum obtinent sobolinæ pelles, quarum Nobilitas toti mundo patet; hæc animalcula ducentis post Moscoviam circiter miliaribus in densissimis syl-

vis

vis capiuntur; & quod frigidior hyems, eò nigrioribus & densioribus longioribusq; adeoq; maximi pretii pilis nitent. Harum aliquarum pretium in ipsa Moscua ad centum Rublos (aureus inibi vocatur) se extendit, minimarum pretium est unus aureus. Homines, qui pro capiendis adhibentur sunt Captivi, Sclavi, & Tartari, frigori assuetissimi, & miseri, in quibus sanè nobis impossibile esset perdurare. Hi animalcula hæc sagittis dexterrimè prosternunt, in æstate verò viva Czaro transmittunt, qui munus locò in delegationibus suis, pro speciali dono, exteris Principibus offerre assuevit. De hominibus his narrant Mosci, quòd in hieme acclinati ad arborem, ità sopiantur à frigore, ut mortuorum instar permaneant, quando tamen ex eorum narium spiraculo, eiectionis mucus stiriam efformet congelatam tam longam, ut usq; ad terram pertingat: æstate verò redeunte, seu ipso statim vere, resurgant quasi à mortuis, & ad sua munia revertantur.

Copiosas quoq; advehunt pelles agninas, ex Astrachan (est Provincia Persis confinis) illasq; vel nigerrimas, vel fuscas permixta albedine & nigredine. Hæ pelles totæ crispæ, ibidem quoq; magno in pretio habentur. Cæteræ, uti Caninæ cum longispilis, cinerei coloris; vulpinæ, Ursinæ, leporinæ, universim albæ per totam Moscoviam copiosè adinveniuntur. Sunt & inibi glires aquei, majores nostris, quorum pelles odore peramœno adinstar ambræ, hominem eas corpori applicantem, & calefacientem, mirà circumfundunt odoris amœnitate. Cauda eorundem pollicis crassitiem adæquat, & quandoq; superat dura & lepidè figurata. Copiosissimas tamen inter omnes habent Herminilium pelles, item Gronostaje animalcula parva, quorum pelliculæ tenues, albisimæ. Catti Sylvestres, & per plura alia animalia copiosa, specie diversa & ignota ibidem reperiuntur. Hac quoq; ratione ob copiam pellium, ad tantam pelliones venè perfectionem, ut easdem pelles nitidissimè elaborare, in partes discindere, & quasvis minutissimas particulas artificiosè adaptare sciant, quod experienciâ edoctus, oculatum me sisto

testem

testem dum ex sobolinarum caudarum minimis finibus, elegantissimas manicas, magnatibus, sex, aut etiam octo aureorum pretio consarcinant: taceo alias pelles, quæ illis ingens lucrum, maximè ab exteris nationibus conferunt.

Contigit binis vicibus, ut haberem mihi obvium in platea Czarum; cum recreationis causâ extra Urbem pergeret; itaque substiti videndi gratiâ illius processum, qui hic erat: Primò præcedebant duo cursores, obvios quosq; homines ex via, & in domos, ne quis Czaro obviaret depellentes; si verò nullus abscondendi locus, uti extra Urbem, fuit, tunc homo ille, quicumque, in faciem prostratus tam diu humi, donec Czar pertransiret, jacere debuit; accedentes ergo me hi Cursores interrogarunt *fasty ty Eglowief: Posolsky?* Simne unus ex ministris Legatorum? reposui: *Taf gestit?* Sic est; ad quod moventes Capita reposuerunt; *Dobroster/ Zustay* id est: bene, bene, maneat: & ulterius cursum prosequabantur. Paulò post secutus est Czari processus, & primò quidem ducti fuere Parippi octodecim pretiosissimè ephippiati; hos secuti sunt plurimi ministrorum, omnes detecto capite: tandem ipse Czar pulcherrimo insidens equo, inauratum sceptrum in manu, ac super mitram sobolinâ pelle suffultam, auream corollam omnibus partibus tremulam, adamantibusq; interstinctam gerens, processit: cui cum debitam reverentiam fecissem, motò paulisper capite, & sceptro, subridens signum gratiæ reposuit. Postmodum impedimenta culinæ, & alia necessaria longo ordine sequebantur; atque hic fuit Czari privatus processus, qui Majestatem suam non, in comitatu Hatschiriorum, ut alii Monarchæ, sed ut plurimum in apparatus & ornamentis vestium, equorumq; commonstrat.

Mirabile, quod nil virtuosi, aut morigeri, quodq; veræ pietatis alicujus speciem præferret, per spatium quindecim Hebdomadarum animadvertere in Moscis potuerim. Itaq; dicere cogor, esse plerumq; subdolos, luxuriosos, fraudulentos, deceptores, infideles, contentiosos, latrones & homicidas: ita ut si hominem spe lucri, aut pecuniæ acquirendæ occidant, & unicam candelam pro anima ejus intemplo accensam offerant,

O

jam

jam absoluti & pœnæ immunes habeantur. Immunitas talis barbarie munita, non nisi à Tartaria inculta censenda est provenire confines siquidem etiam Tartaris, duo quoq; illis erepta Cassan, & Astrachan regna possident.

CAPUT XX.

Reditus ex Mosco via uq; Smolensko.

CUM festum Sancti Bartholomæi die 24. Aug. annuâ devotione celebrandum illuxisset, debitam quoq; nos erga Sanctum Apostolum solennitatem præmittere cupientes, ut ita discessus prolongaretur, cum sub tentorio in medio areæ expanso, solenni cum musica Missæ sacrificio celebravimus: quo finito, concio quoq; Polonica habita est. Lentè parabatur discessus; sperabamus enim imparatis nobis subsequenter diem proitineri esse concedendam: quod sperare etiam fecit tempus pluvio Cœlo turbidum, itineriq; ineptum. Prandium quoq; à Legatis splendidum institutum est, ob cuius respectum nulla timebatur turbatio. Verum insperatò Adstites, ut præmitterentur curriculi nostri, & ordo ad proficiscendum fieret, se cum suo comitatu paratos, & intra horam adventuros nuntiarunt. Ad quod attoniti Legati, se neq; esse paratos, neq; præconcepisse tantum in executione rigorem reponebant, adeoq; hanc saltem pernoctationem sibi favori petebant. Sed exacerbati Adstites, inculcabant se gravissimè læsuros Czarum, si non quam primùm discesserint. Quancumque igitur res componere iussi sumus, quod ut citiùs perageretur, aliquot Strzeletz id est Sclopetarii ad jungendos equos, res deportandas, & in currus projiciendas submissi sunt. Facilis conjectura est, quàm ordinata fuerit, hæc tam properata Congeries, ut certè impossibile creditu alicui fuisset, intra tam breve tempusculum, tantum effici posse. Duas tamen insumpsimus horas, tandemq; horâ quintâ vespertinâ, cadente insuper pluviâ, ordine facto, præmissis Podvodarum curriculis, curribus minoribus, curribusq; oneratis, cum sex equis, Legati cum Adstite delegato, in Rheda Czari, (usq; ad primam pernoctationem) comitante parva Moscorum manu, valedicentes omnibus, præter spem Urbe egressi sumus.

Non

Non illa viâ, qua Urbem ingressi sumus, nos eduxerant, sed ex Kitaigorod per Bialgorod & per Zemlenigorod penes ejusdem moenia sinistrorsum perreximus, ubi à magna incolarum turba, apprecante nobis felix iter, Rutheno idiomate (Prosti Bug) secundet Deus, spectabamur. Via ob pluviâ lutulenta & trabibus strata, & pontium per lacunas frequentia properè pergere prohibuerat. Unde Haidones & Milites occasionem nacti sunt, suos adhuc notos invifendi. Hi imminentem timentes noctem, cremato tamen adhuc benè poti, brevi currus assecuti sunt. Post medium circiter milliare adhuc intra Urbem planities viam fecit expeditiorem, quâ superatâ, venimus ad montem molas ventosâ plurimas exhibentem. Ventum tandem est ad præurbium longum Drgomilovska Sloboda nuncupatum, ibiq; nobis pernoctatio assignata fuit. Eo usque duas ultra horas perreximus, & præurbiorum finis necdum erat. Unde verum apparet circumferentiam Urbis Moscuæ ad quinque milliaria extendi; quod etiam quidam in kukui Urbe à Germanis inhabitata. Mathesios egregiè peritus Germanus præsentem me asseveranter confirmabat, prout etiam ipsius Urbis termini ex aulæ nostræ turri, cujus ad centum quinquaginta facile gradus altitudo erat, nullatenus circumquaq; conspici potuerant.

Mirum nobis universim accidit, Moscos tam inhumaniter in abitu cum Legatis, quorum tamen egregia erat autoritas, egisse, cum potius præteritos Urbanitatis defectus, colore humanitatis aliquo sub finem obumbrare debuissent. Sed quid tandem, si principio & medio etiam finis consentiat, per hoc immergeri animi specimen, quo Legatos Urbe quodammodo violente ejicerunt. Prima itaq; pernoctatio 24. Aug. miseriam & molestiam inchoavit.

Sequenti illucescente aurorâ, primò componendæ erant cumulatim antè in currus res injectæ, quibus cum Haidones horas aliquot insumpserant, iter acceleravimus. Ast vix tria confecimus milliaria, & jam illam lutosam & detestabilem pontium plenam viam ingredi coacti sumus, quos summo cum periculo

O 2

supera-

superavimus. Conspiciebantur propè Moscuam villæ, atq; arces lignæ paucis, cum agris; plures terræ mollities non patitur; unde arbuta, sylvæq; maximæ progengerantur. In Itineris principio parvos, sed sibi propinquos obtinuimus pontes octo; tum in Civitate Zdimczowa nomine, quæ tamen vix pagum adæquat, pransi sumus; ubi forum gramine vestitum, casæ, æqualis formæ, & magnitudinis, quadratum efformant. Sumpto brevi prandio, perreximus tribus milliaribus, per viginti quinque pontes majores, & attigimus tempestivè.

Viazoma Monasterium Schismaticum, ubi quidam Polonus à Moscis quondam abductus, viginti que plus minus annis in Moscovia servire coactus, feliciter aulam nostram insequens nos deprehendit, qui à Principe occultatus unà nobiscum, in Poloniam advenit. Ostenderunt hîc nobis curiositatis gratiâ Camelum, grande animal, monstrosæ planè formæ. Sequenti manè die 26. Aug. superavimus quatuor millia, & quadraginta quinque pontes, quorum aliqui quinque, etiam sex stadiorum erant, ac in Kubinsko, quod oppidum esse volunt, prandium absolvimus. Redibamus quidem jam tunc eadem, quâ veneramus viâ, verum quia properavimus in Patriam, alia nos attingere hospitia contigit. Hinc peracto raptim prandio, densissimas transgressi sylvas, per triginta pontes, quinque millia confecimus, ubi subdialem in prato habere pernoctationem debuimus. Hac nocte transacta rore bene madidi ulteriori nos viâ per sylvas commisimus, atque quindecim pontibus, & tribus milliaribus superatis, Mosaisco nobis Civitas & prandium, & quietem præbuit 27. Aug. Timuisse sæpius Legatos memini, ne, si adhuc in Urbe Senatores Mosci in aliquo vacillarent, inviti Moscuam revocarentur, adeoque festinandum statuerunt.

Subsequenti aurorâ hîc adhuc, quia dies Dominicus incidit, Missâ auditâ iterum viam aggressi, tribus per sylvas milliaribus absolutis, per quinquaginta septem pontes, viâ pessimâ luto, aquis, & paludibus interstinctâ, venimus ad Gelnam Villam, in Monte sitam. Hinc confectis quatuor milliaribus, per quadraginta pontes,

tes, iterum in spatioso prato sub cælo, & inter sylvas noctem trans-egimus, Oriente die per ardua sylvarum triginta sex pontibus, & quinque milliaribus absolutis, in prato pransi sumus. Hac in viâ assecutus nos fuit nuntius Moscuâ Urbe missus, qui in proximo oppido insequentes duos Bojar, è Legatis expectandos esse nuntiavit. Anxii quid sibi hæc insecutio vellet, hæsimus. Superatis demum quatuor milliaribus & octodecim pontibus, Civitatem Czarske Zamoisce; ubi expectandus erat illorum Bojar adventus, attigimus. Ad occasum solis advenerunt, venerabilis Moscus Knias, seu Princeps patrio nomine dictus, & unus Dziak, quasi Secretarius, qui multo comitatu decorè vestito, stipati Legatos accesserunt, & præmissis Czari magna cum veneratione, & reverentia titulo, se data operâ à Czaro missos ad Legatos de Victoria ante Czechrin de Turcis obtenta certiores reddendos, insinuarunt; significantes præterea captivum adductum fuisse Baslam cum plurimis Turcis; ac tentoria ultra trecenta cum reliqua stipellectile, & multâ pecuniâ, cæterisque campestribus prædis allata. Itaque ut Legati Czaro congratularentur, & sibi rem gratam commonstrarent, invitarunt, pro sequenti die Ablegatos ad nos Moscos ad Te DEUM laudamus, celebrandum. Erectum ergo est pro pompæ augmento tentorium in medio aræ, sub quo Sacrum magnum cum tubis, & tympanis habitum; post hoc Te DEUM Laudamus, cum trina scloporum explosione celebratum est.

Magnus hic Moscorum concursus, nostrum celebrandi modum spectantium erat, qui nostrum suo quoque excipiebant gaudio: nec minus hic solennitatis actus missis illis Bojaris placuit, invitatis etiam à Principe ad prandium, quod inter chordarum, tubarum, tympanorumque applausum egregiè absolverunt, videntesque sibi largiter propinari, à Legatis vinum Ungaricum, vicissim ipsi ex popina, illis Kabak dicta, tum crematum, tum mulsum, in copia adferri jusserunt. Delibatis itaque palato gratissimis, quales ab illis nunquam visi, multò minus gustari, cibis, quibus avidè se se infarcire spectavi, cerebroque calefacto nugas

varias, & nequitas Mosci prodere inceperunt; Unde sapienter Æschines dicere solebat: speculum formæ esse æs, Vinum autem animi; & passim in proverbium abiit; In vino veritas; ad quod argutè ludens Owenus canit:

Si latet in vino verum, ut proverbia dicunt,
inveniet verum Teuto (Mosca potius) vel inveniet.

Bonâ igitur hac occasione usi Legati, sibi multum proficua ex illis expiscati sunt, ob quod multæ insumptæ sunt horæ Palatinus Polocensis alter Legatus suum eis etiam demonstrare cupiens affectum, invitavit omnes unâ cum Principe ad suum hospitium; cui annuentes Mosci, per plateas, comitante musicâ, titubantes egregiè acclamante insuper populo cum adiverunt.

Princeps attamen properans in Patriam, veniâ acceptâ circa horam quartam ulteriori se commisit viæ, qua adhuc die confectis tribus milliaribus & sedecim pontibus, per sylvas incommodas inter easdem & pernoctavimus 30. Aug. Manè continuantes sylvarum asperitates per quinquaginta quinque pontes, emensis quatuor milliaribus, ac in Viasmo Urbe, in eo hospitio, ubi tam bestialiter infantem lactari commemoravi, prandio refecti, viæ ulteriori nos accinximus, quamvis ob currum reparationem non parum detenti; tamen inibi pernoctare nolens Princeps, ob imminentem adhuc tempestatem uno milliari confecto in prato vasto noctem tempestate nihilominus crebriori fulgure, tonitruoque horridam, non sinè timore, corporisque afflictione transigimus 31. Aug. omnes madore pleni, à quo nec quidem ipse Princeps quanquam sub tentorio, fuit immunis, quare ob tantam itineris defatigationem afflicti tectum optabamus.

Neque tamen nostram adeò curabamus, quàm equorum defatigationem, eò quòd adventante Phosphoro per pontem, qui tunc obtingebat, ad sesqui milliare se extendentem, transeundum fuerit; unde tum currus, tum equi concussi, atque defatigati sunt, præterquam quod alios 14. per quatuor milliaria, pontes minores superaverimus, atque adeò cætera pars diei, quieti in Zemlowo, oppido novo, ubi & pransum, & pernoctatum, necessario impen-

impensa est 1. Septemb. Inde viginti quinque pontes, per quatuor milliaria transgressi, Czobotowo pagum attigimus. Hic nos prandentes affectus est Palatinus alter Legatus cum sua aula, qui diutius se cum Moscis in Czarskie Zamoscie detinuit. Perreximus ergo 2. Septemb. unitis iterum viribus per solitudines, & deserta viarum horrida, & confectis tribus milliaribus transivimus Bolczin Monasterium. Inde via lutosâ per quadraginta quinque pontes, causâ erat pernoctationis in prato, sylvis undequaque circumdato. Hic nactus occasionem Dominus Zbroszek, instituit examen de perditis in Moscuâ mille florenis, atque ne timorem inopinatè furi incuteret; iussit illum currum in quo Mechanicorum res vehebantur, ut fabri, braxatoris; fartoris, pistoris, carpentarii & aliorum, in medium nostri devehere, illumque per duos Haydones lustrari. Accepta ergo est primò ad examinandum cista carpentarii; quam referari coram se iussit. Hic carpentarius perterritus, mutato genarum rubore, & ad opus attonitus, timens ne furtum patefieret, clavum diu invenire noluit: ast perfractum iri cistam advertens, tandem potius clavi aperuit: quæ cum perlustrata fuisset, inter cæteras suspitioni etiam obnoxias res in Urbe coemptas, inventæ sunt multæ partes telarum in nodos intortarum, quarum gravitas suspecta erat. Solutis itaque his intricatissimè colligatis nodis, inventi sunt in illis aliquot supra viginti Imperiales; item aureorum, quos pro Kopicis in Urbe permutaverat, haud exiguus numerus; Kopicarum verò valde parum supererat. Acceptis itaque his nodis exhilaratus Zbroszek Principem adivit, carpentarii que naturâ aliàs simplicis furtum patefecit; non parva nostra cum admiratione tam dolosam hominis astutiam, externâ simplicitatis veste obumbrari potuisse. Hic ergo statim arreptus, catenisque magnis, quas pro currum necessitate unâ veximus; circa collum, manus, & pedes vinctus, ac ubi reliqua pecunia insumpta esset examinatus, tremens, aliqua rara se in Urbe coemisse, partem aliquam braxatori, & aurigæ suis consodalibus dedisse, fastus est. Raptus itaque etiam braxator, captivatusque est, auriga verò advertens, facinus in se devolui, inter

syk-

ſylvas confugit, ſeſeque abſcondit; cujus tamen ciſta apertâ floreni aliquot reperti ſunt. Connumerata itaque pecunia, quæ ſupererat, ſummam ſexcentorum florenorum protulit: reſiduum ab illis jam conſumptum erat. Inſtitutum demum à Principe, quid cum fure agendum eſſet, cum primoribus ſuis conſilium fuit, & unanimiter ſtaturum eſt, cum in proximo oppido ſuspendendum. Interea tamen ab Haydonibus ſuſtibus cæſus eſt, qui ad centum primos iſtus vociferabatur. Quia verò continuus iſtum ſubſequebatur tonus, non amplius ob demortuæ carnis inſenſibilitatem clamavit, ſed immotus nullo vitæ ſigno dato jacuit. Autumabam ego trecentis continuatis iſtibus, animam pulſam fuiſſe; aſt ſubito ſe erexit, ubi advertit ſe inverti ad ventrem etiam cædendum, precesque cum ejulatione fudit. Braxator itidem, ſed paucioribus exceptus eſt plagis. Commune hoc Polonorum eſt præmium, quo facinora quæque plectunt.

Hæc tragediâ peractâ, properavimus per tria milliaria, & quadraginta quinque pontes ad Civitatem, cui nomen Dorohobusz, ubi etiam præſti ſumus. Hic ſupplicio affectus fuiſſet Carpentarius, ſed pro fortuna ejus, nullus carnifex reperiebatur, aliquot etiam ex aulicis pro eo, tanquam qui condignas jam facinori plagas recepiſſet, ſupplicârunt. Maxima autem gratiæ anſa fuit, quod ad axem, qui apud Rhedam fractus eſt, dum nullus alius eum reparare poſſet, reparandum, ille catenis ſolvi debuerit, ſicque tot precibus libertati redditus eſt.

Abſumpto hîc prædio, compulſi ſumus per pontem pergere tunc necdum perfectum ſuper Borithene fluvio innatantem, quem currus tam graves magno cum periculo ita deprimebant, tranſeuntes, ut ad medium uſque aquæ immergerentur. Ne verò currus aliquis inverteretur, eum Haidones pedites tenere debuerunt: ut ſic tamen omnes feliciter tranſiverimus, reliquo adhuc diei curſu, per tria milliaria tredecim pontibus ſuperatis, atque in Vognovszcinz na pernoctavimus 3. Septemb. Inde redeunte aurora iter noſtrum proſequentes, tria confecimus milliaria, ſuperatisque viginti quinque pontibus, occurrit nobis Wulffova Sloboda. Villa hæc


hæc nomen ſortita eſt à quodam Nobili Polono Wolffnuncupato, qui eam ad ſe ſuſtentandum ædificavit; bello autem Moſcovitico eo depulſo, Moſcis in poſſeſſionem abiit, quam Wulffowa Sloboda, quaſi *Swoboda* id eſt ad habitandum liber locus nuncupant. Hic prædio ſumpto ulteriorem aggreſſis viam, ob meliorem terræ ſitum, numerus pontium minuebatur, & per tria milliaria non niſi octo pontes tranſivimus.

Viam pluvia moleſtam reddidit, montesque & valles retardabant tranſitum, ita ut novemdecim tranſeundo pontes per quatuor milliaria in Volczinie pranderimus: quo abſoluto, comitante nos pluvîa, per frequentes aſcenſus & deſcenſus montium (unde currus bis inverſi) duobus milliariis & octo pontibus abominabilem Moſcoviticam viam finivimus in Smolensko Civitate, & Clavi Moſeuz, quæ & quietem dedit 5. Septembris. Pontium ergo ſumma, quos à principio itineris e Moſcua Urbe huc uſque pertranſire contigit, quingenti triginta tres.

CAPUT XXI.

Reditus ex Smolensko per Lithuaniam.

IN Smolensko ab Adſtite detenti per prædium diei ſequentis fuimus, ob cauſam novi comitatûs procurandi uſque ad confinia Lithuanîæ. Itaque Princeps Legatus valedicenti antiquo Adſtiti, frameam pulcherrimam (*Ordinka* Polonis dicitur) in remunerationem laboris nobiſcum perviam habiti donavit. Peracto prædio Lithuaniam verſus tetendimus, atque ad proſciſcendum celeriùs comitatus novus cum Adſtite ex Civitate Smolensko ordinatus, aliâ nos viâ duxit. Tranſivimus pontem ligneum ſuper fluvio Borithene benè firmatum, penes ipſa Urbis mœnia, per montem ſat altum. Hic illud memorabile, quòd dum Sigismundus Rex Poloniæ Civitatem hanc oppugnâſſet, primarium mœniorum cornu pulvere ſuppoſito in auras diſjecerit, atque ita Urbem in ſuam redegerit poteſtatem; Civitate iterum Polonis erectâ,




ptâ, illa pars mœniorum à Moscâ, reâdificari se non patiatur, ipsismet fatentibus Moscâ, quod uno anno ædificatum erat, sequenti iterum corruisse, atque adeò id experti, vallem solummodo profundam efformârunt, quam vigiles numerosi tuentur.

Præmoniti sumus attendere diligenter rebus nostris ob vaga passim rusticorum latrocinia ab antiquis temporibus fieri hîc solita redeuntibus Legatis. Residuo Solis cursu tribus peractis miliaribus, Lubnia pagus pernoctationem favit 6. Septembris. Tribus Lubniâ superatis miliaribus, Czernova pagus, prandio nos refecit; & tribus iterum miliaribus excepit quiete Civitas Krasna 7. Septembris. Sequens 8. Septembris Festum Beatissimæ Virginis Nascantis, etiam Matri DEI solenni cum Sacro, precibusq; gratias actoriis, cum toto antemeridiano tempore consecratus est, ubi etiam prandium sumpsimus. Asper jam erat September, & Borealibus subjectus auris, furnorum operâ attemperandus. Reliquo hujus diei tempore quatuor perfecimus miliaria sat infortunatè, cum currus rebus optimis oneratus, non sinè damno inversus sit. Ab alio quoque curru equi ex ponte deciderunt, qui diu in aquam dependuli, quia firmis juncti erant funibus, se se multum, & miserabiliter agitantes, difficultate maxima ex hoc periculo, sinè omni tamen nocumento, liberati fuere; In Bojova pago pernoctationem nacti sumus 8. Septembris. Hîc in limite Lithuanix valedicente nobis Adstite, cum suo comitatu, ac Smolenskum versus iter resumente, Lithuaniam magno cum solatio, DEI optimi maximi gratiâ attigimus.

Inde digressi tribus miliaribus, Czehrîn pagum attigimus, ubi sumpto prandio, & iterum confectis 3. miliaribus Dombrovkam Civitatem primam Lithuanix advenimus, quæ, quia ad Excellentissimum Palatinum Polocensem Collegam Principis Legati spectabat, etiam favore Excellentissimi Possessoris, non tam nobis, quàm defatigatis jumentis, refocillationem largita est 9. 10. & quia Dominicus dies intervenit, etiam Undecimâ Septembris.

Die Lunæ, quæ erat 12. post prandium valedicentes Domino Pala-



Palatino, discessimus, & venimus tribus miliaribus indè in Orsa Civitatem, quam antè depopulationem Moscorum, pulchram & magnam fuisse rudera repræsentant. Hîc fluvium Boristhenem (illis Nieper) tertiâ vicè trajicere contigit. Inde properè discedentes quietem noctis in Baran pago duobus miliaribus absolutis transegimus 12. Septembris.

Manè sequenti Kochano pago, & tribus miliaribus emensis pransi sumus in Tolacz. Indè confectis tribus miliaribus, pernoctavimus 13. Septembris in Slovinie pago. Tandem advenimus in Civitatem Bobr, & tribus post miliaribus ingressi sumus eandem, quam antea in Moscuam proficiscentes tenueramus viam pagos eisdem, & Urbes per viginti quinque miliaria transcuntes, pervenimus 18. Septembris usque Minsk. Unde aliam iterum semitam aggressi sumus ad dextram. Ubi ad Dolskovic pagum pervenimus. Quatuor inde miliaribus in Viaczion popina noctem 19. Septembris transegimus. Iterum Koidanoro Civitatem transgressi ad Rudicza pagum venimus, ubi popinis Judæi hospites præerant. Prandimus hîc; quatuor inde miliaribus in pago Jaczna pernoctavimus 20. Septembris. Hinc uno, & medio milliari tranavimus per Niemem fluvium, & tribus post miliaribus advenimus Mir Civitatem Principis Radzivil, quæ à magna Hebræorum copia inhabitatur. Hîc absoluto prandio missi sunt à Principe aliquot Aulici in Civitates Volhinix, Luciolum, Leopolim, & Klevanum, erantque Reverendus Capellanus, Dominus Holub, Dominus Chriniczki, Dominus Savicz, Dominus Menczinski, & Dominus Portanti, qui valedicentes omnibus nobis, iter suum cum famulis aggressi sunt; nos verò Lublinum versus, & transeuntes Schuchovice, Seremavice, Polomka mala, pagos, post duo miliaria quievimus 21. Septembris: Inde per Stoloviczam Urbem ligneam, quales communiter per Lithuaniam, & Poloniam exstruuntur, apud Judæum Staramos, Popinæ hospitem, quatuor confectis miliaribus prandium sumpsimus; atque 22. Septembris in Polomko Civitate, duobus à popina miliaribus, noctem transegimus. Relucente Phosphoro, viæ qua-

tuor milliariorum Slonim usque Civitatem commodam Illustrissimi Sappia Thesaurarii magni Ducatus Lithuaniae Fratris Excellentissimi Legati nos commisit; à quo perhumaniter excepti noctem etiam transigere 23. Septembris debuimus. Hic data est occasio maximè Haydonibus (quibus custodia rerum committebatur) sese inebriandi; unde aliis alia occasio, nempe furandi subsecuta est, atque de nocte ex curru, Sartori nempe cista, aliis sacci cum rebus ablati sunt: qua de causa, ut Princeps aliquatiter saltè privatis satisfaceret, tria post milliaria in Chmelnica, duos Haydones illius currus Custodes, nomine Budzilo, & Olshainski, in arte potatoria excellentes, loco prandii, fustibus cædi iussit. Hinc perreximus per Zelcze, Prusiana, Ziebin, Holizarowstaw, & Briscz Liteuski, ubi pernoctatum 28. Septembris, & Festum Sancti Michaelis Archangeli celebratum est, qui quia Natalis Principis fuerat, fuerat quoque ab Aulicis, tum à R. R. P. P. Jesuitis Studiosa cum Juventute, aggratulationibus exceptus. His finitis, ulterius profecti sumus per Dobrinka pagum usque, Piszczacz Civitatem quatuor confectis milliariis, quæ quoque prandium nobis præbuit; Ad vesperum verò venimus in Lomas duobus milliariis, quæ Civitas Lithuaniae ultima est. Quia verò Poloniam attingere nimium ardebamus, & Civitas Rossosla jam intra Poloniam sita, medio tantum milliari distabat; ideo hanc hoc adhuc vespere, & Poloniam feliciter ingredi fuit constitutum.



CAP.

CAP. XXII.

Reditus per Poloniam in Boemiam.

Consecuti jam Poloniae terminos, multò magis exarsimus videre quamprimum amicos, & domesticos. Quapropter stimulari ad iter accelerandum per pagos. Romaskow, Wronice, Brzesloviczkan, Rudno Civitatem, Parcov Civitatem ligneis cinctam mœnibus (in qua quoque confectis quinque milliariis pransi sumus) venimus in Civitatem Ostrow 30. Septembris. Vesperis ad nos venit Principis Coniunx cum sua Aula gratulabunda, & amplectens magno cum gaudio Principem. Conaulici quoque simul amplexibus nos invicem excepimus, & ita unâ perreximus per Pelechovice pagum; Zaipsce, ubi trajetus per Vjeprz fluvium est; medio hinc milliari iterum per fluvii Bistrzicza pontem periculosum (quales plures ibi inveniuntur, sibi & nobis ruinam minantes) inde tribus milliariis in Zbiczim arce pransi sumus. Optimè meæ memoriæ hic impressi; quod cum incidisset dies Veneris, Poloniæque semper hoc die, cibus cum oleo lini mihi summè contrariis vescantur, per adventum Principissæ, quæ semper cibus cum butyro utebatur, ego ab illius refectioe reliquiarum optimè præparatarum (quod pridem mihi non evenit) solus & unicus particeps fuero. Post prandium ulterius progressi, per pagum Długa, attigimus Jakubovice Arcem 1. Octobris ac tandem finem optatum molestissimæ 202. milliariorum viæ imposuimus, maxima etiam nos excipientium domesticorum aggratulatione, & mutuâ salutatione. Domi ergo diebus aliquot ad refocillandum animum quievimus, donec cum Principe ad Regem Poloniæ perrecturi essemus. Attigimus 6. Octobris per Lublinum Civitatem, & pagos Abrahamovicæ, Krzínica, Chmelná, Konov quatuor milliariis & in Krztieniov pago pernoctavimus. Sequenti die per Vola Sobieczka (villam hereditariam Sobieczkiorum) post duo milliaria in Ziulkew pago, nunc favore Regis

P 3

sen-

ſenſim in Civitatem aſſurgente prandimus; dein tribus poſt milliaribus in Schebrzeszin pernoctavimus 7. Octobris, Civitate ſat magna, & honeſta, ſed plurimos incolas Judæos numerante. Hic acceſſit Principem & Principiſſam in teſtudine ludens Judæus cæcus, rogitans Eleemoſynam, à quo etiam inaudivimus Urbem hanc eſſe contagione infectam, adeoque citò indè diſcedentes, viâ trium milliariorum merâ arenâ albâ & profundâ uſque in Krasnibrud perreximus. Hæc olim Civitas, vix pagi ſpeciem fert. Poſt Civitatem in medio Sylvarum exſtructa ſtat Eccleſia latè celebris, ob miraculis claram Iconem Beatiffimæ Virginis DEI paræ apud quam à Malo obſeſſi ſpiritu, opem experiuntur.

Ex Krasnibrud poſt viam duorum milliarium, itidem arenofam in Tomaszov quieti nos dedimus 8. Octobris apud Judæum hoſpitem, cujus Virgo filia mihi ſecretò Germanicè locuta, aperuit ſe, dummodo de Matrimonio certa eſſet, velle divitias ſuas congregare, atque ob irrequietam à DEO vocationem, fidem aſſumere Catholicam; quod ei præſtare non potui. Denuo Eccleſiam imagine miraculoſâ Beatiffimæ Virginis claram tranſivimus, ac inde Laſztovka, Lubecz pagos, in Hrebiena Arce in monte ſita prænſi ſumus. Ulterius venimus ſex ſuperatis milliaribus, in Niemirov Civitatem; cujus incolæ meri Judæi, & Schismatici, hîc quietem adepti ſumus 9. Octobris. Indè duobus milliaribus Jazow ſtary, pagus diſſitus, Principi & Principiſſæ, ut Regem uno tantum milliarium diſtanti ſalutarent convenienter, ad ornandum ſeſe, totamque Aulam, occaſionem obtulit. Perreximus itaque hoc milliarium omnes, quam optimè compti uſque Javorow, quæ Civitas eſt Reſidentia Regia tota lignea, attamen pulchrè & nitidè fabricata conſpicitur. Hîc mox Legatus cum Coniuge ſua adivit Regiam Majeſtatem, Legationisque ſuæ Regi relationem depoſuit, qui miratus iter in reditu tam citò, nempe quinque hebdomadarum ſpatio peractum, Principem ob Legationem ritè expeditam, magno dignatus eſt honore, atque ad conſeſtandum magis favorem, Republicâ ipſa approbante, eum Capitaneum Viſſienſem declaravit.


Hinc

Hinc Regem & Reginam comitati ſumus, uſque ad Piſaczkovic, arcem itidem, & Reſidentiam Regiam, muratam 19. Octobris, ubi remanenti Regi Princeps valedicens Lublinum nobiſcum eſt reverſus.

Quia verò Princeps antequam in Moſcoviam perrexiffet, votum ad Beatiffimam Virginem Czeſtochoviæ fecerat, ideo ad perſolvendam obligationem, ſtatim dedit ſe itineri, quo pervenimus 2. Novembris. Ubi manè quilibet pro ſua devotione Imagini Beatiffimæ Virginis, à Sancto Luca pictæ debitum perſolvebat honorem; Princeps vero precibus gratiarum actoriſ pro felici reditu è Moſcovia redditis, Catenam inſuper auream centum aureorum obtulit.

Ibi commorati 2. & 3. Novembris. Quarta, quæ erat dies Veneris, poſt prandium patrociniò Beatiffimæ Virginis nos recommendantes, diſceſſimus, & per eandem viam viginti octo milliaribus, uſque Slupi, Undecima Novembris feliciter pervenimus.

Eſt Slupi arx pulchra, in monte auræ expoſita, quam ablucens Viſtula ſurviùs rapax, piſcationi piſcium magnorum Polonice Jeſſoter dictorum, occaſionem commodam præbet, & opportuniſſimâ piſcatione Principi 370. eorum præſentavit; quod certè mirabile fuit & inauditum. Ut proinde videatur Beatiffima Virgo piam munificentiam Principis illamque catenam auream, hâc beneficentiâ, cum quilibet piſcium minimum Imperialem unum valuerit, voluiſſe remunerari. Hinc Lublinum ac demum 21. Novembris Schedleciū proſecti quievimus, uſque ad 12. Decembris, quo ægrotantem Principiſſæ Parentem Thomam Olensky, Caſtellanum Zakroczimſkenſem, Heroem celebrem, qui Terror Coſacorum cognominabatur, Princeps inviſurus diſceſſit. Erat Heroi illi framea, quæ Szabla Opalmiska ab eo vocabatur, à Nobili Polono Opalinski hoſtibus quondam erepta, quâ Heros iſte pro libitu quinque imperiales ſibi ſuper poſitos diſſecabat. Hanc filio mei Principis Caſimiro donavit, & omnibus valedicens placidè in Domino obdormivit 17. Decembris; cujus corpus noctu dela-




delatum est in Ecclesiam, publicè postea & decenter sepeliendum.

Sequenti die 18. Decembris viam ingressi per 31. milliaria, Grodnam venimus Civitatem, quæ à Principibus, & Senatoribus pro Comitibus multum reedificata, restaurata & adaucta conspicitur. Celeber à naufragiis trajectus per rapidum fluvium Niemen nobis multâ cautelâ superandus obrigerat, cum paulò ante nos, navis cum 50. personis & aliquot equis disrupta, Nobili cuidam Matronæ cum duabus filiabus, aliisque, causâ fuerit submersionis: cæteris aliquot operâ succurrentium evadentibus.

Multum sibi complacuit Rex in tempestivo Principis adventu, cum pauci adessent Palatini, & Senatores, ita ut exigua per festa Natalitia comitatus sit Magnatum assistentiâ. Hic inter Proceres magnam adverti Sessionis, & honoris causâ competentiam, unde Palatini aliqui deditâ operâ diutius emanebant, solummodo ut major sibi Nobilitatis numerus occurrens, introitus splendorem adaugeret; quæ causâ unica dilationis Comitiorum fuit. Interim novo adventante anno 1679. & numero Senatorum adaucto, Comitibus inchoata sunt, quibus aliquoties adfui. Ubi Rex sub Baldakino, ut vocant, in Regio Throno sedens, suæ circumcirca Majestatis dispergebat radios, considentibus ad latera Palatinis; post quos Castellani & Starostæ stantes, ultimò reliqua Nobilitas, & plebs cætum claudebant. Attamen nunquam potui quidquam intelligere præ clamoribus magnis, & protestationibus, murmure, & execrationibus, ut menti inciderit dictum cujusdam Itali sæpius in Polonia auditum: Hic aliquid fit de septem miraculis mundi: vociferantur, & rixantur, tanquam ebrii, & tamen ultimò concludunt.

Aderant quoque tunc Legati complures Regum, & Principum, utet ipsiusmet Romanorum Imperatoris, Excellentissimus Comes ab Althaim, in cujus comitatu in Patriam redivi. Contigit ternis vicibus, ut cum protestationibus exierint Senatores, & annihilare conati sint comitia; attamen clandestinè corrupti, denudò redierunt, quod cum advertissent alii minoris conditionis,

spe



spe quoque & ipsi pecuniæ acquirendæ, varias adhibebant protestationum formulas, ita ut ideo Comitibus usque ad Pascha protrahata fuerint.


Ego obtentis à Principe in quadragesima, interventu etiam gratioso Principis, novis pulchris vestibus, statui Servitio huic renunciare, nactus occasionem pergendi Varsaviam, cum Palatino Lublinensi. Dimissionem ergo ex Servitio petii & magna cum difficultate impetravi, in aulam prædictam transgressus, cum qua 17. Martii Anno 1679. trahis discessi, Palatinus verò ipse, quoniam decisioni ob certam aliquam causam adesse adhuc debuerat, tertiâ die in Sokolka nos expectantes, assecutus est.

Minus mihi hæc præ priori Aula placuit, ubi quidem splendida erant omnia, quæ apparatus extra parietes domesticos concernebant, ast intra eosdem Semi jejunandum erat.

Non est hic apud Magnates in solitum, ut ea, quæ ad ostentationem, in equis, in tapetibus, in domesticis apparatibus conducunt, haudquaquam omittant; Servos verò miserius habeant. In hoc itinere venimus etiam in Radvan, Sedem Nobilium agriculturalium, cum terram ipsimet sibi excolant; neque enim inibi Nobilem (loquor de infima sorte) arare, ligna in Urbes vehere, & omnes agrestes functiones peragere dedecori esse arbitrantur. Frameâ ad femur positâ, à rustico distinguitur, eique titulus *Szlachy* / & *waszezy* competit. non Omittendus etiam dum ligna in foro vendit. Difficilis jam trahis erat via remittente frigore, ut tandem curribus usi Varsaviam, persolutis 41. milliariis, 24. Martii attigerimus. Post Pascha Excellentissimus Comes Legatus Cæsareus Grodnâ huc advenit, & solus per postam relictâ aulâ, Viennam præcessit. Hanc ergo occasionem domum redeundi intermittere nolens, & notitiam cum illa aula Grodnæ inchoatam prosequens, licet Palatinâ planè invitâ (quæ non pridem Pragâ Patria mea redux, aliquam mei notitiam, majoremque ob variam ex me suam commoditatem, æstimationem habebat; nec tamen pro Salario annuo, plusquam centum florenos Polonicos seu nostratum 30. offerebat, pluraq; promittebat, ac demum etiam

Q

vim




vim minabatur) ad aulam Legati cum rebus meis, ibi tempus discessus expectaturus me contuli, cohibente ferociam Palatinæ, reverentiâ Legati Cæsarei. Interim Warsaviam perambulabam, multum à meis etiam notis peste evacuatam, donec 22 Aprilis ultimum Warsaviæ pransi, discessissemus; Czeszochoviam (ego quidem jam tertio) 26. ejusdem appulsi confectis milliaribus 31.

Tarnovicii in Silesia, aliam occasionem querere coactus fui, Legato se Viennam versus dirigente, Nissam, cum quopiam auriga me contuli milliaribus 17. Nissâ cum eodem auriga domum ejus tribus solum milliaribus Glacio distantem, & mox inde Glacium, indeque sine omni mora, urgente occasione, Pragam abii, quam peregrinationis meæ exordium & finem attigi 8. May, Anno 1679. marsupio multum evacuato, sed integrâ valetudine.

Ab Anni ergo Millesimi Sexcentissimi Septuagesimi Octavi Undecima Februarii, usque ad Anni Millesimi Sexcentissimi Septuagesimi noni Octavam Maji, confeci Septingenta quatuordecim miliaria: per totum verò triennium, à quo in Poloniam abii, peragravi mille centum & septem miliaria.

DEO optimo maximo Laus, & gloria, Beatissimæ
DEI Genitrici, Patronisque Bohemiæ honor,
& gratiarum actio in
Sæcula.



CAP. XXIII.

APPENDIX.

De nupero Tumultu Moscæ.

PRO Corollario, Benevolo Lectori annectere libuit, Nova è Moscovia data 30. Maji Anno 1682. quæ quia ingentem mutationis notam præferunt, constitui illa ellucidata, melius ob oculos proponere, cum plurimum, qui hîc nomine notantur, Personas & officia noverim ac spectaverim.

Nova è Moscua 30. Maji 1682.

Postquam noster Magnus Dux & Czar Theodorus Alexides florente licet præditus ætate mortuus fuisset 12. Aprilis, in Successorem ejus, Erater ex secundis nuptiis natus minimus, tunc adhuc in exilio degens, favore procerum, qui plerique Matris ejus amici fuerant, electus, ac Magnus Dux & Czar Moscoviæ denominatus est. Quod dum plebs percepisset, militumque turmæ, mox Seditionem congregata hominum armatorum 10000. turba movit, furensque magnam Procerum stragem 15. 16. & 17. Aprilis edidit, ita ut non tantum de Cognatione Neo-electi Czari, verum etiam Principes, Generales, officialesque, atque alii Magnates, Magni Ducatus Moscoviæ, miserè necati sint. Insuper hoc seditioso turbine, in omnes Urbis partes effuso, ne posterior, hæc Czari electio subsisteret, populus Seniore Fratre Pectorem Alexidem, qui ob incapacitatem, à Magnatibus in prima electione præteritus fuerat, Czarum nominavit; adeoque nunc duo Czari in uno Palatio resident. Quamdiu hæc discordia duratura sit, tempus docebit.

Catalogus occisorum Bojarorum.

SEx primarii Bojari & Principes Regni. Primus Princeps Georgius Alexides. Secundus Princeps Michael Gurgides Dolgoruki

ruki. Tertius Princeps Georgius Gregoriades Ramedanovski. Quartus Joannes Maximides Jasikov. Quintus Artemon Sergides Matslow. Sextus Joannes Kirilov Nariski; duo officiales Aulici, Carion Joannides, & Overke Stephanides. Aulici aliquot, nempè: Ferdenpetrov Saltitlov, & Basilius Wilimonov Nariski, Ofitonavius Kirilov Nariski, Michael Danilov de Galden, & Basilius Carion. Duo Colonelli, Andreas Semenov Doctorides, & Conradus Garliski, Duo Doctores Medicinæ, Daniel de Galden, & Joannes Devstzomo; & cum illis ad 40. aut 50. plebejorum. Kirilo Polujuchides, & Kirilo Monastir cum filio; & Artemonis filius, vestibus Monachorum induti evaserunt.

Quorum cum hæc nova non nisi mentionem, prætermittis eorum officiis, Autoritate, & gestis, faciant, dignum duxi hæc sequente narratione, quæ de cujusque munere notavi, exponere.

Regnavit nuperis annis Alexius Michaëlovicz, qui inter suos Primores pro Supremo Officiali, & sibi addictissimo habuit Artemon Sergevich Matseoff, is, quia non tantum stemmate, sed & ingenii sublimitate excelluit; ab omnibus nimium æstimatus fuit.

Huic secundus Michalo Kurgevicz Dolgoruki, qui olim apud Czarum Michaëlem Patrem Alexii ab incunte ætate Selopetarium, Ruthenè Krahulczik egit, sed ob subsequens ejus factum, Principis gradum assecutus est. Cupidus ipse nimirum auri, quia ejus copiam nusquam majorem, quam apud Czarum sperare poterat, dum vigilas in Palatio ageret, indagavit, ubi nam Czar dormiret noctuque foramen per pavimentum subitus fecit, & cistulam magnâ vi auri plenam subripuit planè tunc; cum ipse Czar de furto somniaret. Fur foramen post se occlusit, & cistulam inhumavit. Expergefactus Czar, cistulam sibi porrigi jussit, quæ cum nullibi locorum esset, advertit primò Somnium suum verificatum fuisse. Sequenti ergo nocte jussit Czar duos ex minoribus, Ministros vigilare. Cum itaque non satiatus Dolgoruki, foramen pavimenti rursus accedens, advertisset vigiles, auscultavit, quid

Secre-

Secretè inter se musitarent, percepitque eos simul tractare, quomodo Czarum veneno tollerent; quod etiam concluderunt, ita, ut eorum unus Czarum ad Convivium invitaret, eique cibum veneno instructum præponeret. Hoc audito fur recessit. Sequenti die itaque Czarum accedere conatur fur, ac cum demum nulli quidquam de suo Secreto prodere vellet, tandem ob continuam ejus importunitatem apud Czarum insinuatusest: cui soli, cum intromissus fuisset, omnia etiam se cistulam rapuisse, & illos duos in vigiliam substitutos veneno tollere Czarum machinari, patefecit. Exacerbatus Czar, dissimulavit tamen omnia, & ecce! vix præterlapsis duabus septimanis, ab altero conspiratorum ad convivium invitatur Czar, ubi inter epulandum præponit Machinator cibum instructum, quem cum post Czarum stans fur Krahulczik advertisset, tangendo Czarum, ne sumeret, signum dedit. Quid Czar? accepit partem bonam, & eam cani projecit, qui sumpto venenoso bolo, cum in ventriculo dissolutus fuisset, agitando se coram oculis Czari, exanimatus est. Czar ergo jussit conspiratorem teneri, & quis alter Conspirator esset, furem Krahulczikum interrogavit; quem ille mox digito prodidit. Rapti ergo ambo, & fustibus patrio more enecati sunt: familiâ insuper eorum totâ proscriptâ. Ipsum verò Krahulczik, in remunerationem talis facti, Principem fecit, eique amborum horum divitias donavit. Hinc quoque fur ille, nomen Dolgoruki, quasi *blauihy rufy*/ id est longarum manuum, nactus est, quia furto suo usque ad intima Czari penetraverat.

Supra nominatus Czar Alexius, cum prima uxore habuit filios duos; primogenitum valde deformem, qui semper in Monasterio degebat; alterum Theodorum Alexievicz. Mortuâ autem hæc, accepit aliam, cum qua unum progeneravit filium; & tandem derelictis hisce tribus hæredibus, animam æternitati transcripsit.

In Regimen, non potuit ob deformitatem succedere primogenitus; successit Theodor Alexievicz: etiamsi in ea electione magna inter Primores controversia exorta fuerit.

Q³

Arte-

Artemon supradictus, præ cæteris Sapientissimus, cum aliis sibi adhærentibus multis; voluit natu minimum, quem fratre Theodoro ingeniosorem advertebant, Czarum habere. Dolgoruki cum sibi assistentibus, voluit Seniore illum, medium natu Theodorum, quibus, cum diu disceptassent, & contendissent, adhæsit plebs, ac consensit, ut tandem Theodor in Czarum electus, & creatus fuerit.

Hic Czar concipiens rancorem contra Artemon, mox cum, raptis omnibus bonis & divitiis, ad quas evehendas vix spatium quatuordecim dierum suffecisse dixerunt, expulit, & in exilium ad ducenta penè milliaria, totâ etiam ejus cognatione proscriptâ, misit, nec ei pro victu diurno plus, quam tres Kopicas (quarum quinque faciunt nostrates novem cruciferos) assignavit; Frater verò Czari minimus, ne quidei violentiæ accideret, in suum longè distans dominium abiit, ibique privatus resedit. Ast Dolgoruki apud huncce Czarum in hac, in qua Artemon apud Patrem, æstimatione, & prioritate habitus est; qui solus unicus, ut in nostra Legatione animadvertimus, quatuor equis vehi licentiam habuit, in Sessionibus omnibus semper pulcherrimis, & pretiosissimis indutus vestibus, à Legatis ad Czarum vicibus omnibus Commisarius egit. Erat parvæ staturæ vir præpinguis, ita ut, quando ambularet; se nimium agitaverit, ac si omnes corporis ejus partes vacillarent.

Nunc itaque mortuo Czaro Theodoro (quem dicunt veneno sublatum) redivit frater minimus cum Artemone, & reliquis sibi addictis, & illum rancorem, quem pridem conceperant, in eos, quos pridem antea adversarios passi fuerant, vice versâ effundere; quid nî machinarentur? quod ipsis ad votum non successit: advertit enim plebs indomita, ex aliquo odio partis Artemonianæ, sublatum fuisse Czarum Theodorum, quem in amore, & æstimatione maxima habuerant; cumque percepisset Electionem Junioris; operâ ejusdem amicorum factam in rabiem sine dubio ex instigatione aliqua amicorum Theodori Czari de-

defuncti, acta consurrexit, & nocentes, cum innocentibus occidit.

Quamvis verò hunc natu minimum in Czarum assumi debere viderent; attamen Fratrem alterum deformem illum, ne plebeja electio præteriretur, in Czar quoque elegerunt; Quapropter habent nunc duos Czar, unum à plebe, alterum à Nobilitate.


Ex illis occisis aliquos, ctm frequens in Sessionibus fuerim, me novisse memini. Primus Knias Jurch Alexievicz nullum aliàs officium habuit; ast quia ex stemmate Czari fuit, primum obtinuit locum Senex jam decrepitu. De secundo Knias Michalo Kurgevich Dolgortuki jam memoravi. Tertius Knias Grigori Grigorevich Romedanovski tempore nostræ Legationis Anni 1678. mensibus Majo, Junio, Julio, & Augusto, fuit Generalissimus contra Turcas apud Czehrinum, qui Victoriâ præclaram reportavit, Turcas castris exiit, raptis omnibus impedimentis, captis plurimis cum uno Bassa Hann. In hac strage, prout narrabant, ad centum millia ab utraque parte cecidere. Resumptis verò viribus Turca, non advertente hoc Generalissimo, invasit Czehrinum, tandemque Civitatem expugnavit; Romedanovski advertens Castellum, quod ad Civitatem ipsam Czehrinum exstabat; difficulter se retenturum, intus fecit cuniculos, & eum ad eos accendendos parata fuissent omnia, discessit cum armatis, & Castellum deseruit; Turca ergo mox illud invadere, & cum armatis intrare cepit; at cum optime jam occupatum fuisset Castellum, Generalissimus cuniculos accendit, eoque modo iterum plurima millia Turcarum (ut Mosci gloriabantur) obruit. Unde debilitatis ita viribus Turca cum pudore recessit, & bellum intermisit. Auditis prius hisce novis Czar, quod capta esset Urbs Czehrin, turbatus valde odio hunc prosequi Generalissimum suum cæperat; ast quando relatum est Generalissimi strategema, cum plausu reductus in Moscuam, ductis post se captivatis Turcis, magnum à Czar præmium retulerat.

Quar-

Quartus Ivan Masimovicz Jasikow, fuit mei Principis Czarteryski Legati Poloniae Adstes, qui solus cum Principe conversari ausus est. Quintus Artemon Sergevicz Mastloff, quis & quantus fuerit Vir, Superius enarravi. Sextus Ivan Kirilov Narisken fuit supremus stabuli praefectus; is, cum, & quotiescunque destinata fuisset nostrae Legationi Sessio, totus alios semper & alios currus, & equos assumendo, praeventibus aliquot paribus Ministrorum, pro Legatis veniebat, & ante currum eques praebat. Septimus Demnoidiak Michailo Ivanovicz Strabezi, Legati Magni Ducatus Lythuaniae Adstes fuit. Octavus Wilimow Wasilevicz Narzkiviz Diak, Legationis nostrae Secretarii Adstes. Reliquos, quos nova recensent, me novisse non recordor, quamvis & illos & alios multos haud dubie viderim & noverim; ast nomina tam multorum difficile fuit expiscari.




INDEX




INDEX RERUM.

<i>A.</i>		vorant Mosci	13
A	Blutio Moscorum annua	Casimiria urbs	4
	in flumine Capite 17	Caupones Judæi	4
	Adstites Moscovit. 7.8.9	Caupones	6
	Animalia multa in Moscovia 19	Comitia Polonorum	2.22
	Apparatus Legatorum ad ingressum Moscuae 10	Convivia Moscorum	12
	Architectus male praemiat 13	Cracovia urbs	1
	Audientia apud Czarum 11	Crudeles Mosci	16
<i>B.</i>		S. Crucis reliquiae	4
B	Alnea Moscorum 19	Crucis signum more Moscorum	7.13
	Baptismus annuus 17	Currus Foeminarum magnarum Moscuae	19
	Barba à Czaro exusta 15	Curru 4. equis vehi soli Principi praecipue apud Moscos concessum	23
	Beatissimae Virginis DEI paræ cultus apud Moscos 19	Czari splendor vestium	11
	Benedictio fluminis annua 17	Titulus	11
	Bialgorod 13	Thronus	11
	Boristenes fluvius 5.6.7.8.	Conjugis sepulchrum	9
<i>C.</i>		Processus ad recreatione	19
C	Amelus in Moscovia 20	Mors, causa tumultus	23
	Campanæ multæ grandes 13	Czar veneno appetitus	23
	Canes vivam foeminam dilacerarunt 16	Czari nunc duo	23
	Canes vice equorum 19	Czastachovium monasterium	22
	Capitaneus Dragonerorum amandatus 6	Czehrinum à Turcis oppugnatum.	17.23
	Captivi Moscuae 13	Czernici	7
	Carnem erudam semiputridam	<i>R.</i>	Devo




D.		Germani Moscuæ	14
D Evotio Moscorum	19	Germani redire in Patriam pe-	
Divitiarum Czari æstima-		tentis pœna	16
tio apud Moscos	15	Grodna Urbs	2
Domus paratæ venduntur in		Gronostagæ formosa animalcu-	
foro	13	la	19
E.		H.	
E Briosi Mosci	14	H Ermeniles animalia alba	19
Energumeni multi in Polo-		Homicidia leviter puniunt	
nia	1	Mosci	16
Epulæ Moscorum	12.15.18	Honoris appetitus in Polonis	22
Exteris non conceditur ex Mo-		Horologium elegans	13
scovia redditus	14.16	Horti Czari	14
F.		Hospitia Lithuanica	6
F Oeminæ Moscuæ	13	I.	
Fœminæ Tartaricæ defor-		J Esuitæ	6.21
mes	14	Imago SS. Virginis DEI paræ	
Fœminæ supplicium	16	miraculosa Zirowicii	6
Festi celebratio apud Moscos	15	Impudici Mosci	19
Finis itineris Moscovitici	22	Incendium Moscuæ	17
Forum Moscuæ	13	Incessus Moscorum	19
Forum pediculofum	13	Inconstantia Moscorum	17.19
Fossa quadrata olim limites Mo-		Indulgentiæ balneantium	17
scoviæ	8	Infantes lactandi modus barba-	
Framea egregia	22	rus	9
Fraudulenti Mosci	17	Infantibus nolas affigunt Mo-	
Frigus in æstate Moscuæ	14	sci	9
Furni Moscorum	8	Ingressus Moscorum magnificus	10
Fur, factus Princeps	23	Innocentius XI. Papa	2
Furtum Carpentarii	18	Insectum Karakan molestum	8
detectum	20	Insignia Moscoviæ	11
Furtum ex ipso conclavi Czari	23	Judæi	2.4.6.
G.		Juramentum publicum Mosco-	
G Emmæ copiosæ apud Mo-		rum & Polonorum	16
scos	14	Juramentum Czari	18
		Iwan	



Iwan Welikoy Turris	13	Minfa Urbs	6
K.		Molilow Urbs	7
K Abak popinæ	9.20	Monachi Moscovitici	7
Karakan insectum molestum	8	Monasterium Moscorum	9
Kataigorod	13	Moniales Moscoviticæ	13
Kopika pecunia Moscorum	18.23	Mores Moscorum	19
Krahulczik, sclopetarius	12	Mosaisco Urbs	9
Knias Princeps	12	Moscoviæ limites	7
Krimgorod	13	Moscorum erga suum Czarum	
Kukui Urbs Germanorum	14	veneratio	9
L.		Moscuæ Urbs	13
L Actuæ Moseis ignotæ	14	Moschus magnos Legatos infe-	
Legationis Polonæ splen-		cutus	20
dor	5	Mulieres Moscoviticæ	7
Legatorum Palatium	11	Munera Czaro oblata	11
Legationis puncta	15	Munera Czari à Polonis con-	
Legatus Princeps factus Capita-		temta	18
neus Wielisliensis	22	Musica Moscis parum nota	7
Legati Principis pium munus		N.	
oblatum Czastachoviæ	22	N Aleiki Urbs Germanorum	
Libertas Polona	1.3	dicta	14
Lublinum Urbs	4	Narev fluvius	2
Lukow civitas plena Nobilibus	4	Natalis Czari	15
Lusus Moscorum	19	Niemem fluvius	2.6.
Lusus puellarum Moscuæ	19	Nobilitas Polona	2.4.22
M.		Nuptiæ infastæ Moscuæ	16
M Oenia Smolensky non pos-		Numerus militum Moscuæ	13
sunt reedificari	21	O.	
Magnates Moscuæ occisi	23	O Beliscus Romanus	2
Magnitudo Moscuæ	13	Officinæ à Germanis ere-	
Mercatores Moscuæ	13	ctæ	14
Milites Mosci	13	P.	
Milliare Moscoviticum Wiaist	9	P Acta inter Moschos & Polo-	
Minæ Moscorum contra Lega-		nos	16
tos	15	Palatium Czari	13
		Pascha	

Pascha Moscorum	7	Selavi	18
Patriarchæ benedictio	13	Sessiones Legationis	15
Pedicularum forum Moscuæ	13	Smolensko Urbs	7
Pelles variæ in Moscovia	19	Somnium Czari mirabile	23
Pelliones artifices Moscuæ	19	Salas, tuguria	9
Periculum extremæ vitæ autoris	3	Stabudum Czari	13
Perfæ Mercatores	13	S. Stanislai miraculum	4
Pestis Warsaviæ	4	Strelecka sloboda	13
Pictorum platea Moscuæ	13	Supplicia apud Moscos	16
Pietas Moscorum	13	T.	
Piscatio fortunata	21	Tabernæ Moscorum	9
Platea Moscuæ	13	Tartari cadavera vorant	13
Polanovce cōfinia Moscuæ	8	Templa multa	13
Polonorum convivia	2	Titulus Czari semper totus repe-	
Comitia	2.22	titur	11
Magnificencia	2	Tormenta mira	11
Rixa	1.3	Triumphus legatorum ob victori-	
Splendor	4	am Moscorum	20
Hospitalitas	4.6	Tumultus Warsaviæ	3
Pietas	4.5	Tumultus Moscuæ	23
Bellicositas	6	Turcarum ad Czehrinum clades	17
Jejunia	6	Turris Iwan Weliky	13
Magnanimitas	15	V.	
Poloni aliqui ultrò facti servi apud Moscos	18	Valedictio Legatorum	18
Pompa Legatorum apud Smolensko	7	S. Valeriani corpus	4
Pontium multitudo	20	Warsavia Urbs	1
Popinæ dictæ Kabak	9.20	Vectores publici Moscuæ	14
Posta in Moscovia	9	Venatio Moscorum	19
Præurbium Moscuæ	13	Wiasmo Urbs	9
Processus ad Czari alloquium	11	Wiaft milliare Moscoviticum	9
Processus ad Sessiones	15	Victoria Moscorū contra Turcas	17
R.		Vieprz fluvius	4
Reditus Legatorū præcipitat	20	Vigiles Moscuæ	13
Reluctantia Moscorum contra Legatos	15	Vilna Urbs	2
S.		Virgines Moscoviticæ	10
Sacellum Czari splendidum	16	Urbs à terra absorpta	2
Schismatici	6	Uxores Moscorum	19
		Z.	
		Zemlenigorod	13.



St. B.

